

Абдумажакор

---

# СИНЧАЛАК

---

ПОВЕСТЬ

*Иккинчи нашри*

ЎзССР ДАВЛAT БАДИЙ АДАБИЁТ НАШРИЁТИ  
Тошкент - 1960





ечки пайт. Район партия комитетининг секретари ўртоқ Тоҳиржон Носиров чанг босган виллисдан тушиб, ёши элликдан ошиб қолганига қарамай, районом биносининг зинасидан чопқиллаб чиқиб кетаётган жойида бирдан тўхтади; зинанинг бир чеккасига бориб, коверкот макинтошининг этагини, бризент этигини қоқди; похол шляпасини бошидан олиб, рўмолчаси билан пешона ва бўйинни наридан-бери артди-да, энди солмоқли, илдам қадам ташлаб чиқиб кетди.

Тоҳиржон Носиров район дартия комитетининг секретарлигига яқинда сайланган бўлиб, ҳозир район билан танишиб юрган эди.

Носиров қабулхонада ҳурмат юзасидан ўрнидан турган ёрдамчиси — йигирма икки ўшлардаги баланд бўйли, хушқомат, жуда нозик қизга салом бериб, кабинетига кириб кетди. Қиз бир даста газета-журнал, битта қизил папкани олиб, унинг кетидан кирди, бу нарсаларни секретарнинг столига қўйди-да, бориб деразаларни очиб юборди. Дим кабинетга боғчадан муздай ҳаво, ҳандалакними, босволди қовунними эсга соладиган ялпиз ҳиди кирди; чумчуқларнинг чуғурлаши, дераза остида оқаётган ариқчанинг шовиллаши эшитилди. Носиров қизил папкадаги қофозлардан бир-иккитасини кўздан кечирди, кейин кўзойнагини пешонасига суреб, графиндан стаканга қилқиллатиб яхна чой қуяр экан, қизга айрим диққат билан разм солди. Қиз буни пайқади-да, чиқиб кетишини ҳам, чиқмаслигини ҳам билмай, эшик олдида туриб қолди.

— Менга гапингиз бор шекилли...

— Ҳм... Кейин айтаман, Саидахон!

— Хўп...

Саида чиқиб кетмоқчи эди, Носиров тўхтатди.

— Майли, ҳозир айта қолай... Утиринг!

Саида, арzon чит бўлса ҳам яхши тикилган кўйлагининг орқа этагини фижим қилмасликка тиришиб, эҳтиёт билан курсига ўтириди, йўл-йўл баҳмал жилеметкасининг биқин чўнтагидан ярми чиқиб турган кичкинагина блокнотини олиб столга қўйди, ингичка қаламининг кетини иягига ниқтаб, Носировга савол назари билан қаради. Носиров бир стакан заъфарондай яхна чойни нафас олмай шимирди, стаканни тақ этиб столга қўйди-да, қипқизил, силлиқ, деразанинг акси кўриниб турган ялтироқ бошини силар экан, кулимсираб:

— Кўчадан кетаётган автомобиль бирорни босса ёки туртибми, йиқитибми, унга озор берса, нима бўлади?— деди.

Саида чўчиб тушди.

— Нима бўлди, машинангиз бирорни урдими?

— Йў... йўқ, менинг машинам ҳеч кимга озор бергани йўқ... Хўш, нима бўлади?

Саида нима дейишини билмай:

— Милиция тўхтатади...—деди.

— Борди-ю, машинани тўхтатадиган, шоферни жавобгарликка тортадиган милиционернинг ўзини қасдан уриб, йиқитиб ўтса-чи, унда нима бўлади?

**Санда кулди.**

— Унисини билмадим... Қанақа шофер экан у довю-  
рак?

— Арслонбек Қаландаров!

Санда у одамдан ҳар нима кутиш мумкин деган маъ-  
нода жилмайиб бош чайқади.

Арслонбек Қаландаров «Бўстон» колхозининг раиси,  
машҳур раислардан бўлиб, ўтган ҳафта колхоздаи  
районга машина ҳайдаб кетаётганида йўлини тўсган  
милиционер билан жанжаллашган, уни уриб, йиқитиб  
ўтган эди.

Воқиа бундоқ бўлган эди.

Янги сотиб олинган беш тонналик юк машинаси май-  
донни бир айланниб, правление олдига қўндаланг бўлган-  
да Қаландаров жуда курсанд бўлиб кетди; ҳали ғубор  
қўнмаган ям-яшил машинани айланниб кўздан кечирди,  
капотини очдириб, моторини кўрди; сўнг, рулга ўтириб,  
стартёрги босди. Мотор бир пишқириб равон гуриллай  
кетди. Қаландаров машинани олдинга, орқага юргизди,  
майдонни бир айланди, кўприкдан ўтиб, катта йўлга чиқ-  
қанида шоферни чақириб ёнига ўтқизди-да, районга то-  
мон йўл олди. Унинг мўлжали беш-олти километр юриб  
қайтиш эди, бироқ янги машина, тўғри ва равон асфальт  
йўл ҳавасини келтирди-ю, район марказига тушиб чиқиши-  
га қарор берди. Қаландаров йўл бўйидаги тиниқ яшил  
даражтлар, барра ўтлардан кўзи қувониб, кишининг ву-  
жудини яйратадиган май ҳавосидан масти бўлиб, хиргойи  
қилиб кетаётган эди, йўл бўйида турган милиционер  
қўлидаги ола таёқ билан йўлнинг четини кўрсатди.  
Қаландаров милиционер кўрсатган жойга келиб тўхтади.  
Маълум бўлишича, йўлнинг баҳорги ёғингарчиликдан  
чўккан, бузилган кичик бир участкаси ремонт қилинаёт-  
ган бўлиб, район томонга ўтадиган бўш юк машиналари  
бу ерга ярим километр келадиган каръердан шағал  
олиб, ўша участкага тўкиб ўтиши керак экан. Қаландаров  
бир оз сабр қиласа ёнида ўтирган шофер милици-  
онерга машина янги эканини, оғир юк ортиб бўлмасли-  
гини айтиб, ортиқча сўзга ўрин ҳам қолмас эди.  
Қаландаров бирдан тутоқди, шоферни оғиз очгани қўй-  
май, шовқин солди.

Милиционернинг аччиғи келди, права сўради.

Қаландаров унинг сўзига қулоқ солмай, машинани  
юргизди. Милиционер зинага чиқиб рулга тармашди.

Қаландаров унинг шапкасини олиб улоқтириб юборди.

Милиционер шапкасини олиб, унинг йўлини тўсмоқчи бўлди. Қаландаров газ берди-да, машинанинг қаноти билан уни уриб, йиқитиб ўтди.

Милиционер дарров ўрнидан турди ва унинг кетидан лунжини шишириб, ҳуштак чалганича қола берди.

— Қаландаров шу куни кечқурун автоинспекцияга кирибди,— деди Носиров кулиб.— Ўша милиционерни топиб уэр сўрабди. Милиционер начальнигига рапорт берган экан. Қаландаров тоза ялинибди: «Жон ука, начальникка рўпара қилиб эркак қаддимни букма, қанча штраф олсанг ол», деб чўнтагини тутибди. Автоинспекциянинг начальниги хотин киши экан...

Саида пиқиллаб кулиб юборди.

— Сояда ўсган раислардан,— деди кулги ёшини артиб.

«Сояда ўсган» деган ибора район партия конференциясидан чиққан: кўп вакиллар музокарада райком бюросининг фаолиятини танқид қилиб, колхозларда партиявий-сиёсий ишлар ўз ҳолига ташлаб қўйилганлиги, сиёсий-тарбиявий ишлар хўжалик ишлари соясида қолиб кетганлиги, бирмунча колхозларда раҳбар кадрлар сояда ўсаётганлиги тўғрисида гапиришган эди.

Носиров столининг тортмасидан блокнотини олиб тез-тез варақлар экан:

— Тўғри! Билар экансиз!— деди.— Мен «Бўстон» колхози билан бир оз машғул бўлдим, тайинлик бир хуносага келмаган бўлсам ҳам, кўнгилда бир хираги пайдо бўлди. Қаландаров сояда ўсганлигидан ташқари эркароқ раис кўринади.

— Жуда тўғри пайқабсиз,— деди Саида.— Районнинг илгариги раҳбарлари, айниқса райком секретари ўртоқ Қодиров, Қаландаровни ҳаддан ташқари эркалатиб юборган эди. Унинг милицияга бўйсунмаганлиги ҳам шунинг оқибати. Бироқ кейинчалик ўйлаб кўрган бўлса керак: бу тантиклигини районнинг ҳозирги раҳбарлари кечирадими-йўқми? Шунинг учун милиционердан узр сўрагани борган, штраф ол, деб чўнтагини тутган. Лекин «эркак қадди» тўғрисидаги гапи менинг учун ҳам янгиллик!

Қаландаров, ҳақиқатан, Носиров пайқаганича ва Саида айтганича хийла эрка раислардан эди.

Бу одам қирқ учинчи йилгача шу райондаги Ворошилов номли бардамгина колхознинг раиси бўлиб, ўттиз тўққизинчи йилда «Ҳурмат Белгиси» ордени билан мукофотланган илфорлардан эди. Қирқ иккинчи йилда «Бўстон» колхозида раис бошлиқ бир тўда жиноятчилар шайкаси фош қилинди. Шайка колхоз мулкини талонторож қилиб, колхозчилар ҳақини еган, хўжаликни барбод қилган экан. Район ижроия қўмитасининг ўша вақтдаги раиси бир куни Қаландаровни чақиририб, «Бўстон» колхозининг аҳволини гапириб берди, сўзининг охирида: «Мен урушга кетаётибман, агар рози бўлсангиз шу колхозни сизга топшириб хотиржам бўлиб кетсан» деди. Раиснинг бу гапи Қаландаровга жуда қаттиқ таъсир қилди. У, кўзига ёш олиб, раисни қучоқлади ва қўл бериб: «Колхозни кўтараман! Бажараман!» деди ва оғзига сўз олди. Шу-шу бўлди-ю, Қаландаров кечани кеча, кундузни кундуз демай колхоз ишига жуда қаттиқ ёпишиди; каттани ака, кичикни ука деб ҳаммани ишга солди, ҳар қаерда колхоз учун талашиб-тортишди. Оғир уруш шароити бўлишига қарамай колхоз икки йил деганда оёққа босди, райондаги илфор колхозлар қаторига кириб олди. Республиkaning йигирма йиллиги муносабати билан «Бўстон»дан Қаландаров Меҳнат Қизил Байроқ ордени, яна тўқиз киши бошқа орден ва медаллар билан мукофотланди.

Бир йилдан кейин район партия комитетининг секретари ҳам урушга кетиб, унинг ўрнига Рустам Қодиров деган ёш бир йигит келди. Янги секретарнинг бутун районда кўргани Қаландаров бўлди. Ундан олдинги секретарь даврида «Бўстон» колхози оғизга тушган бўлса, Қодиров даврида колхоз у ёқда қолиб, Қаландаровнинг ўзи оғизга тушиб кетди. Қаландаров бурун районда бўлиб турадиган мажлисларда биринчи қаторда ўтирадиган бўлса, энди президиумга чиқадиган, ниҳоят, область ва марказдан келган катта-кичик билан баҳузур гаплашиб, кулишиб, имлашиб ўтирадиган бўлди. Кунлардан бир куни марказий газеталардан бири «Бўстон» колхози ҳақида ўз мухбирининг каттагина бир очеркини босиб чиқарди. Очеркка «Бўстон» деб сарлавҳа қўйилган бўлса ҳам, гап колхоз ва колхозчилар ҳақида эмас, фақат Арслонбек Қаландаров ҳақида борар эди: Арслонбек ундоқ қилган, Арслонбек мундоқ қилган, Арслонбек увотда кўкрак кериб туриб, ёқимли товуш билан ундоқ

деган. Арслонбек доно кўзларини қисиб бундоқ деган.. Ўша куни кечқурун райком секретари Рустам Қодиров «Бўстон»га бориб, Қаландаровни шу муносабат билан табриклади ва колхозчилар олдида уни: «Колхоз дала-ларининг арслони», деб атади. Секретарнинг бу таъри-фи Қаландаров учун газетанинг мақтovидан ҳам катта-роқ бўлди. Шундан кейин Қаландаров ва у билан бирга «Бўстон» колхози ҳам биринчи навбатда Қодировнинг, қолаверса бутун район раҳбар ходимларининг арзандаси бўлиб қолди. Район раҳбарлари ҳар сабаб ва ҳар баҳона билан колхозга тез-тез боришар, бошқа колхоз-лардан юлиб бўлса ҳам унга моддий ва маънавий ёрдам боришар, районга марказдан келган масъул ходимларни ҳам ўзларининг меҳмонларини ҳам «Бўстон» нинг меҳ-монхонасига, боғига олиб боришар, районга қандай муҳ-бир, фотограф, ёзувчи келса ўша ерга юборишар эди. Бунинг натижасида Қаландаров район раҳбарларининг, ҳатто баъзи бир марказий масъул ходимларнинг қаноти остига буткул кириб кетди. Буларнинг қаноти остида унга қилич ўтмайдиган, ўқ тегмайдиган бўлиб қолди.

— Биласизми,— деди Носиров куюниб,— кейинги ик-ки йил ичиде колхоз партия ташкилотининг секретари беш марта алмасибди. Ҳар сафар Қаландаровнинг хо-ҳиши билан алмашар экан. Ҳар сафар райком розилик берар экан... Секретарь колхознинг ўзидан бўлса, Қалан-даров уни қоққанда қозиқ, илганда хумча қилиб олар экан, райондан юборилса сиғдирмас, чўқиб ташлар экан. Бу нима деган сўз? Демак, Қаландаров районнинг баъзи раҳбар ходимларини орқа қилиб, бутун партия ташкилотини босиб олган деган сўз. Мана, бир мисол: Зулфиқоров деган бир бригадир хотин устига хотин олибди. Зулфиқоров партия аъзолигига кандидат экан. Шу одам устидан бюрога тушган аризани Қаландаров бир ярим йилдан бери муҳокама қилгани қўймас экан! Шундоқ бўлгандан кейин правлениеда ҳам шунинг айт-гани айтган, дегани деган бўлиши керак...

— Ўзи яхши ташкилотчи дейишади,—деди Саида.

— Тўғри, ташкилотчиликнинг аҳамияти катта, лекин ташкил қилинган одамлар ташкилотчининг соясида қо-либ кетмаслиги керак,— деди Носиров ва блокнотини столнинг тортмасига солди.

Саида гап тамом бўлди деган хаёлда ўрнидан тур-моқчи бўлган эди, Носиров тўхтатди.

— Мен сизга айтмоқчи бўлган гапимни ҳали айтганим йўқ. Бу гаплар ҳаммаси даромад эди. Гап шуки, биз бюро аъзолари, кенгашиб, «Бўстон» партия ташкилотининг секретарлигига сизни тавсия қилишга қарор бердик. Бир йил ишлаб берасиз. Фақат бир йил! Ўз ўрнингизга одам топиб, тайёрлай олсангиз илгарироқ чақириб олишимиз ҳам мумкин.

Саида кўзларини, оғзини катта очиб секин ўрнидан турди, ингичка бармоқлари титраб турган иккала қўли билан бошини ушлаб яна ўтириди.

— Тоҳиржон ака! — деди энтикиб.

Носиров кулди.

— Ҳайрон бўлишингизни билар эдим, лекин қўрқиб кетарсиз деб сира ўйламаган эдим.

— Ахир мен... қўлимдан келмайди.

— Қаёқдан биласиз? Секретарь бўлиб кўрганмисиз?

— Мени Қаландаров писанд қиласмиди!

— Писанд қилмагани яхши. Агар писанд қилса, боргани кунингиздан бошлаб чўқиш пайига тушади-ю, ишдан қолади. Писанд қилмаса чўқимайди, демак биз бошқа ҳеч нарсага алаҳсимасдан ишимизни қилаверамиз: партия ташкилотини жонлантирамиз, Қаландаровнинг куч ва талантини керакли томонга йўналтирамиз.

Саида бошини қуий солиб жим қолди.

— Хўш, яна нима дейсиз? — деди Носиров.

Саида эштилар-эштилмас:

— Аёл бошим билан... — деди-ю у ёгини айтмади.

— Мана бу гапни мен сиздан кутмаган эдим! — деди Носиров, зўр таассуф билан. — Ҳеч кутмаган эдим-а, жон қизим! Шунаقا гаплардан қачон қутуламиз? «Аёл бошим» деганингиз мунглиман, муштипарман деганингизми? Наҳот шундоқ бўлса!.. Мой айниса туз солади, туз айниса не солади, деган гап бор. Аёлларга «аёл» деб, одам боласининг ожиз, нотавон тоифаси деб қарааш қалин, қундошлиқ, «назр» сингари аёллар шаънига, демак инсоният шаънига ҳақорат деб турганимизда сиз ўзингизга «аёл» деб қарасангиз... додимизни кимга айтамиз! Қадимги замонда аёллар ўзига ўзи аёл, яъни мунгли, муштипар деб қараши табиий бўлган, чунки унинг кўз ёшидан бошқа орқа таянчи йўқ эди. Сизнинг орқангизда совет ҳукумати, бутун бир система турипти! Наҳот шуни сезмасангиз! Буни сезмасангиз жамнитдагина эмас, шахсий ҳаётингизда ҳам дадил қадам ташлай

олмайсиз. Замонамиз дадил қадамлар замонаси-ку, қизим! Ҳозирги замонда дадил қадам ташлай олмаган киши туртилиб, четга чиқиб қолади. Қим айтади сизни комсомол тарбиясини кўрган қиз деб!

Саида бошини кўтарди, қоматини ростлади.

— Кечиринг, Тоҳиржон ака, оғзимдан чиқиб кетди... Тўсатдан шундоқ деганингизга гангиб қолдим... Мен ўзингиз айтмоқчи, партиянинг солдатиман ... лекин оиласвий аҳволимни назарда тутишингизни ўтинаман...

Носиров бир нима демоқчи бўлиб оғиз ростлагандага эшик секин очилди-ю, Арслонбек Қаландаровнинг шопдай, районга машҳур мўйлови ниҳоятда ярашган озгин юзи кўринди.

— Ўртоқ Носиров, мумкинми... колхозга борган экансиз... йўқ эканман...

— Марҳамат, киринг! — деди Носиров ва Саида билан наридан-бери гапни тамом қилди.— Ўйлаб кўринг. Бу тўғрида эртадан кейин гаплашамиз.

Саида эшикка томон юрди ва четланиб, Қаландаровга йўл берар экан, биринчи мартаба, унга зеҳн солиб қаради. Раис унинг кўзига илгаригидан савлатсизроқ кўринди.

Саида чиқиб, эшикни зич ёпди.

## II

Саида Носировнинг таклифига розилик бермаганини, унга важ кўрсатганини кабинетдан чиқиши биланоқ унутди; унумаган тақдирда ҳам раёном бюроси бу важларни эътиборга олмаслигига қаттиқ ишонар, шуни хоҳлар, «Бўйстон»дек катта ва машҳур колхознинг партия ташкилотига секретарь бўлиб бориш ўйи қалбининг аллақаерини тимдаласа ҳам, аллақаерига жуда-жуда хуш ёқар эди.

Саида телефонга жавоб берадими, келган-кетган одамлар билан муомала қиладими, қўлида қофоз, капалакдай учиб ҳали у эшикка, ҳали бу эшикка кириб чиқадими — бошидан хаёл аримай қўйди: гимнастёрка ва этик кийиб далаларни айланади, қаерга борса колхозчилар ўраб олишади, колхоз клубида мингларча одамни оғзига қаратиб катта-катта нутқлар сўзлаганида орқа

қаторларда ўтирганлар беихтиёр олдинга силжиб кела беради, колхозда партия турмуши ва колхоз ҳаётининг ҳамма соҳасида иш қайнайди...

Орадан ярим соатча ўтгандан кейин Қаландаров кабинетдан қип-қизариб чиқди-ю, Саиданинг олдидан ўтар экан, унга кўз қирини ташлаб: «салом», деди. У, эҳтимол, Носировнинг суҳбатидан кейин эс-ҳушини йўқотган, шунинг учун, Саида билан саломлашганини унугтган бўлса, бироқ Саида унинг қизарганини ҳам пайқамай, саломига ўзича маъно бериб: «Ҳимм, Носиров айтибди. Янги секретарга биринчи салом», деб қўйди.

Саида уйга кеч соат ўн бирларда қайтди. Холаси уни кутуб ўтириб, сўрида ёнбошлаганича пинакка кетибди. Отаси Али бобо ток остидаги ўзининг арқон каравотида, одатдагича деворга қараб чўнқайиб, худди қуръон тила-вот қилаётгандай тебраниб ўтирас эди.

Али бобо бундан кўп йиллар муқаддам хотинини сўйиб ташлаган, Саида мана шу холаси Тўтинисонинг қўлида ўсан.

Саида ўшанда неча ёшда бўлса экан? Ҳар ҳолда эс-эс билади: ўша оқшом ой жуда ҳам катта чиққан эди. Саида опаси Карима билан маҳалла болаларига қўшилиб, эшикма-эшик бойчечак айтиб юришган эди. Саида гоҳ бошқалардан олдин, гоҳ бошқалардан кейинда қолиб, бойчечак айтар эди:

Бойчечак, бойчечак,  
Бойчечакнинг боласи, боласи,  
Қулоғида донаси, донаси.  
Қаттиқ ердан таталаб чиққан бойчечак.

Шу пайт ҳовли томондан кимнингдир жон аччиғида додлаган товуши эшитилди. Опа-сингил югуриб ҳовлига киришди. Ҳовли жимжит. Айвонда хира осма чироқ аллаҳечук кир ёфду тўкиб туритти. Саида яқинроқ бориб қараса, айвоннинг пастида кимдир, боши бир томонга қийшайган, чалқанча тушиб ётибди. Карима: «Вой, ая, сизга нима бўлди, туринг!» деб унинг қўлидан тортди. Саида ҳам тортмоқчи бўлган эди, қоп-қора ва ёпишқоқ бир нарсага тойилиб йиқилди. Қон!. Саида у ёғини билмайди, бир вақт кўзини очиб қараса, мана шу холаси Тўтинисонинг уйида ётибди. Саида бўлган воқиани кейинчалик опаси Каримадан эшитди: аяси қишлоқ совети

олдида очилган саводсизликни битириш курсига кириб ўқимоқчи бўлган экан, дадаси унамабди ва шу важдан бир неча марта тутиб олиб урибди. Аяси ўша қонли оқшом яшириқча дарсга кетаётган экан... Суд Саиданинг дадасини отувга ҳукм қилган экан, Тошкент ўлим жазоси ўрнига ўн йил қамоқ буюрибди.

Шу билан бу оила тамом бўлди. Тўтинисо ҳовлини сотиб, икки етимни ўз қишлоғи Ропқонга олиб кетди. Қарима Ропқонда ўқишини давом этдириб, уруш бошланган йили ўн йилликни битирди; ундан кейин Самарқанд медицина институтида ўқиди, институтни битирганидан кейин Мирзачўлга ишга тайинланди; бу ерда икки йилча ишлаганидан кейин район партия комитетининг масъул ходимларидан бирига тегди. Бу орада Тўтинисонинг эри қазо қилди, урушга кетган ўғли тўғрисида қора хат келди. Шундан кейин Қарима холаси билан Саидани ўз қаноти остига олди — Мирзачўлга кўчириб келди.

Йиллар ўтди. Саида ўн йилликни битириб, комсомол ишида кўзга кўриниб қолди.

Бир йили Қарима эри билан курортга борди ва бир экскурсия вақтида ўз она қишлоғидан келган икки киши билан танишиб қолди. Гапдан гап чиқиб, булардан бирни Қариманинг отаси қамоқ муддатини битириб келганини, Қорасув станциясида чўткачилик қилиб юрганини бундан икки йил бурун ўз кўзи билан кўрганини айтди. Бир томонда ўша қонли оқшом манзараси, бир томонда умрининг охирини гарибликда ўтказаётган бир мўйсафид оппоқ соқолини силкиллатиб, бирорларнинг оёғини чўткалашиб ўтириши Қариманинг кўз олдига келди-ю, ҳар нечук, фарзандлик туйғуси ғалаба қилди. Курорт ора йўлда қолди,— путёвканинг саккиз куни куйди,—эр-хотин қайтиб кетишди. Қарима Мирзачўлга тушмасдан тўғри Қорасувга ўтиб кетди.

Қарима Қорасув станциясига эрталаб соат тўққиздан ошганда тушди. Ў, юраги ҳовлиқиб, бир зумда перроннинг у бошидан бу бошига бир неча марта бориб келди, станция биносининг ичини, орқа томонларини, йўлнинг у юзидағи чойхона олди ва атрофини кўздан кечирди, яна перронга келди. Орадан уч соат чамаси вақт ўтди. Ниҳоят, перроннинг у бошидағи қари мажнунтол остидаги ташландиқ бир будка ёнидан елкасига қора сандиқча осган, қўлида курсича, новча киши чиқиб Қаримага томон келаверди. Ушал.. Фақат бир оз букчайған, узун соқоли

оқарган; устида ўзига кенг жигар ранг тужурка, тиззалири қора майдан ялтираган галифе шим, бошида эски пилотка, оёғида солдатча ботинка... Чол ерга қараганича, ғам-ғуссага тўла бир куйни хиргойи қилиб, Қариманинг олидан ўтиб кетди ва перроннинг ўртароқ өрига бориб, газета будкасининг ёнига курсичасини қўйди; ўтнриб, ўша куй мақомига тебрапиб сандиқчасини очди, чўтка-пўткасини олди. Карима берироқда туриб уни бир оз кузатмоқчи бўлган эди, сабри чидамади, тепасига борди. Чол бошини кўтармай, ҳамон ўша куйни хиргойи қилиб, куй мақомига иккала чўткаси билан сандигини чалди. Бу, афтидан, оёғингни сандиқчага қўй дегани эди. Карима бир оз энгашиб, титроқли товуш билан секин: «Дада!» деди. Чол худди ўқ теккан-у бу ўқ қай даража қалтис текканига зеҳн солаётгандай жим ва қимиirlамай қолди, кейин манглай оша Қаримага қаради-да, ранги бўзрайиб кетди, бирдан қизариб кетган кўзларини ёш пардаси қоплади. Карима энгашиб бир нима демоқчи бўлган эди, улгурмади — чол унинг оёғига ўзини ташлаб, ўкириб юборди. Карима уни дарров кўтариб олди. Унинг ҳам ич-ичидан хуруж қилиб келган йиги шиддат билан отилиб чиқадиган пайтда кўз олдига ўша машъум оқшом манзараси келди-ю, қалбидан чиққан совуқ бир тўлқин томогига тиқилган йифини суриб, ювиб кетди. У эсини ўнглаб, томошабин тўпламасин учун дадасига жеркиброқ «юринг» деди. Чол индамай унинг кетидан станция биносига кирди, поезд келадиган маҳалигача индамай, бир бурчакла ўтирди, индамай вагонга чиқди. Чол ўшандан бери шу ерда. У ҳеч кимга сўз қотмайди, бирор бир нимани сўраса ерга қараб қисқа жавоб беради, уй ишига қарашади, овқатини алоҳида ейди, кўчага камдан-кам чиқади, бўш вақтида мана шу арқон каратвотда деворга қараб чордона қуриб ўтиради-ю, товуш чиқармай, ўша ғамгин куй мақомига тебранаверади...

Орадан бир қанча вақт ўтиб, Қариманинг эри Беговот шаҳарига катта бир ишга тайин бўлди. Эр хотин кўчиб кетадиган бўлишди. Карима дадасини олиб кетмоқчи бўлган эди, чол кар ва соқов бўлиб олди — кўнмади.

Шундай қилиб Саида мана шу дадаси ва холаси Тўтинисо билан турар эди.

Тўтинисо, уйқу карахтлиги ёзилмаган бўлса ҳам, Саид

данинг кулай-кулай деб турган лабларидаги, ўйнаб турган кўзларидаги хурсандлик аломатини кўриб, бунинг сабабига қизиқди. Саида айтмади, гапни чалғитди, чунки «Мени савдойи даданг билан ташлаб кетасанми», деб йиғлайди деган хаёлга борди. Ётишди. Саиданинг уйқуси келмади, колхозга борса ишни нимадан бошлишини узоқ ўйлади, ниҳоят, қилинадиган ишларни ҳозирдан ёзив бориш керак, ишга тушиб кетгандан кейин ўйлагани вақт ҳам бўлмайди, баъзи нарсалар эсга ҳам келмайди деган фикрга келди; туриб чироқни ёқди, қалин дафтарини олиб ёзди:

«Бригада ва звено бошлиқлари билан суҳбатлар ўтказиш. Лекция масалалари. Агитаторлар билан суҳбат, Партия маорифи. Ижрони текшириш. Зулфиқоров масаласини тездан текшириб, чора кўриш...»

Саида уч-тўрт саҳифани тўлдириб, дафтарини ёстиқ остига тиқди ва чироқни ўчирди, ҳаял ўтмай яна турди, яна ёзди...

Тўтинисо эрталаб барвақт турди, қараса Саида ётган жойида дафтарига шошиб-пишиб бир нималар ёзаётиди, ёзаётган нарсаси жуда қизиқ бўлса керак, дамба-дам илжайиб қўяётиди. Саида холасининг зимдан кузатиб турганини кўриб қолди-ю, кулиб юборди.

— Нима, қизим, нима ёзаётисан? — деди Тўтинисо.

— Айтсан йиғлайсиз-да...

— У нима эканки сени кулдирар экан-у, мени йиғлатар экан?..

Саида дафтарини ёпиб, узун даромаддан кейин воқиани айтиб берди.

Бу замонда хотин-қизлар ўқиб олим бўлиши, ишлаб ҳурмат ва шуҳрат топиши, ишонч қозониб давлат арбоби, раҳбар ходим бўлиши фавқулодда бир нарса бўлмаса ҳам Саиданинг катта колхозга раҳбар бўлиб кетаётганилиги ўтмишнинг хотин-қизларга тўккан заҳрини татиган, буни ҳануз унутмаган Тўтинисо учун ғоят катта ҳодиса эди. У, қулоч ёзив, Саидани қучоқлади, юзидан, кўзидан ўпди.

— Наинки йиғласам, жон қизим!.. Мартабанг бундан ҳам улуғ бўлсин дейман!..

Саида суюниб кетди.

— Бир йил, ниҳояти бир йил ишлаб берар эмишман, холажон. Тез-тез келиб турман.

Икки кундан кейин райком бюросининг мажлиси бўл-

ди. Бюро олдидан Носиров Саида билан гаплашиб, унинг узил-кесил розилигини олди; кейин яна Қаландаров билан суҳбат қилди. Бу суҳбатда нима гаплар бўлганини Саида билолмади. Лекин Қаландаров кабинетдан ранги бўзариб чиқди-ю, Саидага тўнғиллаб:

— Мўртгина нарса экансиз, қийналиб қолмасмикинсиз?— деди.

Шу пайт қабулхонага қўшни «Социализм» колхозининг раиси — Қаландаровнинг қалин ошнаси Уммат Назаров кириб келди. Қаландаров Саидадан жавоб кутмай, Назаров билан сўрашди ва уни йўлакка олиб чиқиб ҳасрат қилди.

— Гижинглаган юигитлар турганда шу қизни секретарь қилиб юбораман деб ўтирибди! Қишлоқда одам қолмаса эчкининг оти мулла Норқўзи бўлади... Шу ҳам гапми!.. Одамнинг хўрлиги келади.

Назаров у ёқ-бу ёқа қаради, кўзларини ўйнатиб вахима билан шивирлади:

— Бу гапни менга айтдинг, ўртоқ, бошқа одамга оғзингдан чиқарма! Уят бўлади... Бу қизни аёл деб камситмагин. Ўқиган қиз. Сен-у мен ўз тошимизга бир ботмон бўлиб юрибмиз-да, бунинг тоши билан тортилсанк посангига ярамаймиз!

Эртасига Саида «Бўстон»га жўнади. Али бобо унинг чамадонини автобусга чиқариб берди ва автобус кўздан йўқолгунча қараб турди-да, кейин яна ўша куй мақомига қадаҳ ташлаб ҳовлига кириб кетди.

### ИИ

Қаландаров Носировнинг кабинетидан ранги бўзариб чиққани, Саидага дабдурустдан: «Мўртгина нарса экансиз, қийналиб қолмасмикинсиз» дегани, ундан жавоб ҳам кутмай Назаров билан чиқиб кетгани, демак, райкомнинг тавсиясидан норози эканини ҳатто яширишни ҳам лозим кўрмагани Саиданинг кўнглига ғашлик солиб қўйди. Саида бу ҳақда Носировга ўша оннинг ўзида гапираолмади, чунки унинг кўнглига «ҳалитдан шикоятми» деган гап келар деган андишага борди. Лекин бу гапни мавриди билан айтиб, Носировни хабардор қилиб қўйиш зарур әди. Саиданинг мўлжалича шундай маврид

колхозга кетадиган куни келиши, жўнаши олдида Носиров суҳбат ўтказиши, унга йўл-йўриқ кўрсатиши керак эди. Бироқ унинг кутгани бўлмади: автомат ручкасига сиёҳини тўлдириб, қалин дафтарини қўлтиғига қисиб кирганида Носиров ҳатто ўтири ҳам демади, ўриндан туриб хайрлашгани қўл берди, унга оқ йўл, ишда муваффақият тилади. Саида ҳайрон бўлди, бир қадар оғринди ҳам: «Наҳот секретарнинг, яна кекса ва тажрибали партия ходимининг раҳбарлик ишига кетаётган ёш, ҳали ҳеч нарсан қўрмаган коммунистга айтадиган бирон оғиз ҳам гапи бўлмаса!»

Саида, кўнглидаги бир ғашлик икки бўлиб, Қаландаров билан муносабат ва тажрибасизлиги ҳақида не-не кўнгилсиз ўй-хаёлларга бориб колхозга жўнади. Колхозга яқинлашган сайин унинг зеҳнида тажрибасизлик ваҳимаси чўкиб, Қаландаров билан ишлай олиш-олмаслик ваҳимаси юзага қалкӣ бошлади. Ҳақиқатан, Саида тажрибасиз бўлса тажриба ортдириши, хато қилса тузатиши, билмаса ўрганиши, демак, елиб-югуриб, қоқиниб-суриниб ишни олиб бориши мумкин, лекин Қаландаров рўйхуш бермайдиган бўлса-чи? Унинг устидан арз қилиш уни жазога тортдириш билан иш юришмайди; акси бўлиши, мураккаблашиб кетиши мумкин. Одам боласи циркнинг оти эмаски, қамчи қарсиллаганда чўккаласа...

Қаландаров ҳамон ўша кайфиятдами ё кейинчалик ўйлаб феълидан тушдими? Саида шуни билгиси, тезроқ билгиси келар эди.

Канал бўйидаги соя-салқин чойхона — автобус беката марказий газеталардан бирининг областдаги маҳсус мухбири Аъзамжон учраб қолди. Аъзамжон бир тўда студентнамо йигитлар билан кабоб еб ўтирган экан, Саидани даврага тортди. Эркаклар суҳбатида етилган қиз бўлса суҳбат аҳли ё сергап бўлади, ё индамас. Аъзамжон сергап бўладиган ва бунинг устига ғоят хушчақчақ йигитлардан эди. У бирпастда талай гап гапириб ташлади. Лекин бу гаплар сафсата ёки қизиқчиликдан-гина иборат эмас, унинг бутун областни қадамлаб кезганини, кўп колхозларни, улардаги одамларни яхши билганини, кўп раисларни жуда-жуда ўрганганини кўрсатар эди. У, Саиданинг «Бўйстон»га кетаётганини эшишиб, Қаландаров тўғрисида гапирди, унинг милиционер билан қилган можаросини жуда қизиқ қилиб ҳикоя қилди:

Қаландаров мундайроқ меҳмон келса юурдагига «Эшон!» дер экан, бу «иккита нон билан бир чойнак чой олиб кел» дегани, «хой, Эшон» деса ош буюргани, «Эшон хой» дегани эса «ҳовлига бориб хотинимга айт, нозик меҳмон олиб бораман» дегани бўлар экан.

Саида Аъзамжоннинг Қаландаров ҳақидаги гаплари-га ичидаго ғоҳ кулиб, рўпара бўлганида Қаландаров юурдагини нима деб чақириши тўғрисида гөҳ ташвиш тортиб колхозга етганини ҳам билмай қолди. У, автобусдан тушиб, оғир чамадонини кўтариб, қийшайганича, колхоз боғининг темир дарвозасидан кирганида, эллик қадамча нари каттакон сада остидаги сўрида фёғини саланглатиб ўтирган Қаландаровни кўрди. Қаландаров уни кўриб илжайди-ю ўрнидан қимирламади, узун фёқларини қаттиқроқ саланглатди. «Дийдоринг қурсин,— деди Саида ичидаги,— ўзимни иззат қилмассанг, аёллигим ҳурмати, чамадонни қўлимдан олсанг ўласанми!..» Саида келиб чамадонини икки қўллаб кўтариб сўрига қўйганидан кейин Қаландаров сўрашгани қўл узатди.

— Келинг... Қийналмай келдингизми?

— Раҳмат...

Шу билан гап тамом бўлди. Саида жуда ноқулай аҳволда қолди. Анчадан кейин Қаландаров, худди ўзича гапиргандай, деди:

— Колхозда айшингизни қилиб юра берасиз. Партия ташкилотининг секретарига иш йўқ дейишлик мумкин. Пахта ҳар йили юз! Пилла юз! Оқсаган тармоғимиз йўқ дейишлик мумкин. Ўзингиз ҳам билсангиз керак?

Саида нима дейишини билмай қолди. Қаландаровнинг бу гапларидан: «Сен эмас, сендан дурустроқ секретарга ҳам муҳтоҷ эмасман», деган маъно чиқар эди. Бирпас жимликтан кейин Қаландаров гулзорнинг нариги томонидаги идорага қараб:

— Эшон ҳой!— деб қичқирди.

Саиданинг кўнгли бир оз ёришди: Мухбирнинг айтгани рост бўлса, демак мен «нозик меҳмон бўлсанмекарак...» деган ўйга борди.

Икки қаватли идора биносининг ўнг қанотига тақаб солинган баланд ёзги қизил чойхона зинасидан чаманда гул дўппи, оқ шойи кўйлак ва шим кийган бир бола югуриб тушди ва чопқиллаганича Қаландаровнинг олдига келиб қўл қовуштириди. Эшон бола эмас. ёши элликдан

ошган кўса экан. Унинг бўйни тошбақанинг бўйни эслатар, юзи сўриб ташланган ҳусайнини узумга ўхшар, лекин бир томонга силлиқ қилиб тараган сочи оёғидаги амиркон туфлисидан ҳам қорароқ ва кўпроқ ялтиради.

— Мана бу чамадонни ҳужрага киртиб қўйгин...  
Ҳужрани ясатганимисан?

Эшон чамадонни силтаб елкасига олди.

— Ясатганиман, бек ака.

— Сурат-пурат қоққаннимисан?

— Қоққанман, бек ака.

Қаландаров Саидага қаради.

— Ўйингизни кўриб чиқасизми...

— Майли...

Эшон Саидани қийғос пишган олчалар орасидан оқаришиб кўринган бинога томон бошлаб борди; чамадонни ҳужранинг остонасига қўйиб, юрганича қайтиб кетди.

Қаландаров юргардагини «Эшон ҳой!» деб чақирганда Саида қанчалик хурсанд бўлган бўлса, ҳужрани кўриб шунчалик таъби тирриқ бўлди: полсиз, қоронғи, супурги билан оқланган, зах ҳиди анқиб турган бир кулба. Унинг бутун жиҳози шол кўрпа тўшалган оддий темир каравот, устига алланияма тўкилиб қотиб қолган қўпол стол, иккита табуретка; деворларига қоқилган «Сурат-пурат» каттакон безгак пашша, ғўзани нобуд қиладиган ҳар хил ҳашаротлар, зотли чўчқа тасвири сингари турли плакатлардан иборат эди.

Саида келтирган бисотини чамадонидан олиб, столни, каравотни безаган бўлди, деразага ҳозирча газета тутиб қўйди, ташқарига чиқиб ювениб келди, кийинди... Шу чоқ эшик худди мушук таталагандай тиқирлади-да, секин очилиб, эшоннинг калласи кўринди. Раис Саидани айтди-риб юборибди.

Саида боргандага раис ҳамон ўшандай, сўрида оёғини осилтириб, навбатма-навбат гапираётган икки кишининг сўзига диққат билан қулоқ солиб ўтиради. У, ҳаёли шуларда бўлса керак, Саидага қаради-ю кўрмади, анчадан кейин пайқаб, Эшонга «сизлар бораверинглар, мен ҳозир...» деди. Эшон Саидани бошлади.

Дарвозадан чиқиб катта йўлдан бир оз юрилгач, чап томондаги толзор кўчага бурилиши. Жим кетавериш ноқулай бўлганлигидан, Саида Эшондан:

— Сиз колхозда нима иш қиласиз? — деб сўради.  
Эшон анчадан кейин, худди хумга йўталгандай дўнг-  
ғиллаб жавоб берди:  
— Старший чойхончик!

Савол унга малол келганини кўриб, Саида ичида:  
«Мунча ҳам тўнг, мунча ҳам сўхтаси совуқ одам экан»  
деди-ю бўлак сўз қотмади. Эшон кўчанинг охиридаги ба-  
ланд дарвозага ўрнатилган эшикка бошлади.

Қаландаровнинг ҳовлиси каттагина экан. Бир томон-  
да унча дид билан солинмаган бўлса ҳам, каттагина имо-  
рат, сиркор айвон; унинг рўпарасида ҳовуз, чоғроқ ший-  
пон, сим тортиб кўтарилиган ток, боғча-полиз... Лекин  
буларнинг ҳаммаси ҳовли эгасининг ҳаваси зўр-у ҳаф-  
сала ва диди йўқлигини кўрсатиб турар эди: токнинг бир  
неча новдаси симга ўз ҳолича тармашибди-ю, қолгани  
ерда ётибди; мева дараҳтларининг остини, полизни шўра  
ва ғумай босиб кетибди; ҳовузнинг ўртасида аллақанаقا  
қофоз яшик ярмигача сувга ботиб қийшайиб ётибди ва  
шапканинг гардиши, фанер парчаси сузиб юрибди; ший-  
пон қачондир бир бўялган экан, ҳозир бўёқдан асар қо-  
либди, холос; айвоннинг зинаси олдида синиқ хум ағнаб,  
каттакон қадоқтош занг босиб ётибди...

Эшон устма-уст йўталди. Рўпарада тандирга ўт ёқа-  
ётган новча, кўк рўмолини томоғидан боғлаб олган бир  
кампир Саидага қараб, «келинг» деди-ю яна ишини қила  
берди. Айвонга очиладиган икки эшикнинг биридан хон-  
атлас кўйлак кийган, жуда семиз, бағбақалари осилган,  
қип-қизил юзи ялтираб турган, афтидан ёшини белгилаб  
бўлмайдиган бир хотин чиқди. У, меҳмон кутишда айти-  
ладиган бир дунё гапни тез-тез ва бир нафас билан тўкиб  
ташлади-ю, Саидани ичкарига таклиф қилди. Саида ичка-  
рига қадам қўйди ва оёқ остидаги қип-қизил гиламни кў-  
риб, туфлисини ечди. Тузалган хонтахта ёнида, афтидан,  
меҳмонни қаршилаб турган барваста, сариқ, бурма кўй-  
лак, устидан бир талай орден тақилган жигар ранг ко-  
стюм кийган қирғиз башара бир аёл Саида билан сўраш-  
ди ва қўлини қўйиб юбормай тўрга — атлас кўрпа-  
чага йўллади. Саида бу хотинни қаердадир кўргандай  
бўлди.

— Танишиб қўйинглар, Тожихон,— деди мезбон,— бу  
киши райондан... бизга ишга келдилар...

— Бу кишини яхши биламан,— деди Тожихон қўл бе-  
риб.

— Бу киши «Социализм» колхозининг донгдор бригадирларидан Тожихон Жаъфарова. Неча орденли? Бир икки, уч...

Тожихон кулди.

— Сиққанича тақиб, қолганини рўмолчага туғиб олганман, Ҳуринисо ғпа,— деди Тожихон, дарҳақиқат, ёстиқнинг устида турган туқунчани кўрсатди.— Ўзаро текширишга борган эдик, бор бисотингни тақиб ол дейишди...

Хўп кулишди.

Ҳуринисо ичкари уйга кириб кетди. Икки меҳмон бирбирига қараб жилмайшиб, яна ҳол-аҳвол сўрашди. Саида у ёқ-бу ёққа кўз ташлади. Уй ҳам ҳавас, ҳафсалана вадид борасида ҳовлини эслатар эди: деразаларга ин билан осилган оқ крепдешин пардалар салқи; деразанинг чап томонига қўйилган чиройли ёзув столи устида каттакон сариқ самовар, жўмрагига ранг-баранг қофоз гуллартиқилган бир талай чойнак, қөпқоғи тоб ташлаган қизил патефон; столга тираб қўйилган қиммат баҳо триляж, унинг иссиқ чойнак излари қолган томбасида керосин лампа, чақилган гугурт чўплари, каттакон қизил совун... Саида ичида: «Қаландаровнинг ҳаваси зўр-у лекин хотинининг ҳафсаласи, табиати мундайроқ экан» деб қўйди.

Мезбон ичкари уйдан бир вазада конфет олиб чиқди, Саида бу чоқ қарши девордаги суратларни — Қаландаровнинг орден ва медаллар тақиб олдирган портретини бўйни ингичка, калласи катта, шалпон қулоқ бир боланинг кузларини катта очиб ва лабларини қимтиб тушган расмини кўздан кечирмоқда эди. Мезбон гап бўлмаганда гап бўлсин деб изоҳ берди:

— Арслонбек акангизнинг пахтакорлар қурултойида олдирган сурати. Униси Козимбек, менинг ўғлим, болалигидаги сурати, бу йил медицина институтини битирди, ўзимизнинг колхозда врач... отпуска қилиб Москвага кетди.

Врач деганда Саиданинг кўз олдига, негадир, капкатта киши келди.

— Врач? Үғлингиз шунаقا каттами? Ешсиз-ку!...

— О...— деди мезбон Саидага ўз сўзини исбот қилиш учун далиллар кўрсатишни хоҳлаб,— қариб қолдик! Ба-бушка бўлиб қолдик! Қани, сомсадан олинглар...

Баҳтга қарши Саида унинг хоҳишини пайқамади.

— Ҳадемай невара кўраман,— деди мезбон гапни айлантириб.

— Вой, Ҳуринисо опа, келин қилдингизми?— деди Тожихон.

— Энди! Козимбек кўнмаётибди-ку, лекин барибир, кузда тўй қиласиз. Билмадим, ростми-ёлғонми, Москва-га бориб ўқийман дейди. Унинг гапига ким қулоқ солар эди, кузда бўйнидан сиқиб, чимилидиққа киргизиб қўйганимни ўзи ҳам билмай қолади. Шундай қизни қўлдан чиқариб тентак бўлибманми!..

— Келин қаердан?— деди Тожихон.

— Келин ўзимиздан чиқди,— деди Ҳуринисо ташқа-рига ишора қилиб.— Кифоятхоннинг қизи! Манзурахон! Тошкентда ўқийди. Сухсурдай қиз! Бир-бирига хўп муносиб!.. Ҳа, айтгандай, эсим қурсин, сўрамабман... эринг дурустми? Кўп куйдирмайдими?

Тожихон Саидага кўз қирини ташлаб бир оз қизарди-ю, хижолатликни кулги билан енгмоқчи бўлди.

— Куйдирмаган эр эрми, опажон!— деди қаҳ-қаҳ уриб, лекин чин кўнгилдан чиқмаган бу қаҳқаҳани маъюслик дарров босди.— Сут билан кирган... Яқинда бир авж қилди. Иккинчи май куни меҳмон чақирган эдик. Чарчадим. Самовар қайнаб турган эди, «Битта чой дамланг» деган гап оғзимдан чиқиб кетибди. Балога қолдим: «Мен бригадантга аъзо эмасман, катталигингни аъзоларингга қил!..» Қани энди гап уқтириб бўлса! Чойнакни ерга урди, самоварни тепиб юборди, пешона-сига муштлади, бошини сўрининг поясига уриб қонатди...

Саида бу ҳодисага тушунолмади.

— Нега, нега унақа қиладилар?— деди, бўш пиёлани Ҳуринисога узатиб.

— Эшитган одам ишонмайди: мен нима десам, нима қилсан бригадир бўлгани учун шундоқ деяпти, бригадир бўлгани учун шундай қиляпти, менга зарбини ўтказмоқчи, мени оёқ ости қилмоқчи, деб ўйлайди. Мен билан бир жойга бормайди, ўзим борсам ғаши келади, бир баҳона топиб фурбат бошлайди. Илгари урар эди, энди ё ўзини уради, ё овқат емайди; баъзан идиш-товоқ синдиради, аразлаб Шўр қишлоққа — аммасиникига кетиб қолади. Мен дарров бориб келаман: ишга чиқмаса сир очилади!

— Ўзлари нима иш қиладилар?— деди Саида.

— Колхозда ҳисобчи... икки бола кўрдик. Болаларимизнинг каттаси ўн олтига қадам қўйди. Шунча йилдан бери аҳвол шу. Тўғри, авваллари, колхозда звено бошлиғи бўлган вақтларимда эрим яхши эди. Бригадир бўлдиму балога қолдим. Баъзан жуда хафа бўлиб кетаман, «Бор-э!» дегим келади-ю, тағин минг андишага бораман: эл оғзиға элак тутиб бўлмайди, «ордени кўпайиб эрини ташлади», дейди...

— Мен ўқитган жувонларнинг ҳаммаси ҳам кам бўлгани йўқ!— деди Ҳуринисо керилиб.— Тожихонни кечки мактабда ўқитганман!

— Шунақами?— деди Саида таажжубланиб ва ҳозир бирон иш қилишига, иш қила олишига кўзи етмаса ҳам, ҳарқалай, сўради,— ҳозир ҳам ўқитасизми?

Ҳуринисо бу саволни эшитмаган бўлди.

— Ҳаммаси ҳам униб ўси: бири колхоз раиси, бири район маданият бўлимининг бошлиғи, бири депутат... Ҳа, айтгандай, қайси куни Ҳожар келган эди, қаҳрамон бўлишига ўттиз бир тонна етмабди.

Ҳуринисонинг бу аёллар ҳақидаги гапларидан «Мен ўқитган аёллар мана шунаقا мартабаларга эришди» деган ифтихордан кўра кўпроқ, «барибир, ҳаммасидан яна ўзим ақилли, ўзим доно» деган бир ғуур акс этар эди. Бу аёл, афтидан, ўша аёлларга ҳасад қилганини, бир вақтлар жамиятда бевосита тутган ўрнини йўқотиб қўйгани учун қиласидан афсус-надоматини ўзидан ҳам, ўзгадан ҳам яшириб, шу ғуур остига кўмар эди. У мана шу ақлинини, донолигини кўрсатиш учун мавзудан мавзуга кўчар, илмдан, санъатдан, сиёсатдан, колхоз хўжалиги ҳаётидан қулоғига кириб қолган гаплар ҳақида ўзича муҳокама юргизиб, пала-партиш, баъзан ҳеч қовушмайдиган фикрлар айтар, эрини ўлардай гўл подшоҳ, ўзини ниҳоятда қув вазир қилиб кўрсатишга ҳаракат қилар эди.

Қаландаров келди. Ҳуринисо эри ҳақида айтганларини амалда кўрсатмоқчи, яна «шундай одам ҳам менга бўйин эгади», демоқчи бўлди шекилли, уни ғазабига олди:

— Келар эдингиз-да... Шу ҳам ишми! Ҳамиша шунақа қиласиз!. Қачон ташлайсиз шу феълингизни?!— деб шовқин солди.

Қаландаров ҳазилга олди.

— Ташлаш керак бўлган феълим кўп, хўжайин!

туядан «нега бўйнинг эгри» деб сўралса, «қаерим тўғри» деган экан... Зерикмай ўтирибсизларми, меҳмонлар...

Қаландаров пойгакка чўкка тушиб, бир қўшоқ сомса билан икки пиёла чой ичди-ю, меҳмонлардан узр сўради:

— Айбга буюрмайсизлар, меҳмонлар, менинг идорада яна бирон соатлик ишим бор. Хўжайнин, кун қайтди, шийпонга жой қилдирсангиз...

— Қифоятхоннинг қўли тегмайди, Эшонни юборинг!— деди Ҳуринисо бошқа гап сиғмайдиган бир оҳангда.

Қаландаров кетди.

Ҳуринисонинг эрига қилган муомаласидан уйда нечукдир, кўнгилсиз бир ғубор қолди.

Бир оздан кейин Тожихон кетгани ижозат сўради ва Ҳуринисонинг қисташига қарамай ўрнидан турди. Тожихон сафардан икки кун кечикиб қайтибди, шунинг учун бригадасидан кўнгли ҳеч тинчмаётган экан, йўқса Саида билан бир гаплашишга муштоқ эканини қайта-қайта айтиб, уни уйига таклиф қилди. Саида боришга ваъда берди. Уни кузатиб чиқишиди.

Тожихон оёғи узангига тегиши билан ўзини эгарга олиб, отга қамчи босди.

Ҳуринисо билан Саида қайтиб ҳовлига киришиди.

Шийпонга жой қилинди. Бу ердан ҳовлининг, боғча ва полизнинг қаровсизлиги яна ҳам яққолроқ, яна ҳам хунукроқ кўринар, бунинг ҳаммасига одамнинг ичи ачир, ғаши келар эди.

Ҳуринисо дастурхон устида ғувиллаб, ўзини қанд-қурсга ураётган пашшаларни гажимли шоҳи елпифич билан қўриб, дам-бадам «Саидахон, дастурхонга қараб ўтирангиз-чи!» деб қистаб, яна ўтмишдаги хизматларидан, «Қаландаровни Қаландаров қилгунча она сути оғизига келган»лиги тўғрисида гап очди.

Саида унинг ўтмишда Тожихон сингари бир қанча қиз-жувонларнинг бир оз ўқиб олишига сабаб бўлганидан ташқари яна нима ишлар қилганига, хусусан, Қаландаровга қандай ёрдамлар кўрсатганига жуда қизиқди. Бироқ, Ҳуринисо ўша «Хўжум» йиллари паранжида қатнаб, хотин-қизлар учун очилган саводсизликни битириш курсини тутгатгани ва ўша курсда бир йилдан ортиқ ўқитувчилик қилганидан бошқа янги гап айтмади. Қаландаров тўғрисига келганда эса, мавзудан чиқиб

кетди. Ўша йили кузакда унга бирдан икки киши совчи қўйибди: бири — қишлоқ активларидан шу Қаландаров, иккинчиси — Асад бойвачча деган мол-дунёлик бир киши экан. Ҳуринисонинг ота-онаси Асад бойваччага розилик бериб, оғиз бойлар бўладиган кунлари Қаландаров бир нима қилибди-ю ишни бузибди, бир ҳафтанинг ичидаги расм-русларни жойига қўйиб, Ҳуринисони никоҳлаб олибди. Ҳанг-манг бўлиб қолган Асад бойвачча эс-ҳушини ўнглаб олганидан кейин қон тўкишга онт ичидаги кечаси Қаландаровнинг уйига келибди, лекин унга рўпара бўлишдан ҳайиқиб, эшагининг қорнига пичоқ уриб кетибди...

Саида гапни ҳарчанд айлантирса ҳам Ҳуринисони асл мавзуга яқинлаштиrolмади. Лекин, ҳарқалай, жуда кўп гап орасида баногоҳ йилт этиб қолган баъзи сўзлар Ҳуринисо Қаландаровни юқорига тортганини эмас, Қаландаров уни аста-секин пастига босиб келганини кўрсатар эди.

Тўйдан кейин Ҳуринисо яна бир ярим йилга яқин чала-чулпа ўқитувчилик қилибди. Қаландаров колхозда бригадирликка тайин қилинганидан кейин Ҳуринисони ўз бригадасига кирадиган ипакчилик звеносига бошлиқ қилдирибди. Булар Мирзачўлга кўчиб келишганда ҳам Қаландаров «Ворошилов» колхозида бригадир, Ҳуринисо ипакчилик звеносининг бошлиғи бўлган экан. Қаландаров колхозга раис бўлганидан кейин Ҳуринисони девор қўшни болалар боғчасига мудир қилиб тайинлабди. Ҳуринисо бу ерда, «Бўстон» колхозида ҳам боғча мудири, лекин боғча ҳовлига узоқроқ бўлгани учун шу Кифоятхонни ўзига ўринбосар қилиб олибди. Ҳуринисо вақт-соати билан бошқа дурустроқ ишга ўтмоқчи бўлгани учун бу вазифага вақтинча деб қарап, боғчага фақат ўша томонга йўли тушгандагина бирров кириб чиқар, ҳамма ишни Қифоятхоннинг ўзи қилиб, ойликни ҳам ўзи олар экан. Шу билан бирга Қифоятхоннинг кўпроқ вақти раиснинг хизматида ўтадиганга ўхшар эди. Ҳуринисо Қифоятхонни ўринбосар қилиб олганига қанча вақт бўлганини ҳисоблаб ҳайрон қолди:

— Вой ўлай, шунга дарров ўн йил бўлибдими!— деди.

Ҳуринисо яна тўй, келини Манзурахон, унинг ҳусн-жамоли тўғрисида гапирди:

— Оқи оқ, қизили қизил! Қошлари қундуздай! Кўча-

га чиқса ҳамманинг кўзи ўшанда. Бир куни бозорга бориб узум олмоқчи бўлган экан, узумфуруш анграйиб, тарозиси қўлидан тушиб кетибди. Кула-кула ўлибмиз... Буни Қифоятхоннинг ўзи боплаб айтади. Лекин Манзурахон баҳти бор қиз экан—Қозимбекнинг қўлига тушган қизни қулоғигача баҳтга ботди дея беринг. Шундай ақлли, шундай қобил, шундай беозор... Шу ёшигача бирорни сен деганини билмайман. Шундай йигит яхши кўрган хотинига қандай бўлса экан! Бу нарса хотин киши учун катта гап. Хотинига мушукдай ишқаланиб турса қандоғ-у, ҳадеганда биқинига муштлаб турса қандоқ! Эрдан калтак еганингда ҳам жонинг оғрийди, ҳам дилинг... Мен буни яхши биламан. Арслонбек акангиз вақтида мени хўп урган. Лекин ҳозир эсига тушса хижолат бўлади. Колхоз раиси бўлганидан бери битта чертгани йўқ, чертиш у ёқда турсин, қўлимни совуқ сувга урдирмайди, «хўжайин» деб туради. Ўзи умрида курортнинг юзини кўрган эмас, мени ҳар йили одам қўшиб курортга юборади. Бу йил бормайман, докторлар дам олинг дейишаётиби.

Қаландаров қош қорайганда Эшон билан бирга келди. Маълум бўлишича, Эшон Қифоятхоннинг эри—раисга бўлажак қуда экан. Эшон Саида кундузи кўрган одамга сира ўхшамас эди: раиснинг олдида пилдираб, икки гапнинг бирида уни кулдириб, оёқ учиде елиб-югуриб бирпасда бутун ҳовлига, шийпонга файз киргизди; хонтахтани турли-туман кўкат, ўзи келтирган ва хотини Қифоятхон пиширган закускалар билан безади, пакирдан учи чиқиб турган шишалардан иккитасини очди, чироққа солиб ҳафсала билан артган рюмкаларига вино, конъяк қуиди. Қаландаров шишани унинг қўлидан олиб, қиррали стаканга конъяк тўлдирди-да, узатиб:

— Ма, волиданг келгунча ютиб ол, кейин биз билан майда қиласан!— деди.

— Унақа деманг!— деди Ҳуринисо эрига хўмрайиб, кейин Саидага изоҳ берди.— Қифоятхон бу кишидан учтўрт ёш каттароқ...

Эшон чинчалоги билан Қаландаровнинг билагига секин уриб конъякни олди-да, битта кўтарди ва раисни кулдириш учун закуска қилмади, «Конъякка ҳам закусками» деди; кейин қулупнайдан бир ҳовуҷ олиб оғзига солди. Раис унинг тилини қичитиш учун «қулупнайнини

ҳовучлаб ейдими киши!» деган эди, Эшон: «Тарелкаси билан оғзимга сиғмайди», деб яна кулдирди.

Қаландаров Қифоятхонни дастурхонга чақирди. Қифоятхон кўк рўмолини томоғининг тагидан қайта боғлаб, ёш қиздай уяла-уяла зинадан чиқиб келди ва қилпиллаганнамо бир ҳаракат билан пойгакка ўтириди. Унинг ўйнаб турган кўзлари бир лаҳзада хонтахтадаги турли закуска, шириналик, кўкат қўйилган тарелка ва ликопчаларни, вино тўлдирилган рюмкаларни, Эшоннинг олдида турган шишаларни кезиб чиқди; ер остидан Қаландаровнинг юзига, Саиданинг билагидаги соатга, кўкрагидаги тўғноғичга тушди. Саида раиснинг бўлажак келини Манзурахонни кўз олдига келтириш учун Қифоятхонга зимдан разм солди. Унинг жағи кенг, кўк томирлари бўртиб турган икки чаккаси ичкарига ботган, пешонаси ковушнинг бетига, йўқ, умуман, юзи мардона ковушга ўхшар эди. «Хунук хотинларнинг хунуқлигини аксари бошқа фазилатлари кўмиб кетади, сухбати ширин бўлади» деган ақидада Саида уни гапга солмоқчи бўлди, боғча, болалар ҳақида бир қанча саволлар берди. Бироқ Қифоятхон бу саволларнинг биронтасига ҳам жавоб бермади; ҳар сафар бошини қўйи солиб, илжайиб эрка ўсган қиз боладай эркаланиб — қийшанглаб, кўз қири билан Ҳуринисога қаради, ниҳоят, бир нимани баҳона қилиб, пастга тушиб кетди.

Қаландаров рюмкани қўлига олди.

— Қани, Саидахон, ичайлик... Сизнинг пойқадами-нгиз учун... — деди ва рюмкасини кўтариб бўлгач, Ҳуринисонинг олдидағи тўла турган рюмкани кўриб қолди.— Ие, ичмабсиз-ку!

Ҳуринисо шу қилмиши билан меҳмон олдида ўзининг маданиятсизлигини кўрсатиб қўйгандай, Қаландаров қаттиқ хижолат тортиди ва рюмкани олиб хотинининг қўлига берди. Ҳуринисо рюмкани икки марта лабига тегизиб, икки марта қайтарди. Унинг ичмаётганини кўриб, Саида:

— Кўнглингиз тортмаса қўя қолинг,— деган эди, Ҳуринисо эрига қаради. Қаландаров Саиданинг гапини эшитмади, ё ўзини эшитмаганга солди. Эридан тезда тайинлик бир ишора бўлмагандан кейин Ҳуринисо винони ичди, лекин ит азобида ичди. Саида буни пайқади ва бунга эътибор қилди.

Биринчи рюмкадан кейин, одатдагича, ҳамма жим

бўлиб қолди. Қаландаров шу жимликни бузиш мақсадида, бошқа гап бўлмади шекилли:

— Бизнинг Эшон кабобпазларнинг пири, ошпазларнинг отахони, дуторни эзади, ашулани қияди...— деди.

— Лағмон-чи, лағмон,— деди Эшон бўшаган рюмкаларга вино ва коňяк қуяр экан,— лағмонга айниқса ўртоқ Қодиров қойил әдилар. Ўзлари ҳам зап секретарь әдилар-да, а, Бек ака!..

Сўз район партия комитетининг собиқ секретари Қодиров ҳақида борар эди. Қаландаров «эсимга солма!» деган маънода бош чайқаб:

— Қани, дуторни ол!— деди.

Эшон шиййоннинг устунида осиғлиқ турган садафкорли дуторни уч бармоғи билан кўтариб олди, торини тишининг кири билан хўп артиб созлади ва машқ бошлиди. Унинг дутор чалиши унча-мунча дутор машқ қилиб юрадиган Саидага манзур бўлди: Эшон дуторнинг қорнига бармоқларини тегизмай, торига зўр келтирмай товушини жуда тиниқ чиқарар эди.

Эшон иккита машқ қилиб, битта ашула айтди. Унинг овози ҳам ширали эди. Қаландаров машқ ва ашуладан мамнун бўлди, афтидан, уни яна гапиртириб кулгиси келди.

— Бизнинг Эшон мана шунаقا... Лекин иккита айби бор: бирламчи, худо бўйдан, жуссадан берган эмас; хотини билан подручка қилиб кетаётганида орқасидан кўрган киши Эшонни Кифоятхонга осиб қўйибди дейди.

Эшон «жуда ўткир гап бўлди» деган маънода бош чайқаб қотиб-қотиб кулди. Ҳуринисо «бировнинг олдида қудамизни калака қилма» демоқчи бўлиб эрига хўмрайди. Лекин Қаландаров бунга эътибор қилмади.

— Иккиламчи, хотинидан кўп калтак ейди,— деди ва ўзи билса ҳам яна сўради,— менга қара, кўпроқ нима учун уради?

— Рашки ёмон! Кўнгли эгри! деди Эшон.— Ўн йиллик ўликдан-у, ҳали туғилмаган чиқалоқдан раشك қilmайди, холос!

Хижолат бўлиб ўтирган Ҳуринисо эрини тиёлмагандан кейин Саидага юзланиб:

— Маҳовот, ҳазил... Кифоятхон урмайди, лекин жаҳли тезлиги рост,— деган эди, Эшон уни шарманда қилди:

— Қайси йили Шоҳимардондан қайтишда Фарғонада меҳмонхонага тушдик, шунда тепиб зинадан юмалатиб юборган эди, пе! Ўшанда қаншарим ёрилган эди, мана...— деб қаншарини кўрсатди ва Саидага юзланиб шикоят тарзида давом этди,— мен ҳам урай десам, қонунга тўғри келмайди; устидан арз қиласай десам, бу замонда хотин киши одам ўлдирса ҳам... одам ўлдирган хотин эмас, ўлик жавобгар бўлади. Дастидан қочиб кетай десам... бир қочиб кетган эдим, Намангандан топиб, гирибонимдан сиқиб олиб келди!..

— Шунаقا экан, нега олдинг шу хотинни?— деди Қаландаров.— Ҳа, айтгандай, ҳамма иллат отамда деган эдинг. Отанг нима деб васият қилган?

Эшон олдида турган рюмкани битта отди ва оғзини қўлининг орқаси билган артди, закуска қилмасдан тўпписининг ичини ҳидлади.

— Отам... қозиқнинг учи ҳам бўлма, боши ҳам бўлма, ўртаси бўл; учи бўлсанг ерга кирасан, боши бўлсанг тўқмоқ ейсан деганлар.

— Ҳақиқатан тўғри!— деди Ҳуринисо қудасининг гапига жуда катта маъно берган бўлиб.

Қаландаров қозиқ тўғрисидаги гапни бир неча марта эшитган бўлса ҳам, яна завқ қилиб кулди ва Ҳуринисонинг имо-ишорасига эътибор қилмай, Саидага Эшоннинг саргузаштини гапириб берди.

Эшон отасининг васиятига амал қилиб тўрдан жой тегмайдиган, пойгакда чой тегмайдиган бир одам бўлиб етишибди, узоқ вақт ҳаётда йўлини тополмай юрибди: ниҳоят шундай бўлибдики, бутун умидини оладиган хотинига боғлабди: бирон уйлик-жойлик хотин бўлса, рўзгори, бисоти бўлса... Эшон, нияти холис экан, ўттиз икки ёшида шундай хотинга, яъни мана шу Кифоятхонга учрабди. Кифоятхон ҳам савдогар эридан қолган ҳовличанинг деворини баланд олдириб, рўзгорига гард қўндирамай, мўмингина бир эрнинг кўйида ўсма қўйиб, сурма тортиб юрган экан, ўзидан беш ёш кичик, қиз олмаган йигит — Эшонни дарров ичкуёв қилиб олибди ва ўша йили туғиб берибди. Бу вақтларда Эшон артист бўлиб, театрда ойлигига яраша деб фақат доира чалар, дуторчи ва ашулачиликдан иборат икки ҳунарини эса «отар» дагина кўрсатар экан. Театр дирекцияси буни билиб, Эшонни ишдан бўшатган кунларда Қаландаров уни бир ошнасининг тўйида кўриб қолибди-ю, ашула ва қизиқ-

чилиги манзур бўлиб, колхозга ишга таклиф қилибди. Эр-хотин маслаҳат қилиб, номи чиққан раиснинг қаноти остида «бир нима бўлиш»га кўзлари етгани учун унинг таклифини қабул қилишибди ва бир ойга қолмасдан ҳовлини сотиб «Бўстон» га кўчиб келишибди, раиснинг ёрдами билан дарров уй-жой қилиб олишибди. Шундан бери Кифоятхон Ҳуринисонинг тутинган опаси, Эшон эса, ўзи айтмоқчи старший чойхоначиликдан ташқари раиснинг югурдаги, кабобпаз ва ошпази, ашулачиси, қизиқчиси, улфати, ходмигари, агенти, миrzаси экан.

Ҳуринисо эрининг сўзи давомида унинг баъзи қаттиқ ибораларини юмшатиб, хатоларини тузатган бўлиб турди-ю, сўз Манзурахон тўғрисида кетганди эрини буткул нодонга чиқарадиган луқмалар ташлай бошлади. Манзурахоннинг ўз оиласига муносабати масаласида эса эрхотин тортишиб қолди. Қаландаров қизни болалигидан жуда ақлли бўлганини айтиб, шундай оиладан шундай тарбияли қиз чиққанига ҳайрон қолар эди.

— Шу ерда ўқиб юрганида ҳам кўпроқ умрини мактабда, ёзда лагерларда, пионерлар орасида ўтказар эди. Тошкентда ўқиётганига ҳам анча бўлди. Қаникулга келган вақтларида ҳам бирон ҳафта турганини билмайман, дарров кетиб қолади.

Ҳуринисо ўз келинининг оиласини бировнинг олдида, яна қудаси ўтирган вақтда ер билан яксон қилаётган эрининг нодонлигидан куйиб-пишиб, Манзурахон кўпроқ умрини мактабда ўтказганига, каникул вақтларида ҳам ота-онасининг олдида кўп турмаганига сабаб бу оиладан жиркангани эмас, илмга берилиб кетгани эканини исбот қилишга урина кетди. Жиндаккина бўлса ҳам кайф, қудалари ҳақида эри гапирган ножӯя гапларни пучга чиқариш зарурати, ниҳоят, эридан устун турганлиги ҳақида Саидага айтган гапларини исбот қилиш хоҳиши Ҳуринисонинг жағини очиб юборди.

Ҳуринисо гапираётган гапларнинг ичида тўғриси ҳам бор, кўпи ўзининг йўқлиги, ҳатто пучлиги билан кишининг қулгисини қистатар эди. Қаландаров унинг оғзидан бунаقا гапларни, эҳтимол, жуда кўп эшиятган ва ҳар сафар сарагини олиб, пучагини қулоги ёнидан ўтказа берган ва шунга ўрганиб қолган бўлса. Бироқ ҳозир, бегона одам олдида, яна колхоз партия ташкилотининг секретари бўладиган одамнинг — ёш бир қизнинг олдида бу гапларнинг пучаги уни хижолатга қўймоқда эди. Қалан-

даров сўз мавзунини янгилашга икки-уч марта уринди, бироқ Ҳуринисо буни эрининг енгилгани аломати деб билиб яна авжига чиқди. Ниҳоят, Қаландаров ғаши келганини билдириласлик учун кулиб:

— Хўжайин, меҳмонга ҳам сўз берамизми, йўқми?— деди.

Ҳуринисо насихат йўсинига ўтди:

— Гапни орқа-олдингизга қараб гапиринг! Мен сизни ёмон бўлинг демайман... Бўлдирадиган ҳам хотин, ўлдирадиган ҳам хотин!

Ҳуринисо унинг ўзига маълум бўлмаган камчиликлари, ҳаммага маълум хатолари тўғрисида сўзлаб, гапни кўпиртира бошлаган эди, раис чакка томирлари бўртиб, жеркиб ташлади:

— Афлотуннинг қизи бўлсангиз ҳам гапни тонналаб олинг-у, граммлаб сотинг! Гапингиз гапга ўхшамайди, оғзингиз гапдан бўшамайди!..

Қаландаров жаҳли келганда қандоқ бўлиши аён экан шекилли, шундай кўпириб, шундай тошиб шақиллаётган Ҳуринисо бирдан тушди, товуши, нечукдир, майнин бўлиб қолди.

— Вой, мен нима дедим... омади гапни айтдим...

Қаландаров, жаҳл оти суреб кетганда тизгинлаб ололмаса керак, бошқа ҳеч гапга ўрин қолмаган бўлса ҳам яна узиб-узиб олди:

— Тиши чиққан болага — чайнаб берган ош бўлмас деганлар! Ҳар нима қилсангиз қилинг, мени итингизнинг ёнига боғланг, лекин раҳбарлик қилманг! Тоқатим йўқ! Хотин киши раҳбарлик қилса калавамнинг учини йўқотиб қўяман!— деди ва бу гаплардан суҳбатга ғурбат чўкмасин учун Эшонга тегишиди:

— Ашуладан олсанг-чи, нима бўлди, пружинанг узилдими? Айт, қаттиқ-қаттиқ айт, одам ашула эшигандай бўлсин!

Эшон ашула айтди. Ҳуринисо ҳам, орада ҳеч гап ўтмагандай, ўзини хандон-хушон тутишга ҳаракат қилди. Лекин, Сайданинг назарида, суҳбатдан кетган файз қайтмади. Унинг кўнглида ғашлик пайдо бўлди: «хотин киши раҳбарлик қилса калавамнинг учини йўқотиб қўяман... Ҳозир хотинига шундай дейиши зарурмиди ёки бу қирпи чол пайт келганда мени огоҳлантира ётибдими?...»

Сайданинг назарида Ҳуринисога ҳозир эмас, умуман

шундай дейишнинг ҳожати йўқ, чунки у одамлар олдида ўзини эридан қанчалик баланд тутса, холи қолганда шунчалик паст тушадиган хотинлар тоифасидан экани, Қаландаров хотинининг эл олдида кариллашига ҳеч қачон монелик қилмаса ҳам уйда «гаҳ» деганда қўлига қўндириши очиқ кўриниб турар эди.

Кифоятхон ошни сузаётган пайтда идорадан одам келиб, раисни олиб кетди. Қаландаров шу кетганича кечаси соат бирдан ошганда келди. Ҳуринисо ошдан кейин Сайдани ҳужрасига кетгани қўймади. Саида шу ерда ётиб қолди.

#### IV

Қаландаров, ҳар кунгидай, тонг ёришмасдан идорага чиқиб кетган эди, офтоб тиф тортганда нонушта қилгани келди; нонуштадан кейин Сайдани олиб яна идорага чиқди ва боққа кириб кетаётиб, дарвоза олдида учраган тўлагина бир жувонга:

— Умидахон, бу кишига кабинетларини кўрсатинг,— деб Сайдани топширди-да, ўзи сада остида кутиб турган одамларга томон кетди.

Умидя ялт этиб Сайдага қаради ва қувноқ товуш билан:

— Салом, Саидахон!— деб қўл берди,— правление-нинг секретари Умидя! Умидя Умарова!

Булар коридордан доира шаклидаги залга, залдан яна узун ва қоронфироқ коридорга ўтишди. Умидя коридорнинг охиридаги эшикни очиб Сайдага йўл берди. Бу бўлма қабулхона эди. Телефон жиринглади. Умидя трубкани олар экан, Сайдага курси суриб берди. Саида ўтириб, икки томондаги қора клеёнка қопланган эшиклардаги лавҳани ўқиди. Қизил ойнага оқ ҳал билан ёзилган бу лавҳаларнинг бири «Бўстон» колхози правлениесининг раиси», иккинчиси «Бўстон» колхози партия ташкилотининг секретари» деб ёзилган эди. Саида ичida «секретарнинг иззати жойида-ку» деб қўйди. Умидя телефонда гаплашиб бўлганидан кейин столининг тортмасидан иккита калит олди, бирини «пўлат сандиқнинг калити» деб Сайдага берди, иккинчиси билан кабинетни очди. Кабинетни кўриб, Сайданинг оғзи очилиб қолди,

Қиммат баҳо мебеллар кўзни қамаштиради. Столларга ёйилган қизил мовут, курси ва креслоларга қопланган қизил бахмал чўғдай яшнайди. Деворларда доҳийлар ва раҳбарларнинг зарҳал рамкаларга солиб осилган портретлари, областнинг харитаси, колхоз терриориясининг плани, турли туман диаграммалар, фото ҳужжатлар...

— Бу кабинет яқинда бўлганми? — деди Саида.

— Йўқ, Саидахон, менинг правлениега секретарь бўлганимга беш йилдан ошди, мен келганда ҳам бор эди.

— Яхши тутишибди...

— Арслонбек акам бу кабинетга жуда бино қўйганлар, ясатганлари ясатган. Ўз кабинетлари билан ишлари йўқ. Лекин ўз кабинетлари ҳамиша қулф, ё меҳмонкелганда очилади, ё жаҳллари чиққанда...

— Жаҳллари чиққанда?! — деди Саида бу гапни ҳазил гумон қилиб, кулиб.

— Ҳа, жаҳллари чиққанда... Бирорга қаттиқ гапирадиган бўлсалар шу кабинетга олиб кириб гапирадилар. Шу феъллари яхши: ҳеч кимни бирорнинг олдидага беҳурмат қилмайдилар.

Саида пўлат сандиққа калит солди.

— Менга калитни берганингиз иш топширганингизми? Ишни мен кимдан қабул қилиб олаётиман?

Умидა ҳам кулди.

— Бюро аъзосидан... Секретаримиз кетишда менга калитни берди холос, иш топширгани йўқ.

Саида сандиқни очди. Сандиқда бир-икки мажлиснинг протоколи, коммунистларнинг рўйхати, взнос ведомости, йигирма олти сўм бир неча тийин пул, бир варақ дафтарга ёзилган бир ариза бор экан.

Саида бир варақ дафтарга ёзилган аризани кўздан кечирди. Ариза бундан ўн тўрт ой бурун ёзилган бўлиб, Нормат Бадалов деган комсомол аъзоси бригадир Зулфиқоровни қўш хотинликда айблар ва бунга панжа орасидан қараб келаётган бир неча коммунистни жуда қаттиқ танқид қиласади. «Ҳим, Носиров айтган одам» деди Саида ичидаги Зулфиқоровни коммунистлар рўйхатидан излади. Зулфиқоров партия аъзолигига етти йилдан бери кандидат экан. Саида масаланинг тагидан хабардор бўлса ҳам бунга Умиданинг муносабатини билиш учун:

— Бу ариза текширилганми? — деб сўради.

Ариза икки марта партия мажлиси муҳокамасига қўйиладиган бўлганда Қаландаров кейинга қолдирирган, ишнинг дол-зарб вақтида яхши бригадирни чалғитмайлик деган фикрни айтиб, шу фикрни ўтказган эди. Умida буни айтмай норози бир алпозда мужмалроқ жавоб берди:

— Унча яхши билмайман... Бу ишга бир вақт Қодиров ҳам аралашиб юрган эди.

Бу ҳақда Носиров гапирган, бу фактни таҳлил қилиб берганда ҳам Саида чандон эътибор қилмаган эди, ҳозир ниҳоятда дарғазаб бўлди. Унинг назарида ҳозир бундан муҳимроқ иш, партия ташкилотининг фаолиятсизлигини кўрсатадиган бундан каттароқ факт бўлиши мумкин эмас эди, шунинг учун буни биринчи партия мажлисидаёқ муҳокамага қўйишни кўнглига туғиб қўйди.

Танишгани бошқа ҳеч нарса бўлмагани учун Саида кабинетни қулфлаб, боққа чиқди. Қаландаров, олдида бир чойнак чой, сўрида оёғини саланглатиб ўтирас эди, Сайдани кўриб «кабинетни қойил қилибманми» деган маънода «хўш, қалай?» деб илжайди.

Саида кабинетга эмас, ишга қизиқсанлигини писанда қилиш учун унинг саволига жавоб бермади ва келиб сўрига ўтирганидан кейин қошини чимириб:

— Колхозда қўш хотинлик одамлар ҳам бор экан? — деди.

Қаландаров сўз ким устида бораётганини фаҳмлаб ҳазилга олди:

— Бор, ҳаммасидан ҳам бор, ҳеч камчилигимиз йўқ.

— Бу ариза нима учун ҳозиргача муҳокама қилинмади?

Сайданинг бу гапни ҳазилга ҳазил тариқасида айтмагани Қаландаровга малол келди. У ўрта бармоғи билан пешонасини тез-тез ишқаб, худди тиши билан даҳак чаққандай, бош силкиб:

— Зулфиқоров яхши бригадир! — деди.

Саида заҳарханда қилди:

— Колхозда хотин мукофотга бериладими?.. Яхши бригадир иккита хотин олса, ундан яхшироғи учта олса... Менингча кечикиб бўлса ҳам бюорода муҳокама қилиш керак!

Қаландаровнинг рўй-рост аччиғи келиб, чакка томирлари бўртди.

— Ўзлари биладилар,— деди истеҳзо билан,— ҳар кимда ҳам битта-иккита мажлисга еткулик гуноҳ топилади. Аввал сизни секретарликка сайлайлик, ундан кейин нима қилсангиз қиласверасиз!

Саида, бир лаҳза нафаси ичига тушиб, ноқулай аҳволда қолди. Қаландаров Саидани умуман қайириб олишни кўзлаган бўлса ҳам, биринчи тўқнашишдаёқ бир зарб билан қойириб оламан деб ўйламаган эди. У ғолибона бир ғуур билинган энли камарини ушлаб, бир елкасини кўтарди ва тишининг орасидан бир томонга чирт этиб тупурди... Саида ўзини дарров ўнгариб олди.

— Бир коммунистнинг қилмишини муҳкомага қўйишни талаб қилиш учун секретарь бўлишим шартменин?— деди.

Қаландаров Саиданинг зарбга бундай эпчиллик билан чап беришини хаёлига сира келтиргмаган бўлса керак, ўзи шошиб қолди.

Шу аснода Умидга раисни телефонга чақирди-ю, бу гап чала қолди, лекин Саида буни давом этдиришга хоҳиш эмас, бошлаганига пушаймонлик сезди: «Наҳот мен ишни шундан, яна шу хилда бошлашим керак бўлса!... Бунақада ҳали иш бошламасдан орамизни бузиб қўяман-ку!»

Шундан кейин Зулфиқоров ҳақида бошқа гап очилмади. Саида фаолиятини шундан бошлашни номаъқул ҳисоблаган бўлса, Қаландаров масала жиддий тус олса ўзига гап тегишини билиб, Зулфиқоровни минбаъд ҳимоя қилишдан воз кечди. Лекин ҳар иккиси ҳам, хусусан Қаландаров бундан воз кечганини билдиришни ён бериш деб билар, ён беришни эса нўхтасининг учини бериб қўйиш, ҳозир ва келажакда ҳар қандай обрўдан, оммага таъсир кучидан маҳрум бўлиш деб ҳисоблар эди.

Саида биринчи партия мажлисини ўтказишга тайёрлик кўра бошлади: коммунистлар, колхознинг раҳбар ходимлари, актив комсомоллар билан суҳбатлашди, партиявий ишлар билан танишди. Саида шундай разм солиб қараса колхознинг ташкилий-хўжалик, маданий ҳаётида ҳам ҳали ҳеч қаерда, ҳеч қачон ўртага ташланмаган анчагина камчиликлар, ҳатто хатоликлар бор экан. Бу ҳақда одамлар баъзан тортиниброқ, баъзан тушунёлмаган бўлиб, баъзан истеҳзо ва пичинг билан гапиришар эди. Саида бунга жуда суюнди: демак, ҳисоблар эди.

бот юзасидан бўладиган музокара қизғин тус олади, партия турмуши, колхоз ҳаётидаги камчиликларни очиб ташлайди, янги бюро ва умуман партия ташкилоти олдида турган бугунги ва эртаги вазифаларни белгилаб беради, бу вазифаларни бажаришга коммунистларни сафарбар қиласди, булардан ташқари, тажрибасиз ва ёш раҳбар, хўжалик ҳаётига тўнкўз бўлган Саидага коммунистларни тезроқ ўрганишга, хўжалик ҳаётининг ўзак масалалари билан тезроқ танишишга имкон беради.

Бироқ, мажлиснинг кун тартиби масаласида келишмовчилик юз бериб қолди. Очиқ тўқнашувга бориб етмаган Зулфиқоров масаласини эътиборга олмагандা бу икки орада бўлган биринчи тўқнашув эди.

Қаландаров эски бюронинг фаолияти ҳаммага маълум бўлганидан ҳисобот қуруқ расмият бўлишини айтиб, тўғридан-тўғри сайлов ўтказа беришни таклиф қилди.

— Бу нарса уставнинг талаби,— деди Саида мумкин қадар назокат билан.

— Устав партия турмушини расмиятга айлантириш учун ёзилган эмас-да,— деди Қаландаров ёш қизга оталарча насиҳат оҳангиди.

Саида эски бюронинг ҳисобини қўйиб, уставнинг талабини бажаришдан ташқари яна қандай мақсадларни кузатаётганини айтиб берди. Қаландаров ичida Саиданинг бу фикрини маъқул кўрса ҳам ўз фикрини ўтказиш учун гапида туриб олди. Унинг ўжарлигига Саида партия мажлисларида ўз ҳукмини ўтказиб келган одамнинг бундан кейин ҳам ҳукмрон бўлиб қолишга ҳаракат қилиши деб баҳо берди-да, агар бу масалада келишиб бўлмаса районга мурожаат қилиш лозим келишига ишора қилди, чунки унинг «хотин киши раҳбарлик қилса қалавамнинг учини йўқотиб қўяман» деган гапи ҳам кўнглининг бир бурчидаги турар эди. Саиданинг ўз фикрида туриб олишига Қаландаров ҳам ўзича маъно берди: «бу маҳмадона ўз сўзини ўтказмоқчи, шубилан бундан кейин ҳам ўзбошимчалик қилмоқчи» деб қўйди.

Шундай қилиб ҳисобот масаласи Қаландаров учун мажлисни чўзадиган ортиқча расмиятдан нафсониятга айланди, Саида учун эса иш маёнгаати ва устав талаби сифатида яна ҳам каттароқ аҳамият касб этди,

Бироқ Саида минг ҳақ бўлса ҳам бу келишмовчиликни кўзда тутмасдан иш кўргани истихола қилиб қолди. У қанақа йўл тутмасин — Қаландаровнинг фикри билан тўғридан-тўғри ҳисоблашмайдими, рајком орқали иш кўрадими, коммунистларни ўз томонига тортиб, Қаландаровни яккалашиб қўядими — буларнинг ҳаммаси ора бузилишига сабаб бўлиши аниқ эди.

Мажлисни ўтказиш, тезроқ ўтказиш, эски бюронинг ҳисобини қўйиш керак, бу нарса иш манфаати, устав талабидан ташқари Қаландаров билан партия ташкилоти орасидаги муносабатни аниқлаб олиш учун ҳам зарур эди. Шу билан бирга Қаландаров билан икки орани бузадиган тўқнашиш бўлувига йўл қўймаслик шарт, чунки бундай тўқнашиш бўлган тақдирда Саида енгилса ҳам бир бало, енгса ҳам бир бало: енгилса ўзидан илгариги баъзи секретарлар сингари ё Қаландаровнинг юурдагига айланади, ёки, истеъфо беришга мажбур бўлади; енгса — бутун қиласидан иши кек сақлаб қолган Қаландаровдан ўзини мудофаа қилиш, ҳар ишда унинг қаршилигини енгиш, натижада унинг кўнглидаги кекни кундан-кун ёлқинлатиш, эҳтимол, душманлик туйғусига айлантиришдан иборат бўлиб қолади. Ундан кейин нима бўлади? Рајон партия комитети ишонч билан катта масъулият юклаб юборган, не-не ниятлар билан келган Саида уч кунда раис билан орани бузиб, рајкомга жанжал ёки ариза кўтариб борадими?

Саида ўйлаб ўйига етолмай қолди.

## V

Қаландаров Саидани ўз ҳолига ташлаб қўйди. Бир неча кун давомида иккови фақат бир марта коридорда кўришди, холос: Ўшанда ҳам Қаландаров «хўш, қалай» ишлар билан танишаёздингизми» деди-ю жавоб ҳам кутмай, ўтди кетди. Унинг, дарҳақиқат, иши ҳамиша бошидан ошиб ётади, лекин истаса Саида билан гаплашгани, колхоз ҳаёти билан тезроқ танишишда унга ёрдам бергани ҳар қачон вақт топиши мумкин эди. Буни Саида яхши билар эди.

Саида ишни қаердан ва нимадан бошлишини билмай, бир-икки кун бухгалтерияни титкилади — ҳужжат,

рўйхат, рақам; хўжалик тармоқларини айланиб, ўша ҳужжат, рўйхат ва рақамларни амалда кўрди — сигир бузоқ, экин-тикин, машина, тахта... Буларнинг ҳеч бирй унга қиладиган ишлари, бу ишларнинг миқёси ва шароити тўғрисида тайинлик бир тасаввур туғдирмади. Унинг назарида ҳозирча бирдан-бир тайинлик иш, ўша биринчи мажлисни яхшироқ ўтказиш, бунинг учун пишиқроқ тайёрлик кўриш бўлиб қолди.

Саида мажлисга тайёрлик юзасидан бир неча коммунист билан суҳбатлашди. Булардан бири — хушфөъл ва хуштавозе, Сайдани негадир «аяча» деб атаган Исмоилжон деган барвастагина бир йигит, ғалати билан гапни айтиб қолди. Бу одам пешқадам бригадирлардан бўлиб, ўзининг айтишича биргадирликни кўт қийналмасдан олиб борар экан. Бунга энг биринчи сабаб иш шароитини ташкил қилган ер ва қўл остидаги одамларни жуда яхши билганлиги экан. Исмоилжон иш шароити тўғрисида гапириб, «сизнинг иш шароитингиз бутунлай башқача, бунинг, эҳтимол, эллик процентини Арслонбек аканинг битта ўзлари ташкил қилсалар» деди. Бу ҳақ гап, буни Сайданинг ўзи ҳам сезар эди.

Саида бошқа коммунистлар, партиясизлар, колхознинг раҳбар ва оддий ходимлари билан гаплашгани сайнин бу шароитнинг оғирлигини кўпроқ сеза бошлади. Қаландаровнинг ҳар ишда ўз сўзини ўтказиб ўрганганлигигина эмас, унинг зўр ташкилотчи экани ҳам Сайдага қийинчилик туғдирар эди: айтгани айтган, дегани деган бўлиб келган одамга ҳатто маслаҳат тариқасида ҳам бир нима дейиш нақадар мушкул бўлса, шундай зўр ташкилотчи ёнида юриб салмоқ ортдириш ундан осон эмас эди. Ўзи озғин Саида бир ҳафта деганда кўзлари киртайиб, икки лунжи хийла чўкди.

У бир кечаси, одатдагича, ярим кечагача китоб ўқиб ўтириб хаёли қочди-ю, бирдан ўзини ожиз, нотавон сезди, Қаландаров кўзига тоғ бўлиб кўринди. Унинг вужудини умидсизликка яқин бир кайфият ўргамчининг тўридай ўраб-чулғаб олди-да, «чакки келган эканман! Ҳали ҳам Тоҳиржон акамга айтсан, ўтинсан, йиғласам...» деган гап кўнглидан ўтди. Шунда унинг кўз олдига кулиб турган Тоҳиржон Носиров келди ва қулоғига унинг сўzlари эшитилиб кетди: «Аёл бошим билан деганингиз мунгли, муштипарман деганингизми? Сиз шундай десангиз додимизни кимга айтамиз!..»

Саида умидсизлик ва ожизлик туйғусини туғдира-диган фикрни ўзига йўлатгани, кўнглидан шундай гаплар ўтгани учун жаҳли чиққандай ирғиб ўрнидан турди, чарчаганига иқрор бўлиб, чироқни ўчирди, тезроқ ухлаш учун ўйламасликка тиришиб хаёл сурди, ҳадемай, уйқуга кетди.

У, жуда кеч ётганига қарамай, тонг ёришар-ёришмас уйғонди, лекин кўзлари тўла уйқу, бутун вужуди уйқунинг бир-икки минутли энг ширин жойи қолди деб турар, саҳар шабадасида япроқларнинг шилдираши, қушларнинг чуғур-чуғури уни аллалар эди. Саида очилиб қолган елкасини ёпишга ҳам эриниб, юзини юмшоқ ёстиққа яхшироқ ўрнаштириди. Юмшоқ, ҳарир ва илиқ уйқу пардаси унинг идрокини яна қоплай бошлаганда тағин Қаландаров ёдига тушди-ю, кўзларида уйқудан асар ҳам қолмади: «Қаландаров қаршисида мен ҳеч — пуч эканлигим аниқ. Бунга энди ҳеч қандай шубҳа қолмади. Нима қилиш керак? Партия ташкилоти жонли, мустаҳкам бўлганда ҳам бошқа гап эди!» Саида шундай деди-ю ўзи кулиб юборди: «Партия ташкилоти жонли, мустаҳкам бўлса соғ кишига Суқротнинг нима кераги бўлар эди?» Демак энг биринчи вазифа партия ташкилотини жонлантириш, бунинг учун эса уни Қаландаровнинг таъсири — тазиқидан қутқариш керак.

Саида бу ҳақда бир неча кун ўйлади, ниҳоят, бир фикрга келди: бюронинг янги составига Қаландаровнинг кириши шартми? Бу фикр унинг ўзига хийла маъқул тушди. Дарҳақиқат, Қаландаров бюрога кирмаса ҳар нарсага аралашавермайди, чунки «нима иш қилсанг мендан сўраб қил» дегани истиҳола қиласди; бундан ташқари бюро қарори умумий мажлисга олиб чиқилганда бутун бюрога ўзини қарши қўйгани ботина ғолмайди. Бунинг натижасида ҳар бир коммунист, бутун партия ташкилоти унинг тазиқидан қутулади.

Саида бу ниятини очиқ айтмасдан бюронинг янги состави тўғрисида деярли ҳамма коммунистлар билан фикр олишиб кўрди. Бироқ, кўп киши бюронинг янги составига энг биринчи кандидат қилиб раиснинг номини айтар эди. Шундан кейин Саида раисни составга киргизмаслик тўғрисида имо-ишора ҳам қилди. Бу имо-ишораларга баъзи одамлар тажжубланди, баъзилар та-

йинли жавоб бермади, масалан, Умида хайрихоҳлик билдирса ҳам, мушукнинг зулмидан қутулиш учун унинг бўйнига қўнгироқ осиш энг яхши чора, лекин бу қўнгироқни ким осади дегандай қилди. Ҳақиқатан, неча йилдан бери бюро аъзоси бўлиб келган раисни, ҳамма вақт ва ҳар ишда ўз сўзини ўтказиб келган одамни бюргага ўтказмасликни қайси азамат таклиф қила олади? Шундай азамат топилган тақдирда ҳам Қаландаров бу таклифни нима деб тушунади-ю, у одамга қандай кўз билан қарайди ва бунинг оқибати нима бўлади? Бу ҳақда юқорида ҳеч ким кўрсатма беролмаса, унга қарши сайлов олди кампания олиб бориб бўлмаса...

Саида бу ҳақда хўп ўйлаб қатъий бир қарорга келди-да, раиснинг кайфи чоғ вақтини пойлаб туриб, шу тўғрида сўз очди:

— Бюронинг янги состави тўғрисида маслаҳат берсангиз, Арслонбек aka,— деди.

Қаландаров-жуда хурсанд бўлди ва мўйловини бўраб:

— Хўп, хўп...— деди,— неча кишидан иборат қилмоқчисиз?

— Ўзингиз биласиз... Хўп десангиз уч кишидан иборат бўлсин.

— Майли!— деди Қаландаров яна мўйловини бўраб.— Хўш... Мен! Ўзингиз! Секретарь қизимиз Умида-хон! Уч кишидан иборат бўлса — шу!..

— Ҳа, уч кишидан иборат,— деди Саида ўйчан,— афсуски кўпайтириб бўлмайди. Умиданинг ўрнига бошқа киши, хўжаликнинг ҳеч бўлмаса бирон тармоғини яхшироқ биладиган одам киритилса қалай бўлар экан?

Қаландаров бу таклифни дарров рад қилди.

— Ийўқ... йўқ, Умида ёзув-чиズувга эпчил, ўзи чаққон қиз! Илми ҳам бор! Бу хотин идорада менинг вазирим: бирон иш буюрмоқчи бўлиб гапнинг учини чиқарсам у ёғини ўзи билиб олади; қачон нимани сўрасам ҳозиржавоб; айтмасам ҳам қаерда нима иш қилиб юрганимни билади, керак бўлса сўраган одамга айтади...

Саида унинг мақтовларига жуда аҳамият бериб, «Умидага қойил» деган маънода бош чайқаб қулоқ бе-пар экан:

— Қани энди мана шунаقا уқувли, эпчил, ғайратли одамлар бюорода кўпроқ бўлса!— деди.— Модомики

составни кўпайтириш мумкин эмас экан, шу составнинг ўзидан мумкин қадар кўпроқ фойдаланишга ҳаракат қилишимиз керак бўлади.

— Албатта...— деди Қаландаров.

Саида хийла сукут қилиб қолганидан кейин бирдан бошини кўтарди.

— Менга қаранг, Арслонбек ака,— деди,— ҳозир хаёлимга бир нарса келиб қолди. Колхоз хўжалигини сиздан кўра яхшироқ биладиган одам йўқ, а?

Қаландаров лабини кулгидан аранг йиғиштириб:

— Унча-мунча биламиз...— деди.

— Демак бюро колхоз хўжалигига доир катта-кичик ҳамма масалани ҳал қилишда, барибир, сизнинг маслаҳатингиз билан иш кўради, бусиз мумкин эмас. Шундайми?

— Шундоқ бўлиб келаётиди,— деди Қаландаров ва томоғини қириб қўйди.

— Модомики шундоқ экан,— деди Саида давом этиб,— шу маслаҳатларни сиз бюрода туриб бердингиз нима бўлди-ю, бюродан ташқарида туриб бердингиз нима бўлди?

Қаландаров сўз қаёққа қараб кетаётганини фаҳмла-масдан:

— Албатта!— деди.

— Модомики шундоқ экан,— деди Саида дамни со-вутмай,— ўзингиз берган маслаҳатга ўзингиз овоз беришингиз шартми? Агар бу шарт бўлмаса сизнинг бюрода бўлишингиз ҳам шарт бўлмаса керак демоқчиман. Ўнг қўлим, сўл қўлим — бари ўз қўлим...

Бу гап Қаландаровнинг қулоғига алланечук, жуда эриш эшитилди.

— Ҳимм...— деди у ва бир нима демоқчи бўлиб фикр тўплаётган эди, Саида «бюрода бўлишим шарт» деб қўйса гапини қайтариш қийин бўлишини билиб, сўзини оғзидан олди:

— Мен бу билан бояги фикрларингизни қувватла-моқчиман,— деди, гарчи Қаландаров бутун суҳбат давомида бунга яқин бирон сўз айтмаган бўлса ҳам,— коммунистлар орасида Умида битта эмасдир? Сизнинг қанотингиз остида бунаقا одамлар кўп етишган бўлиши керак!

— Яхши одамларимиз кўп,— деди Қаландаров ва фалсафа мақомига ўтди,— мен сизга айтсан, одамнинг

ёмони бўлмайди. Бирор тош, бирор гул, ўз жойида иккovi ҳам яхши...

Қаландаров сўзни айлантириб, бюро составида қолишга хоҳиш билдириб қўймасин учун Саида яна унинг сўзини оғзидан олди:

— Тўғри! Жуда тўғри! Игна билан битадиган ишга жуволдиз тиқиб ўтирмасаг-у, сизнинг ўрнингизга ўша одамларимиздан бирини киргизсак. Ўзингиз тавсия қилсангиз...

«Игна билан битадиган ишга жуволдиз тиқиб ўтирмайлик» деган гап Қаландаровга жуда ёқиб кетди. У ийиб кетганини билдирмасликка тиришиб:

— Майли, мени бюрога киргизмай қўя қолинг. Кўзлаган одамингиз борми? — деди.

— Йўқ, Арсланбек aka, мувофиқ одамни сиз билсиз.

Қаландаров унга «бориб-бориб дуруст бўлиб кетадиганга ўхшайсан-ку» деган маънода бир қаради-да, бундай масалаларни ҳал қилишга шошилмаслигини кўрсатиш учун:

— Хўп, мен бир ўйлаб кўрай, эртага айтаман, — деди.

— Битта лекини бор, Арслонбек aka, — деди Саида, — сизни бюрога киргизмасликка биронта ҳам коммунист рози бўлмаса керак. Бу тўғрида ўзингиз айтасиз, ўзингизга ўзингиз отвод берасиз...

Қаландаров қаҳ-қаҳ уриб кулди.

— Хўп, хўп, ўзим айтаман!..

Саида хурсанд бўлиб чиқиб кетди.

Саида бюро составига Қаландаровни киргизмаслик тўғрисида ўйлаганда, агар шунга муваффақ бўлса, унинг ўрнига Исмоилжонни мўлжаллаган эди, шу ҳақда бирмунча кишилар билан кенгашиб кўрди. Буларниң ҳаммаси ҳам Исмоилжонни энг мувофиқ номзод ҳисоблар, лекин баъзилар раиснинг кўнишига шубҳа билан қарап эди, чунки бир вақт Исмоилжон бирмунча масалаларда раис билан келишолмай унинг назаридан қолган, яхши бригадир бўлса ҳам, елкасига офтоб тегмас экан.

Саида эртасига раисга учради ва ўйлаб қўйган номзодини сўради. Қаландаров ваъдаси эсидан чиққан экан, ростини айтгани бўйни ёр бермади-ю шошиб қолди, гараж мудири Усмонжон Умаровнинг номини айтди. Саида рад қилиш қийинроқ бирон номзодни айтар деб ўйлаган эди, бу номни эшишиб жуда хурсанд бўлди:

Усмонжон Умаров, биринчидан, жуда ёш коммунист, иккинчидан, бюро составига кириши аниқ бўлган Умида Умарованинг эри. Шу икки ҳол бу номзодни рад қилиш учун етарли асос бўла олар эди.

Саида ўша куни кечқурун Усмонжон Умаров билан учрашиб, шундоқ мўлжал бор эканини айтди. Бюро аъзоли: и жуда катта ва зўр мастьулиятли иш эканини билгани, ўзи ёш коммунист бўлгани учун Усмонжон, ранги ўчиб, қўлидан келадиган ва ўзининг касб-корига яқинроқ вазифа топширилишини сўраб ялинди. Бу мўлжални Усмонжон шундай қарши олишига Саиданинг кўзи етган эди. Усмонжон ўзини қутқариш учун бу вазифага ҳақиқатан лойиқ бирмунча кишиларнинг, жумладан Исмоилжоннинг номини айтди. Саида бу одамлардан Исмоилжонга ўзини мойилроқ кўрсатиб, жўрттага унинг қандай фазилатлари борлигини сўраган эди, Усмонжон унинг бир вақтлар партбюрога аъзо бўлганини, партия ишида тажрибаси борлигини, буни ҳамма билишини айтди ва лозим бўлса мажлисда шу номзодни кўрсатишга тайёр эканини билдириди. Саида унга тайнинли жавоб бермади, кимни сайлаш мажлиснинг ихтиёрида деганга ишора қилди-ю, шу билан Усмонжоннинг юрагини така-пуга қилиб қўйди. Усмонжон мажлисда Исмоилжоннинг номзодини кўрсатиши, ҳатто уни қизғин ёқлаб сўзлашига кўзи етгандан кейин Саида хотиржам бўлди ва эртасига мажлис ҳақида эълон ёзил осди.

Қаландаров идорага кириб кетаётган эди, эшикдаги каттакон эълонни кўриб тўхтади. У мана шунаقا қисқа эълон, вивеска, турли ёрлиқларни кўрса, мазмуни дарров маълум бўлса ҳам, бошдан-оёқ ўқимасдан қўймас эди. Унинг бу феълидан бехабар Саида «ҳозир кун тартиби тўғрисида хархаша қилади. Аслида буни ҳам бўйнига қўйсам бўлар экан», деб ташвишда қолди. Бироқ Қаландаров Саидага бир қаради-ю индамади, «Ҳимм» деганича идорага кириб кетди.

Мажлис очиладиган пайтда Саиданинг хаёлига ҳам келмаган бир иш бўлди; Умида йўқлама қилиб бўлиб, мажлисни олиб бориш учун президиумга одам кўрсатилишини сўраганда Қаландаров уч кишининг номини айтди, номзодла овозга қўйилиб тасдиқлангандан кейин эса ўрнидан туриб, «қани гаплашиб туринглар-чи» деди-ю ҳеч кимдан сўрамай-нетмай, чиқди кетди. Саида ҳайрон бўлиб Умидага, унинг юзида ҳеч қандай тааж-

жуб аломати кўрмаганидан кейин, бошқаларга қаради. Бошқалар ҳам раиснинг бу қилмишига ҳеч бир аҳамият бермагани кўриниб туар эди. Қаландаров бу қилмишидан ҳам кўра коммунистларнинг бунга муносабати Сайдани кўпроқ ҳайратга солди. Унинг ёнида ўтирган Исломийон секин туртиб: «Ҳамма вақт аҳвол шу» деб шивирлади.

Раис чиқиб кетиши биланоқ мажлиснинг салобати йўқолди. Кимдир қаттиқ гугурт чақиб папирос тутатди. Кимдир кулди. Кимдир баланд товуш билан кимгадир бир нима деди. Фовур бошланди. Мажлисга раислик қи́лувчи ғовурни босишига ҳаракат ҳам қилмай кун тартибини эълон қилди ва биринчи масала — эски бюро номидан ҳисоб бериш учун Умидга Умаровага сўз берди. Умид докладини бошламоқчи бўлганида Саида сўз сўраб ўрнидан турди ва масала муҳим бўлганлигидан Қаландаровнинг бошдан-оёқ иштироки шарт эканини айтди; уни кутиш, яхшиси айтиб келиш учун одам чиқаришни таклиф қилди. Бундай таклифни ҳеч ким кутмагани, одатдан ташқари бир ҳол бўлгани учун ғовур бирдан босилди, худди хунук бир ҳодиса рўй бергандай, раисни топиб келишгунча ўтган қирқ-қирқ беш минут давомида чурқ этган товуш эшитилмади. Мажлис аҳлининг назарида Саида бирдан алланечук салмоқ пайдо қилгандай, ўтирган жойи — узун столнинг охири тўрга айланиб қолгандай бўлди.

Қаландаров эшикдан пишиллаб, қовоини солиб кирди-ю, президиумга яқин дераза остидаги креслога ўтириди. Умид ҳисобот докладини бошлади. Қаландаров креслонинг суюнчиғига ўнг қўлтиғини қўйиб, президиумга орқа ўгириб, кўчага қараб ўтирас экан, докладни икки марта тўхтатиб, бир марта почтальон билан, иккинчи марта ферма мудири билан гаплашди; афтидан, яна «гаплашиб туринглар-чи» деб чиқиб кетгани баҳона излар эди. Шу пайт «қизим сенга айтаман, келиним сен эшит» қабилида уни огоҳлантириш, интизомга чиқариш учун жуда қулай баҳона топилиб қолди: носқовоғида ўз аксини кўришга уриниб, уни диваннинг баҳмалига ишқаб ялтиратаетган Зулфиқоров нос отди-ю ҳаял ўтмай, лабини чўччайтириб, энгашганича эшикка томон йўналди.

— Сўраб чиқилсин! — деди Саида.

Зулфиқоров ижозат сўраб раисга мурожаат қилишни ҳам эсидан чиқарди шекилли, дарров изига қайтди, яна

ҳам энгаришеброқ бориб жойига ўтирги-да, оғзидағи носини ютиб юборди шекилли, бурро қилиб, калака оҳангидаги:

— Хўп, опажон!— деди ва ҳимоя кутиб Қаландаровга қараб қўйди. Бу қарашнинг маъносини Саида фаҳмлади, юраги «шув» этиб кетди: ҳозир хуноб бўлиб ўтирган Қаландаров Зулфиқоровга бирон сўзи билан әмас, ҳатто анчайин ҳаракати билан хайриҳоҳлик билдирса ҳам иш чатоқ, жуда чатоқ бўлар эди. Буни Исмоилжон ҳам пайқаб ўтирган экан, дарров олдини олди:

— Партия мажлисида опажонингиз ҳам йўқ, ажонингиз ҳам! Бу киши ўртоқ Алиева!— деди.

— Ие!— деди Зулфиқоров фавқулодда қизиқ бир гап эшитгандай ва ёнида ўтирган Усмонжон Умаровга асия қилди,— хотинингни Умидахон дея кўрма тағин, ўртоқ Умарова дегин!

Зулфиқоровнинг бу сўзидан кейин кўтарилиши аниқ бўлган кулги фақат Исмоилжоннигина әмас, Саидани ҳам бир пул қилиши, икковини ҳам гангитиб қўйиши муқаррар эди. Саида мана шу куяғига фурсат бермади:

— Ўртоқ Умаров хотинини қачон нима деб аташини яхши билади, сиз ўзингизга эҳтиёт бўлинг: қайси бирини қачон нима деб аташда янгилишиб юрманг, тағин!..

Зулфиқоров, ранги бўзрайиб, оғзи ва кўзларини катта очиб, қимиrlамай қолди. Қаландаров қип-қизариб, пешонасини тез-тез ишқай бошлади. Унинг ҳаракатидан Зулфиқоровга гижиниб, ичиди: «Аҳмоқ, нима қилар эдинг тилини қичитиб!» дегани билиниб турар эди. Умидада сўзида давом этишини ҳам, этмаслигини ҳам билмай туриб қолди.

Зулфиқоров қўш хотинлик эканини одамлардан яширғандай бўлиб, бирор таъна қилганда, бирор сўкканда бўйинни қисса ҳам кўнглида бунга катта гуноҳ деб қарамас эди. Бироқ ҳозир бунинг катта гуноҳ эканлиги билинди, жуда ҳам билинди. Бу нарса Зулфиқоровгагина әмас, бу ерда ўтирганларнинг ҳаммасига ҳам шундай таъсир қилди. Ароқхўр халойиқнинг кулгиси, насиҳати ва дашноми остида ароқхўр номини олгандан кейин кўча-кўйда тентираб юриши, алжиши, ҳатто йўл бўйида учиб қолиши ҳам бирорнинг диққатини жалб қилмаганидай, Зулфиқоровнинг бу қилмишига ҳам одамлар кўнишиб қолган эди. Бу нарса катта гуноҳгина әмас, жиноят, айб уятгина әмас, бутун колхозни маломатга қўядиган шар-

мандалик эканлиги ҳизир, партия мажлисидагина билди. Кўча-кўйда, уйларда, самоварларда шу чоқача қирс этмаган бу ҳодиса ҳозир гуё бомба бўлиб портлади-ю, унинг даҳшатидан ҳамма гаранг бўлиб қолди.

— Иккинчиси билан тўғри бўлиб кетган...— деди Зулфиқоров, афтидан, иккинчи хотиним билан ажрашганин дегани тили бормай.

Бу портлашдан кейин унинг товуши мажлис аҳлига пашшанинг фингфиллашига ўхшаб эшишилди.

Қаландаров, чамаси, бу масалага ўзининг муносабатини билдиришни лозим кўрди:

— Биз ҳозир сенинг масалангни кўраётганимиз йўқ. Иккинчиси нима бўлганини масаланг кўрилганда айтасан!— деди.

Қаландаровнинг бу гапидан кейин Зулфиқоров унга, мунгфайиб бир қаради-ю, диванга қапишиб кетди.

Умидавом этди. Доклад тамом бўлди. Саиданинг умиди, мўлжалига қарши коммунистлар жуда ҳам пассивлик кўрсатишди. Музокарага чиққанлар, асосий масалалар у ёқда қолиб кетиб, кўпроқ Зулфиқоров иши тўғрисида гапиришди. Исмоилжон сўзловчиларни асосий масалаларга буриш, жумладан, коммунистларнинг ишлабчиқаришдаги етакчилик роли, колхозда сиёсий-тарбиявий ишларнинг аҳволи, интизом ва бошқалар тўғрисида гапиришга ундан, ўзи намуна кўрсатса ҳам натижа чиқмади. Мажлис бюронинг фаолиятини қониқарли топиш ҳақида Қаландаров киргизган таклифни қабул қилди.

Иккинчи масала юзасидан Қаландаров сўз олди.

— Ўртоқлар! Бюро уч кишидан иборат бўлсин деган таклиф бор. Қаршилар йўқдир албатта. Саида Алиева, Умид Умарова ҳамда Усмонжон Умаров! Мени бюро составига киргизмасликларингни сўрайман, нимага десаларинг, бюронинг иши, барибир менсиз битмайди. Қаршилик йўқдир? Қаршилик бўлмаса ана шу уч кишига овоз бериб қўя қолайлик. Энди менга жавоб, МТСга борадиган ишим бор. Мени кутиб туришибди...

Ҳамма ёқдан баравар:

— Жавоб берилсин!— деган товушлар эшишилди.

Интизомни писандаги қилиш учун Саида бу таклиф овозга қўйилишини сўради. Таклиф овозга қўйилди. Қаландаров жуда хижолатли бир маросимни ўтказаётган-

дай қип-қизариб, илжайиб, кўзи кўзига тушган одамга «майли, қўя бер, аҳамияти йўқ», деган маънода кўз қисиб тикка турар эди.

Номзоди кўрсатилгандан бери қути учиб, жовдира-  
ган кўзларини Саидадан олмай ўтирган Усмонжон Ума-  
ров Қаландаров чиқиб кетиши биланоқ сўз сўраб, кўли-  
ни ва шу билан бирга бутун гавдасини аста кўтариб ўр-  
нидан турди; ўз номзоди тўғрисида мажлисга узрини  
айтиб Исмоилжон Норматов номзодини кўрсатди. Бошқа  
таклиф тушмади. Номзодлар муҳокама қилинган вақтда,  
Саиданинг Усмонжон Умаров ҳақидаги мулоҳазаларини  
эътиборга олмаганда, ҳеч ким ҳеч бир номзоднинг сайлов  
рўйхатида қолдирилишига қарши чиқмади. Шундай қи-  
либ тўртала номзод ҳам рўйхатда қолди.

Бироқ яширин овознинг натижаси аломат бўлиб чиқ-  
ди: Саида билан Умидага ҳамма овоз берибди; Исмоил-  
жон Норматовга бир киши қарши; Усмонжон Умаровга  
эса ҳеч ким овоз бермабди. Ҳисоб комиссиясининг про-  
токоли эълон қилинганда Усмонжон Умаров эмас, Қа-  
ландаров тушиб қолгандай, аввал ноқулай бир жимлик  
ҳукм сурди, кейин бирдан қаттиқ кулги кўтарилди. Аф-  
тидан ҳамма ҳам бошқалар албатта овоз беради деган  
ишонч билан ўз кўнглининг амрига қулоқ солиб, Усмон-  
жон Умаров номзодини ўчирган экан.

Мажлис тарқалди. Бюро аъзолари қолиб, вазифа тақ-  
сим қилишди. Умидага билан Исмоилжон Саидани секре-  
тарликка сайланиши билан табриклар экан, икковининг  
ҳам кўнглидан бир гап ўтди: «Қаландаровнинг айтгани  
бўлмади, энди балога қолдинг».

## VI

Қаландаров бюро составига таклиф қилган номзодла-  
ридан Усмонжон Умаров ўтмаганини, унинг ўрнига Ис-  
моилжон Норматов ўтганини эшитиб, гарчи шу одамни  
таклиф қилиш эсига келмаганига ичидан ачинса ҳам,  
жон-пони чиқиб кетди. Нечук эканки, Саида раиснинг  
таклифини маъқул кўрмайди-ю, мажлис аҳли унинг райи-  
га юради!

↓ Бу кайфиятда Қаландаровга Саиданинг ҳар бир  
ҳаракати обрў талашиб қилинган иш бўлиб кўринди: ↓

мажлиснинг кун тартиби тўғрисида раиснинг гапига қулоқ солмадигина эмас, қулоқ солмаганини писанда қилиш учун ёълонда «ҳисобот сайлов» сўзларини катта қилиб ва яна қизил сиёҳ билан ёзди; мажлисдан чиқиб кетганида чақиртириб, ўтқазиб қўйди; мажлисда Зулфиқоровнинг шохига уриш билан раиснинг туёғини зирқиратмоқчи бўлди ва буни мажлис аҳли аниқ билди; энди, мана бунаقا қилиб, Усмонжоннинг ўрнига Йсмоилжон Норматовни ўтказиб ўтирибди...

Қаландаров ўйлаган сайин бу ишларнинг ҳар бири кўзига тоғдай бўлиб кўринар, буларнинг оқибатида обрўйи терак бўйи тушиб кетгандай туюлар эди.

«Бу қиз келганига ҳали бир ой бўлмасдан шунаقا қилиб ўтиrsa, бориб-бориб нима бўлади?»

Мана шунинг учун Қаландаров Саидани бир туртиб кўзини очишга, лозим бўлса тахтага тортиб, бир оз тобини олиб қўйишга қарор берди-да, эртаси эрталаб уни ўша маълум, ё меҳмон келганда, ё жаҳли чиққанда очиладиган кабинетига чақиртириди.

Саида эшикдан кириб, Қаландаровнинг авзойини кўриши биланоқ ичида: «Усмонжон Умаровнинг бюрога ўтмаганига хафа бўлибди-ку» деди-ю гина-кудурат сўзларини ёшлишиш ва уни овутиш учун узоқ суҳбатга чоғланиб креслога ўрнашиброқ ўтириди ва бошидаги похол шляпани олиб столнинг бир чеккасига қўйди.

—Хўш, сизга қайси ўйл билан ойлик тайин қилсан экан?— деди Қаландаров худди «сенни кимнинг ҳисобига боқсан экан» дегандай бир оҳангда.— Клубга мудир қилсан бўладими?

✓Партия ташкилоти кичкина бўлгани учун Саидага ойлик белгилаб бўлмас, шунинг учун унга бирон иш бериш тўғрисида сўз борар эди.] Саида бу ҳақда Қаландаровга бир неча бор мурожаат қилган, лекин у ана-мана деб шу вақтгача тайинлик бир ишни таклиф қилмаган, ҳозир тўсатдан гап очиб, бунаقا өҳангда гапириши ажиб эди.

—Ихтиёр сизда,—деди Саида ва хиёл жилмайиб илова қилди,— клуб ўйқ шекилли..]

— Бор! Штати бор!— деди Қаландаров бир оз жеркиб.

—Ўзи-чи, ўзи?

Қаландаров бир оздан кейин дўнғиллаб жавоб берди:

→Жиндай қурт боққанмиз... эрта-индин пиллани териб олсак бўшайди.

— Ўшанда ҳам иморат холос-да, бошқа ҳеч нарса йўқ. Мен суриштириб кўрган эдим...

Қаландаров нимадир демоқчи бўлиб, икки-уч оғиз ростлаганидан кейин, афтидан, оғзига келган гапни айтмай сўради:

— Яна нима керак?

— Кўп нарса керак, Арслонбек ака, ўзингиз яхши биласиз... Колхозчи дала иши, рўзгор ташвишидан бўшаганида бошини тиқиб нафасини ростлайдиган бир жой қилишимиз керак. Колхозчи клубда ўйнаб-кулса, томоша қилса, билмаганини билса, оламдан хабардор бўлса, ҳатто касб, ҳунар ўрганса... Агар клубни мана шундай жой қилгани ёрдам ваъда қилсангиз майли, клуб мудири қилиб тайинланг.

Қаландаров заҳарханда қилди:

—Ўзингиз иш билармон қизсиз! Сизга бизнинг ёрдамимиз керак эмас! Мұхтож эмассиз!

Саида ичида: «Ие, таклифи ўтмаганига ҳаддан ташқари қаттиқ хафа бўлиди-ку», деб қўйди ва унинг кўксисда гина-кудурат эмас, ғазаб тутикаса ҳам тез сўнадиган ғазаб, деган хаёлда унинг аланга олишига йўл қўймасликка тириши; Қаландаровнинг сўзига яраша сўз айтмай ўзини гўлликка солди.

— Дастробки вақтларда ёрдам берсангиз, ишлар жўнашиб кетгандан кейин унча оғирлигим тушмас деб ўйлайман.

Қаландаров гапни яна айлантириди:

— Сиз биздан ёрдам олгани эмас, бизга раҳбарлик қилгани келгансиз! Раҳбарсиз!.. Биз нима иш қилсак сизнинг раҳбарлигинги остида қиласмиш!..

Саида ҳайрон бўлди: «Нега бу мени ҳадеб жанг майдонига тортаётиди? Наҳот шу ғазаб, шу заҳарли гаплар фақат нафсоният оқибати бўлса! Ё Усмонжон масаласига яна бирон нарса қўшилдимикин?» Нима бўлганда ҳам Саида унинг ғазаби аланга олишига баҳона бўладиган бирон сўз айтишини, шу билан унинг тилини қичитиб, ўзи жавоб қилишга мажбур бўлиб жанжал чиқаришни, натижада икки орадан парда кўтарилиб қолишига сабаб бўлишни истамади; лекин шу билан бирга, «аёл бўлганим учун менга шунақа муомала қилаётисан-

ми» деган маънони англатиб, уни бир оз инсофга келтириш мақсадида бир вақт ўз уйида хотинига айтган гапини ҳазил тариқасида эслатди:

— Ундоқ эмас, Арслонбек ака,— деди кулимсираб,— аёл киши раҳбарлик қиласа калавангизнинг учини йўқотиб қўясиз...

Қаландаров ялт этиб Саидага қаради: ўз уйида хотинига ҳатто бегона одам, ҳатто бўлажак секретарь олдида айтиши мумкин бўлган бу гап ҳозир қулоғига алланечук, идорада баланд товуш билан айтиб бўлмайдиган уят ва шу билан бирга қалтис гапдай эшитилди. Бунинг устига Саиданинг кулимсираб туриши, унинг секретарлигини кўзда тутганда, бу гапнинг қалтис томонини ва аёл жинсидан эканини кўзда тутганда, уят томонини таъкидлар эди. Қаландаров гангиб қолди. У ҳозир Саидани таҳтага тортиш тўғрисида эмас, кулиб турган бу кўзлардаги таъна, ўпка ва сон-саноқсиз саволларга жавоб топиш тўғрисида ўйлашга мажбур бўлиб қолди ва шу лаҳзада ўзи таҳтага тортилаётганини пайқади-да, бу ҳолатдан чиқиш учун шовқин солишдан бошқа чора тополмади:

— Кўчадаги ҳазилни идорага кўтариб кирманг!..— деди.

Бундай шовқин ва дағдағани кутмаган Саида чўчиб тушди ва Қаландаровга қараганича анграйиб қолди.

— Нима қилдим...

Қаландаров, унга дағдаға кор қилди деган хаёlda авжига чиқди.

— Ўз уйимда ўз хотинимга ҳазил қилолмайманми! Кечирасиз, лойдан ҳуштак ясаб мени ўйнатолмайсиз! Сиздан каттароқлар ҳам мени ҳуштагига ўйнатолган эмас!

Қаландаров бу гапларни бояги ҳазил-кесатиқقا қарши айтаётган бўлса ҳам, ғазабини келтирган нарса бу эмаслиги аниқ эди. Шунинг учун Саида ҳайрон бўлиб қолди: «бу одам нега очиқ ярадай, ел ўтса ҳам жизиллаётиди? Наҳот бу одамни фақат Усмонжон масаласи, фақат нафсоният шу куйга солган бўлса! Шундай бўлган тақдирда ҳам сайлов ўтди, бўлар иш бўлди, минг бақиргани, куйгани билан қайта сайлов ўтказилмайдику! Ё бу нафсоният бир қалов бўлиб, бошқа, каттароқ бир нафсониятни аланга олдириб юбордимикин?» Саида бир нима демоқчи бўлиб оғиз ростлаган эди, Қаландаров сўз навбати бермади.

— Сиз болалик қилиб, бунақа хом хаёлларга бориб юрманг! Мен ўзим аравадан бошқа ишга ярамайдиган пачоқ отдай кўринсам ҳам, унча-мунча чавандоз минолмайдиган улоқчи отман! Унча-мунча одамни ерга чалпак қиласман! Чалпак! Буни билиб, тушуниб қўйинг!..

— Тушуниб турибман, Арслонбек ака,— деди Саида юзида табассум ва сўз охангি билан уни қизишмасдан гапиришга даъват қилиб — лекин улоқчи отлар қамчини кўрса кўтариб кетар эди, сиз... қечирасиз нима бўлди, нима гап ўзи?

Қаландаров кулиб юбораёзди ва ўзини яна ҳам дарғазаб кўрсатиш учун унинг саволига жавоб бермай давом этди:

— Мен колхозни опичлаб катта қилганман! Колхознинг дарди қаерда, қитиғи қаерда эканини мен биламан! Академиядан келадиган мўйсафид олимлар ҳам аввал менга учрайди, мен билан суҳбатлашиб, ундан кейин хўжаликни кўради. Колхоз тўғрисида китоб ёзганман!

Қаландаров столининг тортмасини жаҳл билан тортди, ундан бир китобчани олиб, Саиданинг олдига ташлади. Саида «Бўстон» колхозининг тараққиёт йўли деб аталган расмли китобчани варақлар экан, фақат бир нима дейиш учун:

— Катта одам эканингизга шубҳам йўқ...— деди.

— Шунақа экан, ўзингиздан катта бир нима деганда нега шашаклик қиласиз?!

— Нима қилибман?

— Нима учун Усмонжон бюрога ўтмади?

— Нима учун ўтиши керак эди?

Қаландаров унга бир хўмрайди.

— Мен бир иш қиладиган бўлсан ўйлаб қиласман!

Саида бепарво жавоб берди.

— Бунақа экан, мажлиснинг охиригача ўтиринг, нимани ўйлаб Усмонжонни таклиф қилганингизни коммунистларга айтиаг эди.

Қаландаров бунга қарши нима дейишини билмай сўради:

— И smoилжон Норматовни биласизми?

— Мен яхши билмайман,— деди Саида,— коммунистлар яхши билишар экан. Ўзингиз ўйлаб кўринг, Арслонбек ака: гараж мудири, пахтани билмайдиган Усмонжон, бюро аъзоси бўлгани яхшими, ёки танглайи пахта би-

лан кўтарилиган, тажрибали бригадир, колхоз хўжайлигини яхши биладиган Исмоилjon бўлгани яхшими? Сизга қайси бирининг фойдаси, ёрдами кўпроқ тегади?

Қаландаров бақириб берди:

— Менга ўргатманг!!— деди ва очиқ турган столнинг тортмасини қорни билан ёпиб ўрнидан турди, яна ўтири.

Саиданинг қоши бир оз чимирилди, майин товуши сал ўзгарди.

— Мен сизга ўргатмоқчи эмасман, отам тенғи одамсиз... Лекин ақлим етиб турган гапни гапирмасдан ҳам туролмайман. Партия мажлиси масалани тўғри тушунди, тўғри ҳал қилди. Сизни ҳисобга олинмаганда Исмоилjon Норматов бир оғиздан ўтди.

— Ҳа, сиз турганда бизни ҳисобга олишнинг нима ҳожати бор! Сиздай раҳбар бўлган жойда биздақа одамларни ҳисобдан чиқариб ташланса ҳам бўлади...

— Арслонбек ака,— деди Саида ёлворган оҳангда,— бунақа гапларнинг нима кераги бор?..

Қаландаров унинг гапига қулоқ солмай давом этди:

— Колхозни опичлаб катта қилгансиз!.. Колхознинг дарди қаерда, қитиғи қаерда эканини яхши биласиз!.. «Бўстон»га ўхшаган колхозлардан ўнтасини битта чинчалогингиз билан кўтарасиз!.. Синчалак деган қушни биласизми, оёғи ипдай... Шу қуш «космон тушиб кетса, ушлаб қоламан» деб оёғини кўтариб ётар экан!

Ҳозир Қаландаровнинг бу сўзларига яраша сўз айтиш бефойда, балки кони зиён, лекин, шу билан бирга, сукут розилик белгиси бўлар эди. Саида бир лаҳза ўйлануб қолганидан кейин мийифида кулиб:

— Дунёда бунақа жониворлар кўп, Арслонбек ака,— деди,— хўрор ҳам «мен қичқирмасам тонг отмайди» деб ўйлар экан...

Қаландаров бу дағдаға-ю пичинглардан кейин Саидадан кўз ёши кутган эди, унинг бу гапини эшишиб вужудига титроқ кирди, ўзини тутолмади, жон-жаҳди билан бақириб:

— Иўқол!!.— деди ва унинг бошига ургани бир нима қидиргандай у ёқ-бу ёққа аланглади, қўлига похол шляпаси илиниб қолди. У, шляпани юлқиб олди, шарт-шурт йиртди-да, Саиданинг башарасига отгани қўл кўтарди, бироқ унинг киприк қоқмай тик қараб турганини кўриб

отолмади, қулочкаш қилиб столнинг устига урди-да, ўрнидан туриб кабинетдан чиқиб кетди.

Саида ҳайрон бўлиб ўтириб қолди, хийла вақтдан кейин ўрнидан туриб, шляпа парчаларини ердан йигиштириб олди-да, Қаландаровнинг тортмасига солиб, секин қабулхонага чиқди. Қабулхонада ҳеч ким йўқ. Умидя янги келган «коммунист»ни варақлаб ўтирас эди, уни кўриб дарров ўрнидан турди ва югуриб келиб:

— Нима гап?— деб сўради.

— Ҳеч...— деди Саида ва унинг воқиадан бехабар эканини билиб хурсанд бўлди, шу билан бирга, бутун вужудида енгиб бўлмас бир ҳорғинлик сезди.

### VIII

Саида ташқарига чиқди. Саданинг тагида ҳеч ким йўқ, лекин қизил чойнак билан тўнтариб қўйилган пиёла раиснинг узоқча кетмаганини, шу атрофда эканини кўрсатар эди. Саида касал қишидай битта-битта қадам босиб ҳужрасига томон йўналди, лекин ҳозир раисга дуч келишни сира истамагани учун ишком орасидан юрди; ишкомдан ўтиб хилват олчазорга кирганида бирдан хўрлиги келиб ўпкаси тўлди-да, орқасига бир қараб аввал жадаллади, кейин югурди; юрганича келиб ҳужрасининг эшигига калит солмоқчи бўлганида, худди бирор йўлини тўсгандай, бирдан тўхтади: «Хўш, нима гап ўзи,— деди ўзича,— нимага келаётиман, каравотга ўзимни ташлаб йиғлаганими? Кўз ёши ё кўнгилдаги ғам-ғуссанинг дамини кесиш, ё бераҳмнинг раҳмини келтириш учун тўкилади, менинг кўнглимда қанақа ғусса бор, йиғлаб кимнинг раҳмини келтироқчиман? Раис мени чертган бўлса, мендан шапалоқ егандай бўлди, мени енгмоқчи бўлиб ўзи енгилди. Унинг сўз тополмай қўл кўтаргани — кучи шляпага етгани шуни кўрсатмайдими?!»

Унинг қалбига наштардай қадалиб турган хўрлик ўрнини нафсоният, кўнгилнинг аллақайси бурчида урчи-ётган ғуссанинг ўрнини ғазаб, вужудини қоплаб келаётган ҳорғинлик ўрнини куч, файрат эгаллади. У ҳозир раисга рўпара бўлиб унинг қилмиши жоҳиллик, тарбия-сизлик эканини башарасига айтишни, юз-хотир қилмас-

дан ва ора бузилиб қолишидан чўчимасдан «Мен сен айтган муштипар аёллар тоифасидан эмасман!» дейишни истар эди.

Саида орқасига қайтди, жўрттага сада остидан юрди. Раис кўринмади, чойнак-пиёла ҳам йўқ эди. Саида идорага кириб, Умидадан янги хабар эшитди: ҳозир район ижроия қўмитасидан шошилинч телефонограмма келибди. Қаландаров ўзаро текшириш бригадасига бошлиқ бўлиб, мусобақадош қўшни областга кетаётган эмиш. Саиданинг ғаши келди, ичида: «Шундай жоҳил, bemazagarчилик қилиб милицияга тушган одамни мана бунаقا қилишади! Шундай қилингандан кейин бу эркаламай ким эркаласин!» деди-да, индамай кабинетга кириб кетди ва келганидан бери биринчи марта ба ўз жойига ўтириди. У, ҳовридан бир оз тушганидан кейин, Қаландаров ҳар нечук ўз қилмишига баҳо бергандир, районга жўнаши олдида хайрлашишни баҳона қилиб сулҳ таклиф қиласар деган хаёлга борди ва шундай қилгани тақдирда ўзини қандоқ тутиш, нималар дейиш режасини фикридан ўтказиб қўйди-ю, юпаниб, иш билан машғул бўлди.

Бироқ икки соатдан кейин маълум бўлдики, Қаландаров районга жўнабди, жўнаш олдида одамларга тегишли гапларини айтиби-ю Саидани ҳатто йўқламабди ҳам. Саидага Қаландаровнинг бояги қилмишидан ҳам кўра ўша қилмишини узр сўраш лозим бўлган гуноҳ деб билмагани кўпроқ алам қилди: «— бу одамга гап уқтириб ўтиришнинг фойдаси йўқ!—деди кичкина муштини столга уриб,—райкомга бориш керак, ўртоқ Носировга айтиш керак! Райком қаттиқ жазо бермаган тақдирда ҳам мен қандай шароитда ишлаёттанимни билиб қўяди-ку!»

Саида Қаландаровнинг феъл-автори ва қилмишлари ҳақида район партия комитетининг бюросига бир мактуб ёзмоқчи бўлди, лекин ҳозир таъби хира бўлгани учун ёзишни кечқурунга қўйиб, мактубнинг режасини тузди: «Милиция. Партия мажлиси ва интизом. Партия-демократияси (Усмонжоннинг бюорога ўтмай қолиши). Хотин-қизларга муносабат. Раҳбарлик ва калаванинг учи. Зулфиқоров масаласи. Шляпа».

Саида кечқурун ҳужрасини ичкаридан беркитиб олиб хатни ёзишга киришганида, Умидадан деразадан бошини тиқиб, ўртоқ Носиров келганлигидан хабар берди. Саида

суюниб кетди, чунки Қаландаров ҳақида ҳар қанчалик тұлық хат ёзилганда ҳам оғзаки айтғанга, айрим нозик нүқталарини оғзаки уқтирганға етмас әди. У, қоғозларини наридан-бери йиғиштириб ёстиқнинг остига тиқди-да, ҳужрани құлфлаш ҳам эсидан чиқиб, саданинг остига қараб чопди.

Саданинг остида одам күп: кечқурун идорага иш билан көлган бригадирлар, звено бошлиқлари, оддий колхозчилар... Носиров Сайдани узоқдан күриш билан үрнидан турди, унга томон бир неча қадам босди, ҳурмат билан сұрашғақ, четланиб йўл берди. Унинг ҳаракатини, муомаласини, сўзлашини, тинглашини кўрган ҳар бир киши ҳеч шубҳасиз, «Ие, колхозимизга келган бу қизнинг ўзи кичкина бўлса ҳам иши каттага ўхшайди-ку» деган гапни кўнглидан ўтказди. Бу ҳол хийлагина эриш ва ноқулай туюлаётган бўлса ҳам Саида буни сездирмасликка тиришиб, ўзини шундай иззат-ҳурматга сазовор бир тарзда тутишга ҳаракат қиласр әди.

Носиров «Ватан» колхозига ўтиб кетаётган экан, афтидан, күп ўтирмайдиганга ўхшаб қолди. Саида шу озгина вақтдан мумкин қадар кўпроқ фойдаланиш мақсадида уни кабинетга таклиф қилди. Носиров унинг хиёл димиққан қовоғи, қони қочган бурни ва билинар-билинмас пирпираётган лабидан йиғи томоғига тиқилиб ётганини, бу йиғининг боиси, ҳеч шубҳасиз, Қаландаров эканини фаҳмлади-ю кабинетга кирмади, шошиб турганини айтиб узр сўради. Унинг колхозга тушиб ўтишдан мақсади Сайдани кўриш, ҳол-аҳвол сўраш, ўнг келса райкомнинг секретари сифатида унга ўзининг ҳурматини кишилар олдида писанда қилиш әди. Унинг назарида ҳозир Сайданинг йиғлаб қиладиган шикоятини эшлиш, унга тасалли бериш, ёш раҳбарни нозик-нотавон қилиб етиширадиган меҳрибончилик бўлар әди.

Носиров жўнаб кетди. Саида ҳужрасига қайтиб буюро номига ёзайтган мактубини битирди ва эрталаб райкомга олиб борди. У райкомнинг эшигидан кириши билан, негадир, мактуб ўзига бачканароқ ёзилгандай туюлди, шунинг учун уни Носировга бермасликка, ҳамма гапни оғзаки айтишга қарор берди; кабинетнинг эшигини очаётганида эса «колхозга кеча бориб дарров арз-дод билан келишим қандоқ бўлар экан» деган андишага борди-ю Носиров диванга таклиф қилиб «қулоғим сизда» дегандай қараганида нима дейишини билмай қолди.

Саида бир оз гангиганидан кейин ўзини ўнглаб олиб, дарҳақиқат шу кунларда фикрини банд қилган масалалардан бири — сиёсий ўқишининг шакллари ҳақида ўзининг бирмунча мулоҳазаларини айтди ва бу ҳақда Носировнинг маслаҳатини сўради. Носиров унинг ҳамма мулоҳазалари тўғрисида ўз фикрини айтди, бурмунча сиёсий тўгаракларнинг тажрибасини гапириб берди, лекин Сайдани райкомга фақат шу масала эмас, ҳозир босилган ва ҳовридан тушган бўлса ҳам, кечаги кайфияти олиб келганини сезиб турар эди.

Қисқа бир муддат ичida Қаландаров бу қизга қанақа ранж-алам ўтказа қолди экан? Носиров агар ҳозир шундан сўз очилса, Саида масалага кўз ёши орқали эмас, ишга хайри тегадиган нуқтаи назардан қараб, соғлом муҳокама юргизишига кўзи етди-ю ўзи гап бошлиди:

— Қаландаровни сиёсий ўқишига тортишингиз қийин-роқ бўлар. Ўқигин дейишса ўзим биламан дер эмис, бетавфиқ!

— Қаёқдан биласиз, ким айтди? — деди Саида шошиб, кейин ерга қараб хўрсинди, — умуман оғир, шароит жуда ҳам оғир...

Носиров унга ер остидан зеҳн солиб, қовоғи бир оз қизарганини пайқади. Демак кечаги алами яна янгила наётибди. Буниниг янгиланишига, кўз ёшига йўл қўймаслик керак эди. Шунинг учун Носиров «шароит жуда оғир» деганида Саида Қаландаровни кўзда тутганини билиб турса ҳам.

— Шунақами? Колхоз неча хўжалик экан? Неча гектар ерга нималар экар экан? — деб гапни бошқа ёқса бурди.

Саида колхоз хўжалигини билмас, қизиқмаган ҳам эди, хижолат бўлди. Носиров саводига жавоб кутиб туриб олди ва ниҳоят, «шуни билмасанг ишни нимадан бошладинг» дегандай қараб қўйди. Шу хижолатлик ва Носировнинг қарави Қаландаров ҳақида куйиб-пишшиб шикоят бошлашга, камида икки соат гапиришга тайёр бўлган Сайданинг шаштини қайтариб қўйди.

— Партов ер кўпми? Қўриқ қанча? — деди Носиров яна.

Саида бу тўғрида ўйлаб ҳам кўрмаган эди, Қаландаровдан шикоят бошлашдан ҳам кўра кўпроқ бу ноқулай аҳволдан чиқиш учун:

— Мен раис тўғрисида, Қаландаров ҳақида гапирмоқчи эдим,— деди.

Носиров Қаландаров ҳақида унинг нима дейишига, кечаги кайфиятининг сабабига жуда қизиқса ҳам Саиданинг сезилиб турган ҳаяжонини босиш, шу билан унинг шикоятини ва бу шикоятдан кузатган мақсадини ишга хайри тегадиган томонга буриш учун лоқайд бир алпозда:

— Шароитни битта раиснинг ўзи ташкил қилмайдику!— деб қўйди ва яқинда чиққан бир романни мақтаб, Саидадан ўқиганми эканини сўради.

Саида Қаландаров ҳақида айтадиган гапига Носировнинг ҳеч бир аҳамият бермаётганига хийла ранжиди, унинг саволига жавоб бермай:

— Шароитни битта раиснинг ўзи ташкил қилмаса ҳам, лекин жуда катта салбий таъсир қилиши мумкин!— деди.

— Мана бу гапингиз тўғри!— деди Носиров,—бу гапингизга қўшиламан. Лекин таъсир масаласида тарозининг сиз томони босиб кетади: салбий таъсир кўрсатишида Қаландаров фақат ўзига суюнса, ижобий таъсир кўрсатишка сиз ҳам ўзингизга, ҳам халқقا, ҳам коммунистларга, ҳам райкомга суюнасиз. Менинг билишимча Қаландаров тошқин сув: тегирмонни бузиши ҳам мумкин, юргизиши ҳам мумкин. Қаландаровнинг бутун кучини, ғайратини, қобилиятини «юргизиш»га буриш учун унинг мана шу икки томонини ўрганишимиз, жуда яхши билишимиз зарур. Биз ҳозир Қаландаров ҳақида нима биламиз? Қаландаров яхши ташкилотчи деймиз, лекин бу чиройли гулдаста қанақа гуллардан боғланганини билмаймиз. Бир нарсани қадрлаш учун уни аввал яхши билиш керак. Қаландаров сояда ўсган деймиз, лекин уни қандай сабаблар сояга тортганини, сояда қолдирганини билмаймиз. Бунга бирдан-бир сабаб райкомнинг собиқ секретари ўртоқ Қодировнинг уни эркаллатгани дейиш хато. Уни соядан чиқариш учун мана шу сабабларни билишимиз зарур. Сояда қолганини Қаландаровнинг ўзи ҳам билиши керак. Уни соядан чиқариш ўшанда осон бўлади. Бунинг учун унинг сояда қолганлиги ўз ҳаётида, колхоз ҳаётида, колхоз хўжалигида нималарга жон бериб, нималарни сўлитганини кўзига кўрсатишимиз, агар кўзини ёғ босган бўлса, халойиқ олдида баланд товуш билан айтиб, кўзини очиши-

миз керак. Биз совринчи ҳам эмасмиз, терговчи ҳам эмасмиз...

Бу гаплардан кейин Саиданинг, партия ташкилоти секретарининг раисдан, сояда ўсган Қаландаровнинг маънавий нуқсонларидан қизишиб эмас, жўн шикоят қилиши ҳам жуда ноқулай бўлиб қолди. Бундан ташқари ундан шикоят қилиш учун йифилган фактларнинг салмоғи, аҳамияти хийла йўқолди. Саида ўйлаб қараса, ҳақиқатан, Қаландаровнинг бояги икки томони ҳақида фикр юргизиб кўрмаган, уни ўрганишга ҳаракат ҳам қилмаган экан. Шундан кейин Саида Қаландаровнинг баъзи бир қилмишларини шикоят тарзида эмас, маълумот тарзида гоҳ афсусланиб, гоҳ куйиб ва гоҳ кулиб гапириб берди. Синчалак ва шляпа тўғрисидаги гапни эшитиб Носиров хўп кулди.

— Дуруст, дуруст,— деди,— ишимизда силжиш бор. Бу гапларни менга арз қилиб айтмаганингизнинг ўзи ишимиз бароридан келаётганини кўрсатиб турибди.

— Арз қилсан иш бароридан келмаганини кўрсатармиди, Тоҳиржон aka? Арзда ҳам арз бор...

— Мумкин,— деди Носиров,— лекин ҳамма арз ҳам ожизлик аломати деб ўйлайман. Билмадим, бу тўғрида болалигимда ёмон таассурот қолганлигиданми... Интернатда ўқиб юрганимда бир куни кўчада бошқа интернатнинг талabalаридан бир бола билан муштлашиб қолдим. Бола жуда эпчил экан, мен битта ургунимча мушт ёғдириб жуда шошириб юборди, роса урди. Йиғлаб мактабга кирдим. Овқатга қўнғироқ чалинган, болалар столовойга кирган, бир мураббийимиз эшик олдида турган экан. Мен йиғлаганимча мураббийнинг олдига бориб арз қилдим, «Фалон интернатнинг талабаси урди» дедим. Мураббий қўлимдан етаклаб столовойга олиб кирди, табуретканинг устига чиқариб, «қани, қўлингни кўтарчи, уришга ярамаса кўтариб туришга ярармикин» деди. Тўқсонта бола овқат еб бўлгунча мен табуретканинг устида ерга қараб, иккала қўлимни баланд кўтариб турдим. Шу-шу, бошқа арз қилганимни билмайман. Рабфакда ўқидим, университетни битирдим, ишладим, олти йил армияда хизмат қилдим, ҳеч қачон ҳеч кимнинг устидан арз қилганим йўқ.

Саида бу гапларни эшитар экан, ичида: «Хайрият мактубни бермаганим, хайрият арз қилмаганим» деб қўйди.

Саида кетгани ижозат сўраганида Носиров ўрнидан туриб, уни әшиккача кузатиб қўйди ва хайрлашар экан:

— Қаландаров чима учун бюрога кирмади? — деб сўради.

Тўсатдан берилган бу савол Саидани гангитиб қўйди.

— Ўзи отвод берди...

— Ўзи? Нега? Бюрони менсимасликми, зардами?

— Иккови ҳам эмас. Мен йўлга солдим. Ҳар қачон ўз ҳукмини ўтказиб ўрганган одам, ишимизга халал берар деб ўйладим.

Носиров кулди.

— Қаландаровни ўзига ўзи отвод бергани кўндира олган бўлсангиз бюро составида туриб ишга халал бер- масликка кўндириш ҳам мумкин бўлар эди-ку? Осонроқ йўл тутибсиз-да...

Саида қаттиқ хижолат бўлди.

— Айтмадимми, мана шунаقا қоқинаман-да...

Носиров хайрлашгани қўл берди.

— Қоқинсангиз майли, эҳтиёт бўласиз, йиқилмайсиз.

Саида райкомдан чиқиб канал кўпригига томон юрди, кўпrik панжарасига кўкрагини бериб узоқ туриб қолди-да, чўнтағидан мактубни олиб майда-майда қилди ва каналга қараб улоқтирди. Шабадада тўзиб кетган қоғоз парчалари елиб, учиб сувга ёғилди.

### VIII

Носиров билан учрашганидан кейин Саида колхоз ҳаётининг ҳар бир соҳасига айрим диққат ва эътибор билан кўз ташлашга, хўжаликнинг ҳар бир тармогини, мурракаб ишлаб чиқариш жараёнининг ҳар бир икир-чикирини, колхозда қимиirlаган ҳар бир жонни яхшироқ билишга ва шу билан бирга, Қаландаровни катта ташкилотчи қилган фазилатларини, уни сояга тортган сабаблар, сояда қолганлигининг ёмон оқибатларини ўрганишга ҳаракат қилди.

Қаландаровни сояга тортган асосий сабаблардан бири, унинг чала саводлиги ва «ўқимаган бўлсам ҳам планни ўқиганлардан яхшироқ бажараман», деган қаноати; иккинчиси, маълум шарт-шароит натижасида танқид, партия интизоми доирасидан ташқарига чиқиб

қолганлиги экан. Бунинг оқибатида Қаландаров шуҳрат-параст, ҳеч кимни ўзига тенг кўрмайдиган, демак ҳеч кимнинг сўзига қулоқ солмайдиган, иззат-обрў келтирадиган план-процент ва даромаддан бошқа ҳамма нарсага панжа орасидан қарайдиган бўлиб қолибди.

Пилла терилиб топширилаётган кунларда «липпа, фалончининг липпаси катта, фалончининг липпаси йўқ» деган гаплар чиқиб қолди. «Липпа» деган сўзни Саида илгари ҳам эшитган, лекин нима эканига эътибор қилмаган, ҳар нечук, пиллага доир бирон камчилик бўлса керак деб ўйлаган эди, ҳозир суриштириб қараса, звено олинган қурт уруғидан мўлжалдан ортиқ пилла топшириб ном чиқариш, устама мукофот олиш учун яширинча уруғ очирап экан. Шу орада бошқа звеноларнинг олди планни тўғсон процента етказар-етказмас район газетаси «Бўстон» колхозининг учинчи звеноси ҳозирнинг ўзида планни бир юз ўн олти процент бажарганлиги тўғрисида хабар босиб чиқарди. Саида суриштириб кўрса бу звенонинг липпаси хийла катта экан; бу ҳақда звено бошлиғи билан гаплашиб, унинг тутган йўли нотўғри эканини, агар ҳамма звенолар шу тахлитда иш тутса нотўғри маълумотлар асосида раҳбар ташкилотлар нотўғри раҳбарлик қилишини, илмий муассасалар нотўғри хulosалар чиқаришини тушунтироқчи бўлган эди, звено бошлиғи унинг сўзларига чандон эътибор қилмади. Саида унга бошқа йўл билан таъсир қилиш мақсадида бу қилмиши гуноҳ эканини айтиб бир оз пўписа йўлига ўтган эди, звено бошлиғи пинагини бузмади, ҳатто бир қадар қўрслик қилди. Кейин маълум бўлишича раис липпадан хабардор, лекин ўзини билиб билмаганга, кўриб кўрмаганга солар экан. Саида бу ҳақда куйиб-пишиб гапиргандা правление аъзоларидан бири қизиқ бир гапни айтиб қолди: турли мавсумда ўтказиладиган турли тадбирлар ҳақида Қаландаров баъзан райком, районжроқўм ва бошқа идораларга қанақа маълумот манзур бўлса шуни берар, «район мендан пахта олсин, ишимга аралашмасин» дер экан.

Саида Қаландаровни сояга тортган сабабларнинг натижаларини қидириб яна бирмунча кўнгилсиз ҳодисаларга дуч келди. Қаландаров чала савод эканини билдиримаслик учун буюриш мумкин бўлган ёзув-чизувни Умидага ҳавола қилса, ўз қўли билан ёзиши зарур бўлган нарсаларни уйида Эшонга ёздириб остига қўл қўяр

экан. Бу ҳол уни маълум даражада Эшондан тилини қисиқ қилиб қўйинбди. Мактабда интизом бўш, ўқитувчиларнинг обрўйи йўқ, давомат жуда паст, ҳар йили мактабга тортиладиган қизларнинг фақат икки-уч процентигина ўнинчи классни битарар, бу аҳвол кўп даражада Қаландаровга боғлиқ экан. Болалар боғчаси гирт оми ва боқчага даромад манбаи ва Ҳуринисонинг хизмати деб қарайдиган Кифоятхон қўлида. Клуб бино бўлгандан бери ўз вазифасини бажарган эмас. «Социализм» колхози билан бўлган мусобақа, Қаландаровнинг баъзи ишларига қараб айтилганда рақобатдан Фарқ қилмайди... Саида мана шулар ва шуларга ўҳшаган бошқа кўп масалалар тўғрисида колхознинг раҳбар ходимлари билан лозим бўлганда очиқдан-очиқ, лозим кўрмаганида суҳбат, маслаҳат тарзида ётиқроқ гаплашди, одамларнинг диққатини шуларга жалб қилиш, кўникканларнинг мудраган фикрини уйғотишга ҳаракат қилди, чунки буларнинг ҳар бири одамларнинг зеҳнига, колхоз ҳаётига озми-кўпми ўрнашиб қолган, чунки Қаландаров нима қилса яхши ният билан қилган, ҳалқ шундай деб билган. Бу камчиликларни чимдид олиб ташлаш билан иш битмайди. Буларни томири билан суғуриб ташлаш зарур. Бунинг учун ҳовлиқмасдан, шовқин солмасдан, умидсизликка тушмасдан сабр ва қунт билан иш кўриш керак, ўшанда бу камчиликларнинг катта-кичик, яширин-ошкора оқибатларини топиб, бу ёмон оқибатларга илфор одамларнинг, шулар воситаси билан бутун ҳалқнинг диққатини тортиш, шу йўл билан бу камчиликларнинг пайини қирқиши, бунга ҳатто Қаландаровнинг ўзини ҳам жалб қилиш мумкин бўлади. Саида мана шу режа билан иш кўриб юрган кунларнинг бирида кутилмаган бир иш бўлиб қолди.

Пилла топширилиб, клуб биноси бўшагандан кейин Саида бир гурӯҳ комсомол-ёшларнинг ёрдами билан клубни яхши безатди ва тезда очилиш маросими ўтказди; очилиш маросимига бағищланган кечада клубнинг вазифалари, режалари ҳақида ўзи қисқагина сўзлаб берди. Кейин ўйин-кулги бошланиб кетди. Ўйин бошда унча қизимаган эди. Саида ўзи дутор чалиб, икки қизни ўйнатди ва бир йигитни ашула айтди. Саида ёш бўлса ҳам ишқилиб раҳбар, гимнастёрка кийиб, қовоғини солиб, салмоқли қадам ташлаб юрмаса ҳам, ҳар нечук, партия ташкилотининг секретари, унинг дутор чалишини

ҳеч ким хаёлига келтирмаган, тасаввур ҳам қилолмаган эди. Бу ҳол ва шундан кейин авж олиб кетган ўйин-кулги ҳаммани Саидага, бир-бирига яқин, жуда ҳам яқин қилиб қўйди. Ўрта ёшлардаги бир аёл Саидани ўйинга солиб, ўзи дутор чалди. Қий-чув бўлиб кетди. Бунинг оқибатида Саида «ўзимизнинг Саидахон» бўлиб, ундан ҳеч ким тортиномайдиган, ҳеч ким истиҳола қилмайдиган, кўнглидаги гапини унинг олдида баҳузур, ҳатто уни орқа қилиб гапирадиган бўлиб қолди.

Клубнинг планига мувофиқ, хотин-қизлар учун «Дин хотин-қизлар ҳақида» деган мавзуда лекция ўтказиладиган бўлди. Лекцияга хотин-халаж Саида мўлжаллагандан ҳам кўпроқ йифилди. Лектор лекциясини тугатгач Саида залга мурожаат қилиб, «саволлар борми» деган эди, бирданига бир неча қўл кўтарилиди. Саида бу аёллар билан илгари ҳам учрашган, лекин уларда бундай активлик кўрмаган, сезмаган эди. Иккинчи қаторнинг бир чеккасида ўтирган озғин, қоп-қора бир хотин қўлини кўтарганича ўрнидан турди.

— Менинг саволим бор...

Саида фоят хурсанд бўлиб:

— Марҳамат!..— деди.

— Менинг битта саволим шуки,— деди хотин,— тенгчилик масаласида... Сўзга чиққан иним «илгариги вақтда хотин-қизларнинг гўри эркакларнинг гўридан яrim газ паст бўлар эди» дедилар. Шундоқ бўлса бордир, тириги тенг бўлмагандан кейин ўлиги тенг бўлмаса нима қипти? Мен тириклар тўғрисида сўрамоқчиман... Нима учун бизнинг колхозда ҳали ҳам хотин-халажга бир кўз билан қаралади-ю, эркакларга бошқа кўз билан қаралади?..

Лектор ўрнидан иргиб турди.

— Кечирасиз, бу савол менинг мавзуимга кирмайди, бу саволга колхоз раҳбарлари жавоб беришлари керак...

Хотин унинг сўзини бўлди.

— Шошманг, саволим ҳали тамом бўлгани йўқ... Менинг жиянним Қундузой жинқарчадай жони билан кетмон чопади, унинг эри, жувоз кундага ўхшаб йилтирамай ўлгур, Исмат-почтачи велосипедда хат, газета ташыйди. Пиёда ташиса ҳам гўрга эди, бир оз озар эди. Почтачи бўлганидан бери иккита велосипедни синдириди. Исмат далага/чиқса-ю, почтани Қундузой ташиса бўлмайдими? Раисга шундоқ десам «Қундузойингиз вело-

сипед минишни билмайди» деб гапимга қулоқ солмади. Нима, Исмат онасининг қорнидан велосипед миниб тушибдими!... Куни бўйи ташиган газетаси-ю, хати беш кило келмайди. Қундузой бечора кечқурун даладан келиб овқат пиширади, боласига қарайди, кир-чир...

Қаердандир чиққан баланд овоз унинг товушини босиб кетди:

— Сув бошидан лой, эгачи, идорани кўрмайсизми, қиличдай-қиличдай йигитлар роҳати бадан кўйлак кийиб, чўт қоқиб ўтиришибди!..

Фовур бўлиб кетди.

— Хотин-қизлар звено, бригадани удда қилолмайдими!..

— Бошқа колхозларда нега удда қилиш у ёқда турсин, қаҳрамон бўлаётиди!..

— Омборчи — эркак, ферма мудири — эркак, дўкон мудири — эркак!..

— Яслига ҳам биронта бўйни йўғонни қўя қолинглар!..

— Эшон бўла қолсин!

Саида ўрнидан турди, қўлини кўтариб ғовурни босди.

— Опалар, сингиллар! Лекторимиз райондан келган одам, бизнинг колхозимизни билмайди, шунинг учун сизларнинг бу хилдаги саволларингга жавоб беришдан ожиз. Бу саволларга мен ҳам дабдурустдан жавоб беролмайман, лекин вақт-соати билан жавоб топамиз, хатомиз бўлса тузатамиз. Аммо мен бир нарсага тушунолмай турибман: шунчалик гапларинг бор экан, саволларинг бор экан, нега шу чоққача индамай келдиларинг? Нима учун бу гаплар ҳозир эсга келди-ю, лекцияни мажлисга айлантириш зарурати туғулиб қолди?

Залнинг ўртасида ўтирган кимdir ўрнидан турмасдан жавоб берди:

— Шу вақтгача ҳеч ким бизни йиғиб ҳолинг нима деб сўраган эмас!

Залда босинқи ғовур кўтарилди. Олдинги қаторда ўтирган тўладан келган бир кампир ўрнидан турди, бир нима демоқчи бўлиб, тиҳсиз, балиқнинг оғзига ўхшаган оғзини бир-икки ростлаганидан кейин баланд товуш билан деди:

— Саидахон, қизим, менда ҳам битта савол бор: раиснинг хатоси топилган эмиш, масаласи қаҷон кўрилади?

Зал жим бўлди. Саида қўрқиб кетди.

— Қанақа хато? — деб сўради ва олдинги қаторда ўтирган Умидага қаради. Умида ҳам ҳанг-манг бўлиб ўтирас эди. — Қанақа хато? — деди Саида яна.

Кампир «бу хатолардан ҳамманинг хабари бор» деган маънода ёнверига, орқасига қаради, ҳеч кимдан садо чиқмагандан кейин хижолат бўлиб:

— Гапирсаларинг-чи! — деди,

— Менинг ҳеч нарсадан хабарим йўқ, — деди Саида. — Ўртоқ Қаландаров шунча йилдан бери шундай катта хўжаликка, шунча одамга бош бўлиб келяпти, нима иш қилган бўлса юзада. Унинг халқдан яшириб юрган бирон гуноҳи, хатоси бор экан-у, ҳозир очилибди деган гап бўлса... билмайман, бекорчи гап!

Ҳар томондан товушлар эшитила бошлади.

— Бунақа саволлар мажлисда берилсан!

— Раисниң ўзи борида гапирилсан!

Саида бу ҳақда бундан ортиқ гапиришни лозим кўрмади, чунки кўп гапириш, тарқалган миш-миш ёлғон эканини исбот қилишга уриниш бу гапларга аҳамият берганини кўрсатиб, унинг асоссиз эканига одамларда иштибо туғдириб қўйиши мумкин эди.

Кейинги уч-тўрт кун ичиди бу миш-миш ғовлаб кетди: «раис келиши билан масаласи кўрилар эмиш. Правлениеда масала ҳал бўлибди. Қаландаровнинг ўрнига одам қидирилаётган эмиш. Сайданинг келиши бежиз эмас экан...»

Саида ташвишга тушиб қолди: Қаландаров, албатта, ой билан кундай — барчага бирдай бўлган эмас, колхозда ундан норози, ҳатто алам ўтган одамлар ҳам борлиги шубҳасиз, шунақа одамлар миш-мишдан фойланиб атрофига одам тўпласа, халқни чалфитса ва одамларни паришонликка, парокандаликка солса унда нима бўлади? Саида Исмоилжон ва Умидा билан кенгашди. Учови правление аъзоларида бир неча кишини чақириб маслаҳатлашди. Ҳамма ҳайрон: бу гапларни ким чиқараётиди, нима учун шу чоққача жим юрган экан-у, ҳозир тилга кириди?

Бу гапларнинг чиқишига сабаб, бир жиҳатдан, Саида партия мажлисида Қаландаровни «чақиритириб ўтқизиб қўйган»и ҳақида тарқалган бўлса, иккинчидан, Умиданинг бир эҳтиётсизлиги бўлганини ҳеч ким, унинг ўзи ҳам хаёлига келтирмас эди.

Умида бир куни ўртоғи билан ҳаммомга тушди. Ўртоғи иссиқ сувни тежаш мақсадида жуда кичкина жўмрак қўйдирган раисдан койинган эди, Умида бюро аъзоси сифатида ҳеч ким билмайдиган нарсаларни билган бўлиб: «раиснинг бундан бошқа хатолари ҳам кўп» деди. Шу ерда бир-иккита хотин-халаж ўтирган эди, улар бу гапга ўзларидан жиндай қўшиб, кўчага: «Раиснинг хатоси топилибди, масаласи кўрилар эмиш», деб олиб чиқишиди. Гап тез ва борган сайин шишиб борар эди. Бунга сабаб, аввало, раисдан ранжиган баъзи одамларнинг «холис хизмати» бўлса, иккинчидан, раисни халқ қанчалик яхши кўрса, уни қанчалик ҳурмат қилса ҳам, ҳарқалай, кўксидা бир оз гина-кудурат борлиги эди. Раис ўзига боғлиқ бўлмаган турли сабаблар билан ҳамиша танқиддан ташқарида бўлиб келгани учун бу гина-кудурат ҳеч қаерда ўртага ташланган эмас, шунинг учун баъзан бригадирлар, идора хизматчилари, ҳатто колхозга алоқаси бўлмаган кишилар етказиган ранж-алам учун ҳам одамлар раисдан ўпкалаб келар эди.

Кенгашда бирор, колхозчиларнинг умумий мажлисими чакириб миш-мишлар ёлғон эканини яхшилаб уқдириш керак, деган фикрни айтди, бирор бу гапларни ким тарқатаётгани ҳақида ўзининг гумонини айтиб, ўша одамни жавобгарликка тортишини таклиф қилди, бирор ортиқча ташвишнинг ҳожати йўқ, раис келса бу гаплар ўз-ўзидан босилади деди. Ҳеч қандай қарорга келинмади. Яна ўйлаб кўргани ваъдалашиб ҳамма тарқалди.

Қаландаров келиб бу гапларни эшитса нима деб ўйлади? Енгиллик қилса бунинг оқибати нима бўлади?

Саиданинг юрагига қил сифмас эди.

## IX

Ҳаво паст келгани учун ғўзаларнинг ривожи суст, ғўза парваришида иши яхшироқ натика берган бригадалар, звеноларнинг тажрибасини бутун колхозга жорий қилиш йўлларини белгилаш мақсадида партбюро масалани очиқ партия мажлисида муҳокама қилгани тайёрлик кўрмоқда эди. Саида кун ёйилмасдан МТС агрономи ва правление аъзоларидан икки кишини олиб далага

чиқиб кетганича машинада, отлиқ, пиёда жуда кўп йўл юриб, шом пайтида ўлардай чарчаб қайтди...

Саида идорага кириб, бугунги почтани кўрмоқчи, иложи бўлса, бир оз чой ичиб, ундан кейин ҳужрасига кирмоқчи бўлди. Идорада ҳеч ким йўқ эди, Саида, қабулхонадаги стол устида турган почтани олиб, кабинетга кирди, деразаларини очиб, чироқни ёқди. У, чироққа яқинроқ ўтириб, почтага энди қўл урганида Зулфиқоров бир чойнак чой, пиёла кўтариб кирди. Саида ҳайрон бўлди: аввали шуки, ҳали чой сўрагани йўқ, ундан кейин, нима учун бу одам чой ташиб юрибди?

— Кечирасиз, ўртоқ Алиева,— деди Зулфиқоров унинг ҳайрон бўлганини кўриб.— Эшон ака йўқ эканлар...

Зулфиқоров чойнакни столга қўйди, пиёлани чайқади, чойни бир-икки қайтарди, қуйиб Саидага узатди, сўнг чироқнинг керосинини чамалаб кўрди, пилигини кўтарди; столга ёпилган баҳмалнинг у ёқ-бу ёғини тортган, тузатган бўлди. Саида унинг ивирсишидан бир гапи борлигини пайқади-ю, пиёлани бўшатгач, чой қуйиб узатди. Зулфиқоров югуриб келиб пиёлани унинг қўлидан икки қўллаб олди, курсига эҳтиёт билан ўтириб, чойнакни олдига тортди.

— Ишлар қалай?— деди Саида.

Зулфиқоров бир оз сукут қилганидан кейин маъюс товуш билан жавоб берди:

— Яхши, опа... Ана у қилган аҳмоқчилигимиз тўғри бўлиб кетганини, Меҳри билан ора очиқ бўлганимизни сизга айтаман деб сира мавридини тополмадим. Мавридини топганимда шу гапни яна оғизга олгани бетим чидамади...

Саида ўйланиб қолди: «Кечагина икки хотинлик бўлишни айб ҳисобламаган одам энди бу ҳақда гапиргани ҳам бети чидамас эмишми? Дарров-а? Раис ҳақидаги миш-мишлардан ваҳимага тушиб қолган эмасмакин?»

— Яхши,— деди Саида.

Зулфиқоров унга мунгфайиб қаради.

— Энди шу гапни кўмиб қўя қолсан...

— Кўмишга қарши эмасман,— деди Саида кулимсираб,— лекин кўмишдан олдин уни ёриб кўриш керак. Биласизми, ўлик тирикнинг жонига ора киради. Докторлар ўликни ёриб кўришади... Мен Меҳрихон билан бир

гаплашмоқчи әдим, сира түғри келтиролмаётбман: борсам қочади, чақиртирсам келмайди... Хотин устига тегишига уни нима мажбур қилди экан, шуни билмоқчи әдим. Шуни билайлик, ана ундан кейин кўмамиз, гўрни чуқурроқ қазиб кўмамиз.

Зулфиқоров эшитилар-эшитилмас:

— Кўнгил экан, нима ҳам деб бўлади...— деди.

Саида кулиб юборди.

— Ҳа, ўзидан ўн олти ёш катта, хотини, олти боласи бўлган одамга кўнгил қўймай иложи борми! Сизни деб, ҳар оҳ тортганида шипдан чанг ёғилгандир... Муҳаббат бечорани жиноятга ошно қилмасангиз-чи!

— Йўқ, мен хотин киши, ёлғизлик демоқчиман,— деди Зулфиқоров хижолат бўлиб.

— Агар хотин киши, ёлғизлик дейиладиган бўлса, унга эр керак бўлса сиздан ўн бир ёш кичик, сиздан ўн ҳисса чиройли бўйдоқ Узоқовга тегар әди. Узоқов ўз вақтида киши қўйган экан-ку!

Саида бу ишга шунчалик қизиққанини, бу ҳақда шунча нарса билганини кўриб Зулфиқоров ҳанг-манг бўлиб қолди.

— Мехрихонни бу йўлга бошлиган муҳтожлик ҳам эмас,— деди Саида давом этиб,— икковларинг топишган вақтларда сиз ҳам звено бошлиғи бўлган экансиз, у ҳам звено бошлиғи бўлган экан. Даромадларингда фарқ жуда ҳам катта бўлмаган-у лекин чиқимга келганда Мехри бир ўзи, сиз ўзингиз билан саккиз жон! Шундай бўлгандан кейин сиз рўзгорингиздан ортдириб унга битта рўмолча олиб беролганингизга ақлим етмайди! Е нотўғрими?

Зулфиқоров индолмади. У, Саиданинг олдига келиб, «аҳмоқчилиги тўғри бўлиб кетгани, Мехри билан ора очиқ бўлгани» тўғрисида бўйинни қисиб гапирганида кўнглига кундан-кун кўпроқ ғулғула солаётган бу можародан ўзини секин суғуриб олишни, шу билан ҳар қандай эҳтимолнинг олдини олиб қўйишини кўзлаган әди. Бироқ Саида бунга оддий бир жароҳат деб қарамагани, унинг остидан бошқа бир иллат қидириб, ҳар бир икир-чикирга айrim дикқат ва эътибор билан қарагани Зулфиқоровни ваҳимага солиб қўйди. У, нафаси қалтираб, «қилт» этиб ютинди-да:

— Энди, опа, ихтиёр сизда.. ҳақ гап шу...— деди.

— Қайси?— деди Саида.

— Аҳмоқчилик бўлган эди. Энди бўлмайди...  
— Энди бўлмаслигига менинг ҳам кўзим етади,—  
деди Саида кетгани қўзғалиб почтани қўлига олар  
экан,— менга сабабини айтинг. Хўп, майли, нима учун  
хотин устига текканини Меҳрихоннинг ўзидан сўрармиз,  
сиз нима учун хотин устига хотин олдингиз?

Саида яна жойига ўтири.

— Аҳмоқчилик...— деди Зулфиқоров ва бошини яна  
ҳам қўйи солди.

— Бу жавоб эмас. Кўп хотин олишни сиз чиқаргани-  
нгиз йўқ, бу нарса бурун ҳам бўлган: бирорни давлат,  
манраб қутуртирган, бирорга беминнат хизматкор керак  
бўлган... Сиз-чи? Давлатингиз йўқ, звено бошлиги бўлиш  
кўп ҳам қутуртирадиган мансаб эмас, ёшингиз бир жойга  
бориб қолган... Эл кўзида шундай маломатли, қонунга  
қарападиган бўлса шундай қалтис йўлга юргани сизни  
нима мажбур қилди-ю, сизга нима далда берди?

Зулфиқоров ерга қараганича жим қолди, афтидан, бу  
саволга жавоб бермоқчи эмас эди. Саида жуда чарчага-  
нини, ҳозир бориб дам олмоқчи эканини айтиб узр сўра-  
ди. Зулфиқоров чойнакни олиб, эшикка томон йўналди,  
чақириб қолармикан деган умидда бўлса керак, битта-  
битта қадам босиб бориб эшикни шошмай очди, чиқиб  
секин, зичламасдан ёпди, қабулхонада бирпас турди-да,  
Саида чироқни пуфлаб ўчиргандан кейин чиқиб кетди.

Саида ҳужрасининг эшигига калит солаётиб дераза  
томондаги каттакон анжир остида оқ шарпа қимиirlага-  
нини пайқади. Шарпа гойиб бўлиб, хотин кишининг «сиз-  
ни пойлаб ўтириб пинакка кетибман» деган товуши эши-  
тилди ва муюлишдан оқ кийинган кимdir чиқиб келди.  
Саида унинг ким эканини билолмади, эшикни очди,  
чироқни ёқиб, аёлни ичкарига таклиф қилди. Остонада  
оқ шойи қўйлак, тақдўзи дўппи кийган, ўзи қора, бўйни  
калта, пакана ва семизгина бир жувон пайдо бўлди.  
Саида курси қўйиб берди. Жувон қоп-қора қўлидаги оқ  
рўмолчасини маҳкам сиқимлаганича бориб курсига  
ўтири. Уйни жуда ўткир совун ҳиди тутиб кетди.

— Мен Меҳрихон бўламан,— деди жувон хиёл қий-  
шанглаб.— Қатнай бериб ўлдим. Сизни ҳеч холи топол-  
майман... Зулфиқоров билан менинг масалам кўрилар  
эмис, шунга кёлдим...

— Қанақа масала? — деди Саида талмовсираб.

— Мажлисда қайсиси хотининг деб танқид қилган

экансиз-ку!.. Шунга айтмоқчи бўламанки, мен у кишига теккан эмасман, у киши мени олган эмас!

Саида бу аёлни дарров ёмон кўриб қолди ва буни яширолмади.

— Зулфиқоров эрингиз бўлмаса кимингиз деб биламиз, ўйнашингизми?

Жувон бир чўчиб тушди.

— Вой, қиз нарса, шунаقا гапни оғзингизга олгани уялмайсизми?

Саида унинг афтига қараб кулимсиради.

— Қилмишингизга ўзингиз яхшироқ, оғизга олса бўладиган бўлак от қўйиб беринг бўлмаса...

Жувон рўмолчаси билан кафтини қаттиқ-қаттиқ ишқаб ерга қараганича жим қолди.

Саида бошда уни Зулфиқоров билан бамаслаҳат келган деб ўйлаган эди, бироқ бири тавба қилиб турғани холда бирининг тониши икковининг бу яқин орада кўришмаганини, эртага маломатга қолиш хавфидан ҳар қайсиси ўзинча, ўз билганича қочаётганини кўрсатар эди.

Жувон Сайданинг, боягидай жавобга сўз қаҳат савалларига қарши ҳеч нарса деёлмаганидан кейин таслим бўлди, ундан мурувват умидвор бўлиб, Зулфиқоров билан бўлган муносабатини ва бу муносабатнинг тарихини гоҳ кўзига ёш олиб, гоҳ кулиб, гоҳ Зулфиқоровни ва гоҳ ўзини айблаб, қарғаб батафсил гапириб берди.

Меҳри онасидан ёш қолган бўлиб, балоғатга етгунича отасининг қўлида ўсган. Отаси уни қирқ иккинчи йилнинг охирларида ўзининг розилиги билан шу колхознинг темирчиси Усмонжон деган меҳнаткаш, одобли бир йигитга берди. Орадан икки ой ўтиб, отаси ўлди. Усмонжон армияга кетди. Бу вақтларда «Бўстон»га уя қўйган раис бошлиқ бир тўда жиноятчилар жуда ҳаддан ошган, ибо-андишани билмайдиган бўлиб қолган эди. Мана шулардан бири Меҳрига чанг солди. Меҳри звено бошлиғи бўлиб кўтарилди. Ҳар йили планини зўрға учма-уч келтириб юрган звено ўша йили бир юз йигирма процент бажарив, Меҳри катта мукофот олди. Бироқ, Меҳрининг ови ўша йили бароридан келди холос, жиноятчилар тўдаси фош қилингандан кейин икки йил устма-уст план тўлмади, учинчи йил зўрға тўлди.

Бу орада Усмонжон армиядан соғ-саломат қайтиб

келди, хотинининг хулқ-ахлоқини фронтдаёқ эшитгани учун, уйига кирмади; аввал темирчилик дўконининг орқасидаги пачоққина бир ҳужрада истиқомат қилди, кейин, колхоз қуриб берган икки хонали уйга кўчди; бир йил ишлаб рўзгор ортдириб, ўша вақтда фермада сут соғувчи бўлиб ишлайдиган Умидага киши қўйди. Меҳри Умидани яхши билар эди: эри урушнинг дастлабки кунларидаёқ ўлган, ҳозир онаси билан туради. Меҳри, гарчи Усмонжондан бутқул умид узган бўлса ҳам, хўп куйди; бир-икки кундан кейин «Умида кўнмабди, мен қайнанамни иккинчи онам деб биламан, онам билан бирға уни ҳам бағримдан чиқармайман деган эмиш» деган гапни эшитиб хўп суюнди. Бироқ Усмонжон икки қайнанали бўлишига розилик берган бўлса керак, орадан бир ҳафта ўтмай тўй бўлди. Тўйдан кейин Меҳри: «Барибир, буларнинг турмуши бўлмайди, бир күёвга битта қайнана ортиқчалик қиласди-ю икки қайнана, хусусан, ўлган эрнинг онаси билан турмуш бўладими», деб ўзини овтиб юрди. Кунлар ўтди. Ойлар ўтди. Меҳри бу оиласа кўз-қулоқ бўлиб қўни-қўшнидан гап олиб юрди. Жимжит. Ёшлиар хизматда, кампирлар ҳурматда. Йиллар ўтди. Булар ўғил кўришди. Меҳри бир куни болани дарвозанинг олдида кўриб ўртаниб кетди, уни маҳкам ушлаб бағрига босди, фижимлаб, юзларидан тишлаб, йиглатиб қўйиб юборди.

Бу орада Усмонжон ўқиб, гараж мудири бўлди. Умидा правление секретарлигига кўтарилиди.

Зулфиқоров Меҳри билан мана шу кунлардан донолиша бошлади.

Бир куни райондан артистлар келиб ойдинда катта концерт беришди. Конферансъе сўзга уста ва жуда қизиқчи йигит экан, ҳар икки номер орасида илгор колхозчиларга тегишиб, қолоқлар тўғрисида тутилмаган гапларни айтиб, ҳаммани хўп кулдирди. Бироқ Меҳрига концерт татимади — ипакчилик звеносининг бошлиғи бўлган бир дугонаси ҳақида конферансъенинг шеър билан айтган мақтov сўзлари уни жуда-жуда ўртаб юборди. Шунда иттифоқо унинг ёнида ўтириб қолган Зулфиқоров Меҳрининг кайфиятини пайқаб, қулоғига «кўп куя берманг» деб пичирлади-ю концертдан қайтишда уни хилватга тортиб: «Бир-бirimизга қарашиб юборсак икковимиз ҳам рўёбга чиқамиз», деган мазмунда шама қилди. «Қарашиш» сўзи Меҳрига бегона эмас,

чунки звено бошлиғи бўлган йили планини ошириб бажарганида, албатта, правление аъзоларидан бири «қарашиб» юборган эди. Шунинг учун бу ҳақда Зулфиқоров иккови тез битишди ва бу йил Мехри Зулфиқоровга, янаги йил эса Зулфиқоров Мехрига «қарашибига» бўлди.

Мехри ўша йили бригадирнинг кўзини шамғалат қилиб звено аъзолари терган пахтадан пича-пича уриб, ўзи терган пахтанинг қарийб учдан бирини Зулфиқоров звеноси ҳисобига ўтказди. Натижада Зулфиқоров звеноси планини бир юз ўн икки ярим процент бажарган бўлди, Мехрининг плани саксон саккиз процентда қолди. Ерсуви, кучи баравар, ҳар жиҳатдан тенг шароитда бўлган бу қўшни звенонинг бири планини ошириб бажаргани ҳолда, иккинчиси нега бажаролмаганини ҳеч ким суриштиrmади. Ҳисобот — сайлов мажлисида Қаландаров Мехрини танқид қилди, Зулфиқоровни мақтаб, бригадирликка лойиқ садам деб атади. Дарҳақиқат орадан кўп ўтмай Зулфиқоров бригадирликка тайинланди. Мехри звено бошлиғи вазифасидан озод қилинди.

Мана шу қалбаки иш Мехри билан Зулфиқоров орасида алланечук яширин бир муносабат пайдо қилиб қўйди. Шунинг учун Мехри звено бошлиғи вазифасидан озод қилинган куни Зулфиқоров кўнгил сўрагани унинг уйига кечаси хуфтондан кейин боришни лозим кўрди ва шунда ҳам эшикдан кирмай девор ошиб тушди. Унинг бу қилмишини Мехри ҳам табиий ҳол ҳисоблади.

Орадан уч-тўрт ой ўтди. Бу орада Зулфиқоров шашарга борганида Мехрига бир кийимлик Марғилон атласи, районга борганида кастрюль-термос, яна бир районага борганида шахмат туфли совға келтирди ва буларни кечалари гоҳ девор ошиб, гоҳ томдан тушиб берди. Ниҳоят, Май байрами арафасида Зулфиқоров чўнтағига бир шиша ўткир вино солиб девор ошиди...

У ҳар сафар девор ошганида, энди колхозда «катта қозиқ» бўлиб қолганини айтиб, Мехрига шон-шуҳрат ваъда қиласар эди.

Иккови бу муносабатни ҳар қанча яширса ҳам, барини, кўпга бормай миши-миши тарқалди, Зулфиқоровнинг хотини эшишиб қолди. Шу важдан Зулфиқоровнинг уйида кўп дилсиёҳликлар бўлди. Хотин дод солиб Мехрининг бошига бормоқчи, уни юлмоқчи, идорага судрамоқчи бўлганда Зулфиқоров «агар шундай қиладиган бўлсанг

бошимни олиб кетаман, олти бола билан қолаверасан» деб қўрқитди. Жуда ҳам ён бермаслик ва бошлаган жанжалини бекорга кетказмаслик учун хотин аразлаб синглисиникига кетиб қолди ва бир ҳафта қорасини кўрсатмади.

Мана шу кунлардан бир куни колхозга райком секретари Қодиров келди. Унинг мўлжали ҳамма бригадаларнинг фўзасини кўриш эди. У, обед вақтигача икки-уч бригадани кўриб, тахминан, обед вақтида Зулфиқоров бригадасига ўтиши керак эди. Шунинг учун Қаландаров Зулфиқоровга ош буюрди. Шунда Зулфиқоров таваккаллик бир иш қилди: ошни дала шийпонида эмас, шу ерга яқин Меҳрининг уйида ташкил қилди. Унинг режасига кўра райком секретари билан колхоз раисининг бу уйга кириши, яна ош ейиши Меҳрининг обрўйини кўтариши, унинг ҳақида гапириб юрган, гапириши мумкин бўлган одамларнинг оғзини боғлаши, шу билан миш-мишларнинг дамини кесиши керак эди. Қодиров Меҳрининг ким эканлигини билмас эди. Қаландаров ош нима учун дала шийпонида эмас, бу ерда қилинганига эътибор қилмади. Зулфиқоровнинг режаси, дарҳақиқат, кутган натижасини берди: эл кўзида Меҳрининг қомати кўтарилди, миш-мишларнинг дами кесилди, ҳатто «Меҳри яна звено бошлиғи бўлар эмиш» деган гап тарқалди. Ҳаммадан ҳам муҳимроғи — Зулфиқоров унинг уйига кечалари эмас, кундуз куни истаган вақтида, девор ошиб эмас, эшикдан кирадиган бўлди. Бу ҳол авваллари халойиқнинг ғазабини, нафратини келтирган бўлса ҳам, бориб-бориб одамларнинг бир қисми кўникди, бир қисменинг эса дами ичиди бўлиб қолди. Шу билан булар орасидаги муносабат ярим расмий тусга кирди. Зулфиқоров бир товоқ ош қилиб домла-имом топиб келди-ю хутба ўқитиб олди.

— Мен бу итга қанақа қилиб иккинчи хотин бўлиб қолганимни ўзим ҳам билмайман,— деди Меҳри ўпкаси ни тутолмай.

Саида унинг силлиқ қилиб тараалган ва йилтилдаб турган сочига, ўз аҳволини идрок этиб мусибатдан бир-пасда сўлигани чўтиирроқ тўла юзига қаради ва ўзича гапиргандай, ўйчан:

— Ит очиқ қолган қозонни ялайди,— деди, кейин сўради:— Хўш, энди нима қилмоқчисиз?

Меҳри бирдан бошини кўтариб унга қаради,

— Билмайман...

— Маълумотингиз борми?

— Етти йиллик...

— Яна ўқийсизми?

Меҳри қўрқиб кетди.

— Нима эди, колхоздан ҳайдайсизларми?

Саида кулди.

— Ҳозир ҳеч ким бунаقا масала қўяётгани йўқ, агар қўйилса мен сизни колхоздан ҳайдамасликка қўл кўтараман. Мен бошқа нарса демоқчиман. Эгри қадам қўйиб йиқилган ўзингиз-у, яна «бевафо дунё» дер эмишсиз, колхоз раҳбарларидан ўпкалар эмишсиз. Колхоздан кўнглинигиз совубди, ишга қўлингиз бормас эмиш. Бир оз шабадалаб, колхозга бошқа эшикдан киринг демоқчиман. Бошқа эшикдан кириб яхши ишласангиз эгри йўлдан бориб эришолмаган мартабага тўғри йўлдан бориш эришасиз. Колхозга агроном керак, телефонист керак бўлади, радиотехник керак бўлади. Янги касб, янги ҳунар кўп. Мен колхозчилардан бирмунча кишини ўқишига юбориш масаласини қўйғанман, бу масала яқин орада ҳал бўлиши керак. Агар ўқишини хоҳласангиз сизни кўзда тутаман. Ким бўлишни хоҳлар эдингиз?

Меҳрининг кўзларида қувонч, миннатдорлик туйғуси порлади.

— Ўқийман! Ўйлаб кўрай. Бирорта ўқишини танлаб сизга айтаман!

Меҳри таъна-дашном, шовқин, дўқ кутиб, қайғу-ҳасратга тўлиб, зор-зор йиғлаб чиқишини бўйнига олиб кирган бу ҳужрадан юрагини зулукдай сўриб ётган алланималардан қутулиб, кўнгли ёришиб чиқди. У, Саида билан хайрлашиб, бир неча қадам босганидан кейин қайтиб деразадан бошини тиқди ва қувноқ товуш билан:

— Саида опа,— деди гарчи Саида ундан саккиз-үн ёш кичик бўлса ҳам,— мени қайси ўқишига муносиб кўрсангиз ўшанга ёзинг! Сиз нима десангиз шу!..

## X

Саида ўзида йўқ хурсанд эди.

Клубда ўтказилган бирмунча тадбирлар шу дамгача ўзини қаёқга уришини билмай юрган йигитларга, қайси тешикдан нафас олишини билмай димиқиб юрган қиз-

ларга, умуман план, процент, мажлисдан ҳам бошқа гап эшишига муштоқ бўлиб юрган аҳолига янги бир олам очиб берди. Булар Сайданинг олдига ҳар куни бир таклиф, бир талаб, бир илтимос, бирон арз билан, бирон маслаҳат сўраб келар ва ҳар қайсиси унинг ҳар бир сўзини тиллога тортиб олар эди.

Мана шу фаолият, шу ташабbus руҳи пахта парваришида илфорларнинг тажрибасини умумлаштиришга бағишлиланган кенгашда ҳам кўринди. Бу хилдаги кенгашлар илгарилар ҳам кўп бўлган, лекин бу кенгашларнинг кўпида илғор киши қайси йўл билан яхши натижага эришганини айтиб бериш, шу билан бирон нарсани майдонга ташлаш ва қўллаш, мавжуд бўлган бирон нарсани рад қилиш, тортишиш, яъни ҳақиқатни юзага чиқариш учун эмас, бирон обрўли киши айтган фикрни ёки юқоридан тушган кўргазманинг тўғри эканини тасдиқладиган қўйма гапларни ғўладай териш учун минбарга чиқар эди. Бу кенгашда ҳар ким ўз фикрини, мулоҳазасини, кўнглига туғиб юрган дардини бамайлихотир, ҳеч кимнинг фикри билан ҳисоблашмасдан, хавотир олмасдан, тап тортмасдан айтиди, истаган таклифини қилди. Докладчи Исмоилжон Норматов охириги сўзида буни мамнуният билан қайд қилди.

Кенгаш ўтган куни кечаси Қаландаровдан телеграмма келди. Қаландаров телеграммани Сайданинг номига юбориб, тўртинчи число соат бир яримга станцияга машина чиқаришни сўрабди. Саида суюниб кетди: «Хайрият, ўз қилмишини ўйлаб кўрибди, «яраш» деб қўл узатэтибди. Шунинг ўзи ҳам катта гап...»

Саида унинг «яраш» деб узатган қўлинни икки қўллаб олиш учун правление аъзоларидан бир-икки кишини ёнига олиб кутгани чиқмоқчи бўлди. Шунда Умида унинг хаёлига ҳам келмаган ва жуда маъқул бир гапни айтиб қолди — раис ҳақида ҳамон ўрмалаб юрган миш-мishларга узил-кесил зарба бериш учун уни кутиб олиш маросимини кенгроқ уюштиришни таклиф қилди. Бу таклифни Исмоилжон ҳам жуда маъқул кўрди.

Партбюро аъзолари, идора хизматчиларидан бир неча киши, бригадирлар, звено бошлиқларидан иборат яқин йигирма киши бўлиб станцияга раисни кутиб олгани чиқилди. Қаландаров поездан тушар экан, буларни кўриб аввал ҳайрон, кейин ўзида йўқ хурсанд бўлди; ҳаяжон ичидаги келиб аввал Саидага қўл берди, кейин

бошқалар билан сўрашди. Шундоқ бўлса ҳам раис «Победа»нинг олдига ўзи ўтириб, Умидга, Исмоилжон ва Сайдани орқасига таклиф қилди.

Бир оз юрилгач Қаландаров кўк саквояждан пачоқ бўлиб кетган бир шляпани олди, тиззасига кийгишиб у ёқ, бу ёғини ростлаган бўлди-да, авайлаб икки бармоғи билан бир чеккасидан кўтариб Саидага узатди.

— Қани, синчалакхон, қизим, мана буни кийиб олинг-чи!..— деди ва шу билан, чамаси, мен сени ўшанда ҳам ҳақорат қилиб эмас, суюб синчалак деган эдим демоқчи бўлди.

Булар орасида бўлиб ўтган можародан на Умиданинг хабари бор эди, на Йисмоилжоннинг. Шунинг учун иккови ҳам тушунолмади: раис нима учун шляпа олиб келибди, нима учун уни синчалак деб атаяпти?

— Аячамга ғалати от қўйибсизми, Арслонбек ака?— деди Исмоилжон.

Қаландаров Исмоилжоннинг саволига эътибор қилмай, колхоздаги ҳол-аҳволни сўради.

Раисни кутиб олгани чиққан кишиларнинг деярли ҳаммаси унинг уйига кирди, лекин кўп ўтирмай, ҳамма ўз юмушига кетди. Саида ўзи ёлғиз қолиб, раис йўғида қилинган ишлар, бўлган гапларни батафсил сўзлаб берди. Қаландаров пахта парвариши тўғрисида ўтказилган кенгашда айтилган гапларни жуда қизиқиб, хурсанд бўлиб эшилди, ҳатто Исмоилжондан мамнун бўлди; клубда аёлларга ўқилган лекциядан кейин тушган саволлар, тарқалган миш-мишларни эшитиб хўп кулди; колхозчилардан бирмунча кишини ўқишига юбориш фикрини маъқуллади ва рўйхатни ўзи кўрмоқчи бўлди; Зулфиқоров билан Меҳри тўғрисидаги гапларни эшитиб жонпони чиқиб кетди ва эртагаёқ мажлис қилиб, икковини ҳам колхоздан ҳайдайдиган бўлди. Бироқ Саида улар орасидаги ғайри расмий муносабатнинг расмий тусга кириб кетишига қисман Қаландаровнинг ўзи ҳам сабаб бўлганини айтганида раис ҳовридан тушди, ҳатто бир оз хижолат бўлди.

— Менинг ҳисботим шундан иборат, қаноатланарли деб топарсиз деган умиддаман,— деди Саида тегишиб.

— Беш! Беш! — деди Қаландаров,— баракалла!

— Энди сиз қачон ҳисоб берасиз? Мусобақадош областда қанақа янгиликлар бор экан, нимасини танқид

қилдиларинг, нималар ўргандиларинг... Эртадан кейин мактабларда ўқиш йилининг якуни тўғрисида очиқ партия мажлиси ўтказмоқчи эдик, биринчи масала қилиб сизнинг ҳисобингизни қўйсак яхши бўлар эди.

— Майли,— деди Қаландаров мамнун бўлиб.— Сен, сизлар шунча иш қилганда мен беш-ўн минут жовраб берсан нима қипти!

— Яна бир нарса...— деди Саида кетгани қўзғалиб,— мактаблардаги коммунистларни ўз ҳисобимизга кўчиртидим. Ҳаммаси ҳар ёқда экан...

Колхозга қарам бўлмаган ва раисга итоат қилмайдиган, шунинг учун партия мажлисларида ўзларини мустақил тутадиган мактаб коммунистларини Қаландаров бир вақтлар райком орқали бошқа партия ташкилотларига ўтказиб, «ортиқча ғалва»дан қутулган эди. Саида партия ташкилотини кучайтириш мақсадида буларни қайтарди ва масаланинг тагидан хабардор бўлгани учун, Қаландаров нафсониятга бормасин деган мулоҳаза билан ҳозир буни айтиб қўйишни лозим кўрди. Қаландаров қошини чимириди.

— Ҳимм... Уша ёқларда юравергани маъқул эди. Ҳеч қайсиси пахтани билмайди, бошқа масала бўлса маҳмадоналик қилиб, қулоқни қоматга келтиради.

Саида ёлғондан ҳайрон бўлиб қолди.

— Ийе, бу ёғидан хабарим йўқ экан... Энди бўлар иш бўлди, Арслонбек aka, қайтармайлик...

Қаландаров ноилож розилик берди.

Саида кетди.

## XI

Раис ҳақидаги миш-мишларни эшишиб «раисликдан бекор бўлмаса гўрга эди» деган ваҳимада тиззалари қалтираб, Саида билан Исмоилжонга эҳтиётан қўш ғалом қилиб юрган Эшон кутиш маросимини кўриб жони кирди-ю, меҳмонлар кетгандан кейин ярим кечагача ўтириб, бу кунларда ўрмалаган гапларни, бўлиб ўтган воқиаларни Қаландаровга тўлиқ ва ҳар бирининг мағзини ўзича чақиб айтиб берди. Бундай кезларда кўп ҳам ҳовлиқмайдиган бўлишига, бунинг устига Эшон гапга келганда бурганинг йўталидан бўрон кўтаришга қодир эканини билишига қарамай, Қаландаров хийла вақтгача ухлол-

май ўйлаб ётди: «Бу қиз кўнглида кек сақлайдиган, ундан ҳам ёмонроғи — шунақа ишлар қўлидан келадиган экан-да! Лекин, шунча ишни қилиб қўйиб, станцияда тухумдан янги чиққан оппоққина, беозор жўжадай чурқиллаганига қойил қолиш керак! Ё алҳазар, жиндақкипа жуссасига шунча айёрик, шунча макр-ҳийла сифса-я! Бошқа ҳеч ишда бўлмаса ҳам айёрикда чиндан ҳам осмонни кўтаргулик чоғи бор-ку!..»

Қаландаров эртасига, кундагидай, саҳарда идорага чиқди, одамлар билан дод-муомаласини битирди, лекин юрагининг бир чеккасини қўрғошиндай босиб, зулукдай сўриб турган ғашлик кайфиятини заррача ҳам юзага чиқармади; Саида билан кечагидан ҳам очилиброқ гаплашишга ҳаракат қилди; уйига кириб нонушта қилди-ю, хўжаликни айланди; чорвачилик фермасини кўриб таъби очилди, бинокорлик бригадасининг ишидан норози бўлди, боққа кириб бирмунча амр-фармонлар берди, идорага кириб бухгалтер билан узоқ сұхбатлашди, паррандачилик фермаси мудирини бир вақт хафа қилган эди, ҳозир кириб бир яхши ишини баҳона қилиб, ўша қаттиқ гапларни кўнглидан чиқарди... Қаландаров хўжаликни айланаб юриб бир нарсани пайқади: ҳамманинг оғзида Саида ва ҳамма унинг номини ёшига номуносиб бир ҳурмат билан тилга олади! Саида «Бўстон»га келгандан бери аёл кишининг меҳри, партия ходимининг адолати, ёшлиқ ғайрати ва иштиёқи билан катта-кичикнинг қалбига йўл топаётганидан, колхоз ҳаётига кириб-киришиб бораётганидан бехабар бўлган Қаландаровни бу ҳол сескантириди, унинг юрагида Эшон тутатган оловни аланг аолдириб юборди. У ўзини овутиш, совутиш, ғазаб туғдидаган фикр-хаёлларнинг хуружига йўл бермаслик учун мўлжалида бўлмаган жойларга ҳам борди.

Қаландаров эртаси кечқурун мажлисга бир қоши паст, бир қоши баланд, қовоқлари қизарган ҳолда келди; деразанинг тагида қаторлашиб ўтирган икки ўқитувчи ва мактаб директорини кўриб бадтар жини қўзғади; докладнинг ундан-бундан олиниб чатилган бош қисмини таталаб, баъзи сўзларга тили келишмай, ёзувнинг баъзи жойларини чиқаролмай ўқиди; оғзаки кўп гапирмади; тушган бир-икки саволга юраги торлик қилиб қисқа ва тўмтоқ жавоблар берди. Докладнинг бемазалигини, раиснинг кайфиятини кўрган одамлар бошқа савол беришмади. Саида докладнинг бош қисмини. Умида айт-

ганидай, Эшон тузганини, оғзаки қисмининг ҳам шу аҳволда бўлишига Қаландаровнинг кайфияти сабаб эканини билди-ю, докладни тайёрлашга ўзи бош қўшмаганига ачинди; унинг кайфиятидан ташвишга тушиб қолди: «нима бўлди экан, кеча ҳамма нарсани очиқ-ойдин айтган эдим, ҳаммасига тушунгган, хурсанд бўлган эди-ку...»

Биринчи масала тугаб, иккинчи масалага ўтилганда Қаландаров ўрнидан турди. «Гаплашиб туринглар-чи» деди-ю чиқиб кетди. Мажлисни олиб бораётган Умидә ер остидан Саидага қаради. Саида кўзи билан «давом эта бер» деб ишора қилди, чунки бошқа чора йўқ, ҳозир, очиқ партия мажлисида уни тартибга чақириш ноқулай эди.

Саида эртасига эрталаб Қаландаровнинг кечаги кайфиятига нима сабаб бўлганини билиш, бирон кор-ҳол рўй берган бўлса шунга қараб иш тутиш учун унга учрашишини зарур топди ва ўқишга юбориладиган колхозчиларнинг рўйхатини кўрсатиш ва маслаҳатлашиш баҳонаси билан учради. Қаландаров, ҳар кунгидаи, саданинг остида одамлар билан муомаласини битириб, чой ичгани энди уйига кетмоқчи бўлиб турган эди, Сайдани кўриб, ўзини хурсанд кўрсатишга тиришди:

— Яшанг, яшанг, синчалакхон,— деди кўзлари атрофида ажин пайдо бўлиб,— болалар бебош бўлиб кетаётган эди, клуб атрофида айлантириб қўйибсиз.

Саида келиб, унинг ёнига ўтирди.

— Армияга бориб келган йигитларимизнинг ҳаракати билан ҳозир клубда радио, мотор, миллий музика тўгаракларининг кўланкаси кўриниб қолди. Лекин ускуна йўқ. Шу тўгаракларни ускуналаб берсангиз... Сметамида фойдаланилмай қолган пул кўп.

— Майли, ҳар қанча пул керак бўлса берамиз.

Сайданинг назарида Қаландаровнинг кайфи чоғ кўринди.

— Яна бир масала, Арслонбек ака,— деди Саида чўнтағидан блокнотини олиб,— колхозда анчагина ўрта маълумотли қизлар бор экан, шулардан ҳар хил мутахассислар тайёрлаб бўлмасмикин? Мен бирқанчаси билан гаплашдим. Шулардан бир қисмини курсларга, ихтисос мактабларига юборсак. Қишлоқда янги касб кўп...

Қаландаров рўйхатни унинг қўлидан олди.

— Тракторист қилмоқчимисиз?

— Йўқ, хотин кишининг трактор минишига қарши-

ман, Уруш йилларининг йўриғи бошқа эди.

Қаландаров унга бир кўз ташлаб рўйхатни ўқиди.

— Шафоат Каримова! Ҳимм... бу хотин эрдан чиққан, уч яшар ўғилчаси бор. Ўғлини кимга ташлаб кетади?

— Онаси бор экан.

— Онаси дардчилоқ. Ҳимм... Нусрат Бадалбоева... ўн йилликни яхши битирган эмас, отаси домлани урмоқчи бўлиб баҳо қўйдирган. Азида Тиллаева... онаси жуда қариб қолган, қишида тўқсон ёшлигини тақдирлаб, кичкина тўй қилиб бердик... Онаси юбормас. Хўш, Лутфи Иноятова... яхши! Ҳожар Турсунова... бир қамчи йўргаси бор. Буни қўя туриңг, бизнинг колхозчилар жуда ҳамиятли, бирон кор-ҳол бўлмасин тағин. Нури Шодиева... жиндай буқори бор, лекин ўзи зеҳни ўткир қиз. Мөҳри... буни колхоздан ҳайдаш керак, бошқаларга ибрат бўлсин! Раъно Жалилова... байт ёзади... Яхши!..

Саида унинг колхозчиларни бунчалик яхши билишини кўриб ҳайрон қолди. У ҳамманинг касб-корини, қандоқ ишлашини, оиласини, феъл-авторинигина эмас, дард-ҳасратини, орзу-армонини, қобилиятини, заиф томонларини ҳам жуда яхши, худди ўзи кўтариб катта қилгандай билар эди. Саида унинг колхозчилар орасида шунчалик ҳурмат ва муҳаббатга сазовор қилган фазилатларидан бири, шубҳасиз, шу деб кўнглидан кечирди.

Қаландаров рўйхатни кўриб бўлиб, Саидага узатди.

— Яхши, қаршилигимиз йўқ... лекин бизни бешолтига кетмончидан маҳрум қилар экансиз-да!

— Йўқ, Арслонбек ака, маҳрум бўлмайсиз. Буларнинг ўрнига қирови тўкилмаган кетмончилар топиб қўйгандан. Маяқул кўрсангиз шуларни кетмонга соласиз. Ҳаммомда иккита хирсадай-хирсадай йигит куни бўйи шахмат ўйнаб ўтиради. Самоварга, менимча, кассирнинг ҳожати йўқ, кассир йигит катакдан кўра далага кўпроқ ярашади. Тахта складидан бир кишини олиш мумкин, склад иши оқсаб қолмайди. Почтачи, баъзи бригадалардаги ошпазлар, гараж қоровули...

Қаландаровнинг қовоқ-тумшуғи осилиб жетди.

— Ҳимм... хотинлар хатомизни топгани тўғри экан-да!

— Йўқ, Арслонбек ака, сиз буни атайн қилган эмасиз. Бу ҳол фақат бизда эмас, бошқа колхозларда ҳам учрайди. Ишлабчиқаришда, жамоат ишида эркаклардан қолишмагани ҳолда яна бола туғиб ўстирадиган аёл-

ларга жамият ва давлат алоҳида ғамхўрлик қилиши керак деган гапни ҳали кўп одамлар яхши тушуниб етган эмас.

Қаландаров унга кўз қирини ташлади.

— Хўп, мана, сиз тушуниб етган бўлсангиз хотинларнинг танқидини амалга оширинг!

Саида қалтироқ гап айтиб қўйганини пайқаб ҳазилга ўтди.

— Шундай чироили танқидга қулоқ осмай бўладими! Гапни қаранг-а: «қиличдай-қиличдай йигитлар роҳати бадан кўйлак кийиб чўт қоқиб ўтирибди!»..

Қаландаров кулмади ва анчадан кейин бирдан:

— Хўп, майли! — деди ва бир оз жим қолганидан кейин давом этди,— ҳисобли дўст айрилмас деган гап бор, орамиздаги баъзи бир гапларни ҳисоб-китоб қилиб чўтдан чиқариб ташласак дейман...

Саиданинг юраги шув этиб кетди.

— Марҳамат... нима гаплар экан?

— Бутун бир рўзгорни кўтарган туяга битта элак оғирлик қилган экан. Бизнинг жияннимиз тўғрисидаги арзимайдиган масалани пардозлаб кеча мажлисга солганингиз менга унча ботмай турибди. Үн бир яшар қиз болани эгов қилиб, бизнинг обрўйимизни эговламасангиз ҳам бўлар эди. Бу тўғрида мактаб директори, ўқитувчилар гапирса ўзимга олмас эдим, нега десангиз, маҳмадоналик — касби...

— Арслонбек ака, биз масалани тайёрлашга, ўтказишга шунчак вақт, шунча меҳнат сарф қилганимизда наинки бироннинг обрўйини тўкиш ёки биронга обрў туғдиришни кўзлаган бўлсак! Мен сизнинг жияннингизни интизомсиз болалардан дедим. Ундан ҳам интизомсиз болалар кўп, лекин мен жўрттага сизнинг жияннингизни мисолга олдим. Сиз буни тушунарсиз деб ўйлаган эдим. Тушунмаслигингизга ишонмайман...

Қаландаров дўғайди.

— Нима қипти интизомсиз бўлиб?

— Ўқитувчининг баҳо қўядиган дафтарини ўғирлаб зовурга ташласа, ёнида ўтирган боланинг чўнтағига сиёҳ қўйса, синфда ҳамиша сақич чайнаб ўтиrsa-ю ҳеч ким уни тиёлмаса...

Қаландаров дўнғиллади.

— Сақич чайнаса чайнагандир, қиз бола, лекин бошқасидан хабарим йўқ!

— Ҳамма иллат мана шунда! Кўп ота-оналар мактабда болалари нима қилиб юрганидан, қанақа ўқиётганидан бехабар, ўқитувчи хабар бергани, гаплашгани келса, ота «онасига айт» дейди, она отасига ҳавола қилади — иккови ҳам қулоқ солмайди.

Қаландаровнинг аччиғи келди.

— Ўқитувчи бўлиб нон егандан кейин болаларни ўзига ром қилсин, босиб олсин-да!

Саида кулгига олди.

— Қанақа қилиб? Масалан, сизнинг жиянингизни ўқитувчи ўзига қанақа қилиб ром қилиши, босиб олиши мумкин? Сиз жиянингиз олдида ўқитувчини сенсирасангиз, унинг шаънига ҳар хил гаплар айтсангиз, калака қилсангиз, иш буюрсангиз...

Қаландаровнинг жағи қимирлаб, томирлари бўртди, қулоқларигача қизариб кетди. У, энгашиб, этигининг қўнжини тортар экан:

— Бизнинг устимииздан арз қилмаган одам қолмабди-да... жиноятимиз кўп, майли, пешонамииздан кўрдик! — деди.

Саида юраги сиқилиб, бирпас нима дейишини билмай қолгандан кейин, ёлворган тарзда деди:

— Арслонбек ака, ҳозир икковимиз жуда муҳим иш тўғрисида яхши гаплашиб ўтирибмиз, нима қиласиз шундай суҳбатни айнитиб!..

Қаландаров унинг гапини ҳам, ўзини ҳам писанд қилмаганини таъкидлаш учун ёнбошлади.

— Мендан жиноят топиб, масаламни қўйишга ишқибоз одамлар илгари ҳам бўлган, лекин ҳеч қайсиси удда қилолган эмас!

Саида унинг кеча тўқими тескари бўлиб юргани ва ҳозир қилдан қийиқ топаётганининг сабабини дарров фаҳмлади: «Раиснинг хатоси топилган эмиш, масаласи қачон кўрилади» деган миш-мишга кимдир лиbos кийгишиб унинг юрагига фулғула солган.

— Арслонбек ака, иғвогарларнинг гапига ишонманг...

Қаландаров унинг сўзига қулоқ солмай давом этди:

— Қаландаровнинг масаласи кўрилар эмиш деганда Қаландаровга орден чиққан эди! Масаласи кўриладиган Қаландаров орденини ўртоқ Калининнинг ўз қўлидан олган эди! Ўртоқ Калинин унинг қўлинин маҳкам сиқиб:

«Табриклайман, ўртоқ Қаландаров», деган эди! «Қаландаров масаласи кўрилар эмиш», деганда «Қаландаров ер билан яксон бўлиб ётган «Бўстон» колхозини кўтариб берсин», деган таклиф тушган эди!

— Арслонбек ака,— деди Саида яна ёлвориб,— иғвогарларнинг миш-мишига қулоқ солманг. Мен бу ерга хато топиб масала қўйгани эмас, сизга, колхозга қўлимдан келганича ёрдам бергани келганман. Бу миш-мишларнинг маъносини, сабабини айтган эдим-ку...

Қаландаров кўзларини ўйнатиб унга яқин келди ва қаттиқ шивирлади.

— Миш-миш? Раиснинг ҳали бурни қонамасдан туриб, унга қазилган гўр устида дутор чертиб, чилдирма базм қилганингиз ҳам миш-мишми? Лекция баҳонаси билан хотин-халажни чувиллатганингиз, раисга қарши қўйганингиз ҳам миш-мишми? Атрофингизга одам тўплаб, мактабдаги коммунистларни олиб келганингиз ҳам миш-мишми?

Саида малол келган бир алпозда:

— Шу гапларни ётифи билан гаплашайлик,— деди.

Қаландаров ўшқирди:

— Эндими? Ётифи билан гаплашиш энди эсингизга келдими!

Саида унинг юзига тик қаради.

— Шовқин солманг, атрофда одам бор! Менга ола-бўжи бўлманг; ёш бола эмасман... қўрқмайман!

Қаландаров, сурма ичгандай, шивирлаб шовқин солди:

— Биламан, сиз қўрқмайсиз! Суянган тогингиз ба-ланд! Ўртоқ Носировга ҳеч кимнинг бўйи етмайди!

Саида яна совуқонлик билан деди:

— Мен ҳеч кимга суянмайман, йиқилиб кетаётганим йўқ. Суянчиқ зарур бўлиб қолса Совет ҳокимиятига суя-наман...

— Ҳа-ҳа, шунақами, қаматиб қўяссанми!. Мен ҳам ҳеч кимдан қўрқмайман!!

Шу пайт Ўмидадан идорадан чиқиб садага томон кела бошлиди. Қаландаров унинг бу ерга келиб, кайфиятдан можарони билиб қолишини истамай дарров ўрнидан турди, сўридан тушиб, унга томон юрди. Уни кимдир телефонга чақираётган экан. Қаландаров телефонда гаплашди, кейин нонушта қилгани уйига қараб кетди; йўл бўйи, ва бутун нонушта давомида борган сайин диққат бўлиб,

тажанглиги ошиб, ниҳоят, Носировнинг олдига боришга, Сайданинг дастидан дод деб, унинг бутун қилмишларини бирма-бир айтиб беришга, колхоздан ё мени ол (раисликдан олиннамаслигига амин эди), ё Сайдани ол деб ультиматум қўйишга қарор берди.

Унинг авзойини кўрган шофер, маршрут оғзидан чиқиши биланоқ, бир босишда машинани вифиллатиб катта йўлга олиб чиқди-ю, ҳаял ўтмай, соатига саксон километр қўйиб, район йўлидан уча кетди. Қаландаров Сайданинг бутун қилмишларини илга тизиб, ҳар қайсисига ўзидан пича-пича қўшиб, ўқланган милтиқдай бўлиб бораар эди. Йўл ярим бўлганда унинг кўнглига: «Эркак бoshim билан аёл кишининг устидан арз қиламанми» деган гап келди-да, ўз-ўзидан хижолат бўлиб, беихтиёр рулга тармашиб, шоферга: «қайтар!» деб бақирди. Шофер бирон ҳодиса бўлди шекилли, деб шундай тез бурилдники, машина йўлга кўндаланг бўлганида ағнаб кетаёзди.

Машина яна ўша суръат билан қишлоққа томон уча кетди. «Сайданинг устидан арз қилишга арзимайди» деган қаноат Қаландаровнинг таъбини очиб юборган эди, бироқ машина қишлоққа яқинлашган сайнин яна кўнглига ғашлик чўка бошлади: «Бу синчалакни уролмасам, сўколмасам; маҳмадона экан, гапига қарши гап тополмасам... Бунақада обрў қолмайди-ку!»

Қаландаров бир нарсага жазм қилди-ю тўғри идорага кирди, кабинетига кириб, Сайдани йўқлади. Саида кутубхонада экан, Умида бориб айтиб келди. Қаландаров ишни шовқин солмасдан, қизишмасдан яхшиликча битирмоқчи бўлди, шунинг учун Саида кирганда:

— Келинг, ўтиринг,— деб жой кўрсатди.

Саида ҳайрон эди. Қаландаров иложи борича осоишишта гапиришга ҳаракат қилди.

— Гап бундай, Саидахон... икковимиз бир қозонда қайнайолмаётимиз. Мен қизиқёнроқ, бунинг устига қўполроқ одамман. Сиз ёшсиз, бунинг устига аёл кишиносиз, ўқиган қизсиз... Ҳар қайсимиз ўз иззатимизда қолсак... Мен жон деб кетар эдим, лекин колхозга кўп меҳнатим сингган, бундан ташқари кетгани қўйишмаса керак деб ўйлайман...

Саида лабини кулгидан аранг йиғиштириб:

Кетгин демоқчимисиз?— деди.

— Тушунадиган одамнинг садағаси кетсанг... Ариза беринг! Мен ўртоқ Носиров билан гаплашаман.

Саида бош чайқади.

— Мен бу ерга ариза бериб келган эмасман, ариза бериб кетмайман. Умуман кетмайман!

Қаландаров ғижинди ва нима дейишини билмай:

— Колхоз ёқиб қолган бўлса эр-пер топиб бера қолай...— деди.

Саида унинг афтига қаради.

— Мен сизни фақат яхши пахтакор деб билар эдим, бошқа касбингиз ҳам бор экан!..

Қаландаровнинг дами ичига тушиб кетди, бир лаҳзадан кейин яна тutoқди.

— Жиноятим бўлса айтинг, мен ариза берай бўлмаса!..

Саида бир оз жим қолганидан кейин ҳамон бир зайлда осоииштагина деди:

— Мени бу ерга жиноят қидиргани юборишгани йўқ, жиноят қидириш керак бўлса мени эмас, ўткир бир терговчини юборишар эди.

— Жиноятимизни топиб, масаламизни қўймоқчи бўлиб турибсиз-ку.

Қаландаров бўлар-бўлмас гапларни тахлаб, ўз назида, Сайдани жуда пийпалаб ташлади. Саида бошини қуий солиб лом демасдан хўп эшилди-ю Қаландаров ҳордигини чиқариб бўлгач бошини кўтарди.

— Арслонбек ака, узоқ вақт танқид кўрмай жуда нозик бўлиб қолибсиз. Анчайин танқид сўзи сизга ўқдай тегадиган бўлиб қолибди.

Қаландаровнинг жони чиқиб кетди.

— Ёлғон! Тұхмат! Танқиднинг маъносини ўзингиз тушунмас экансиз. Танқид еган одам хурсанд бўлиши керак, чунки мевали дарахтга тош отилади!

— Мана бу гапингиз тўғри,—деди Саида.— Шу гапни чин кўнгилдан чиқариб айтиётган бўлсангиз, ижозат беринг, мен сизга бир-иккита тош отай... Кечаги докладингизни олайлик. Шу ҳам докладми? Не-не умидлар билан йигилган халойиққа нима бердингиз?

Қаландаров қаттиқ хижолат бўлди, лекин сипоҳгарчиликни қўлдан бермай дўнғиллади:

— Қўлимдан келгани шу... гапга уста эмасман...

— Бекор гап, Арслонбек ака! Бўлар-бўлмас гапларга қулоқ солиб тажанг бўлмасдан тузукроқ ўйласангиз, Эшонга ёздирмай, билганингизча ўзингиз гапирсангиз бунақа бўлмас эди.

Қаландаровнинг кўзлари олайиб кетди.

— Ким айтди сизга Эшон ёзган деб?

— Ўқиган ёзувиңизга кўзим тушган эди. Эшоннинг хатини яхши танийман, бухгалтерия ҳужжатларида кўп учрайди.

Қаландаровнинг қути учди: дарҳақиқат, резолюция қўйиладиган қоғозларга резолюцияни Эшонга ёздириб ўзи қўл қўйиб юрар эди.

— Хатимиз бадхатроқ...—деди Қаландаров ва шу билан докладни ҳам ўзим айтиб ёздирганман демоқчи бўлди.

Саида унинг, ҳар нечук, иқрор бўлганига суюнди-ю, қаттиқ тегмасин деб, чала савод эканини юзига солмади, бошқа гапга ўтди.

— Кечирасиз, Арслонбек ака, ўрни келиб қолди... Эшоннинг хотини масаласи. Ўз боласи юз ўгиридан тарбиясиз, жоҳил бир хотинга болалар боғчасини топшибириб қўйганингиз тўғрими? Отига Ҳуринисо опам мудир бўлсалар ҳам боғча Кифоятхоннинг қўлида. Боғча лоақал ўрта маълумотли педагог қўлида бўлиши керак. Ҳуринисо опам ўқиган, бир вақтлар туппа-тузук ўқитувчилик ҳам қилган эканлар, ҳозир нега ишламайдилар? У кишини уй-рўзғор иши билан банд деб бўлмайди, майда болалари йўқ... эртадан кечгача нима қиласидилар? Зерикмайдиларми? Агар шуни озодлик деб билсаларинг, бунақа озодликни ҳеч ким ҳавас қиласиди! Наинки одам эгилиб, ариқдан бир пиёла сув ололмаса...

Қаландаров сукут қилиб қолди. Шу пайт Ҳуринисо уйдан телефон қилиб, Козимбек келганидан хабар берди. Қаландаров шошиб чиқиб кетди. Суҳбат чала қолди, лекин Саида бунга ўқинмади — унинг бошқа камчилик ва хатолари тўғрисида ҳозир гапириш нияти йўқ эди, чунки, дарҳақиқат, бутун рўзгорни кўтарган туяга битта элак оғирлик қиласа-ю нўхтасини узса, уни яна шу хилда сукут қилдириш осон эмас эди.

Саида яна кутубхонага кетди.

## XII

Қаландаров ўғли Козимбекни қаттиқ соғинган экан, бутун кунини уйида ўтказди.

Кечаси ётишда у аллақачон уйқуга кетиб пишиллаб, қарийб бутун ўринни эгаллаб ётган хотинини зўрға нари

сурар экан, унинг бунчалик семириб кетганини энди пайқади ва Саиданинг гапи эсига тушди: «Наинки одам эгилиб, ариқдан бир пиёла сув ололмаса!..»

Рост, нима бўлиб Қаландаров шу чоққача шунга эътибор қилмаган экан!

Унинг бошида бирдан Саиданинг доклад тўғрисидаги гапи айланиб қолди: «Шу ҳам докладми? Не-не умидлар билан йифилган халойиқча нима бердигиз?..»

Қаландаров ўйланиб қолди, лекин уни бу гаплар ҳақ эканлиги эмас, Саидадан чиққанлиги кўпроқ банд қилди: «битта-иккита гапи тўғри чиқиб қолса, бу синчалак, ҳовлиқиб кетмасмикин!»

Бу ҳақда ўйлаган сайин унинг кўнглига ғашлик туша берди, ниҳоят, устига тоғ қулаб келаётгандай бўлди. Эрталаб турганда унинг кўксида Саидага нисбатан аллақандай бир адоват пайдо бўлган эди.

Соат еттиларда Умida Саиданинг эшигини қоқиб, раис йўқлаётганини айтди. Саида дарров кийиниб чиқди. Қаландаров сада остида одамлар билан гаплашиб ўтирган эди, уни кўриб тўсатдан:

— От минганимисиз?— деб сўради.

Саида илгари от мингани эмас, колхозга келганидан бери бир оз мингани эди.

— Унча-мунча...— деди.

— Урганиш керак!— деди Қаландаров.— Колхозчилик!.. Fўзаларни бир кўриб келайлик...

Саида колхозга келганидан бери далани кўп айланган бўлса ҳам раис билан юрмаган, уни одамлар орасида, одамлар билан муомаласини кўрмаган эди, шунинг учун жуда хурсанд бўлди. Унинг «колхозчилик» деганидаги кесатиқни пайқамай:

— Яхши бўлади! — деди ва юрганича ҳужрасига кириб, қайта кийиниб чиқди.

Дарвоза олдида Эшон саман от билан кўк тойни жиловлаб турар эди. Қаландаров кўк тойни Саидага берди, саманин ўзи минди.

Той шўх экан, бирон километр юрмасданоқ Саидани толиқтириб қўйди: бошини қўйиб берса суриб кетади, тортса ўйноқлайди... Иўқ, хайрият, раис тез-тез тўхтаб, одамлар билан узоқ-узоқ гаплашиб-ю Саидага дам олишгина эмас, унинг одамлар билан муомаласини кузатиш, ҳатто баъзи бир нарсаларни дафтарчасига ёзиб

олиш имкониятини берди. Шундай узоқ тўхталган жойлардан бири теплица бўлди. Буларни соч-соқоли бодроқдай оппоқ бир чол қарши олди. Раис отдан тушиб у билан сўрашди, узатган бир пиёла чойини олиб, ҳол-аҳвол сўраганидан кейин:

— Кечаким шовкин бўлди, отахон? — деб сўради.

Кулиб турган чолнинг чеҳраси бирдан ўзгарди, ёнидаги милтигини бенхтиёр қўлига олди.

— Шофер бола... кейин билсан Ўроқбойнинг ўғли экан. Шу бола бухгалтердан бир кило памидорга қофоз олиб келди. Болаларга самовар қўяётган эдим, ана терилган памидор, ўзинг тортиб ола қол, дебман. Тортиб олди. Жўнаб кетаётганида кўнглим тинчимади-ю, бориб қарай дедим. Бориб машинасини қарасам, навзам билло, бир кило қаёқда, беш килоча памидор турибди! Тўхта,.. бола, отиласан дедим!..

Саида бу сухбатни жуда диққат билан кузатди...

Чол бу гапларни нақадар ҳаяжон билан гапирса, Қаландаров шунчалик жиддий қулоқ солар ва оғзини, кўзларини катта очиб, дамба-дам бош чайқаб қўяр эди.

— Яхши қилибсиз, отахон,— деди ниҳоят,— яшанг! Лекин шу гап шу ерда қолсин. Помидордан тегишини олиб кетдими?

— Йўқ, ҳаммасини ташлаб, қочиб кетди. Зинанинг тагида турибди.

— Ундоқ бўлса шоферлардан биронтаси келиб қолса бериб юборинг, обориб онасининг қўлига берсин. Раис бериб юборди десин.

Чол хўп деди-ю ҳайрон бўлганича қола берди. Саида дафтарчасига қайд қилиб қўйди: «Помидорни раис номидан унинг онасига элтиб беришади. Воқиадан хабари йўқ онаси хурсанд бўлади ва ўғли келганда ундан раиснинг йўқлашига лойиқ нима иш қилганини ёўрайди. Шунда бола қай аҳволга тушар экан? Бу нарса умр бўйи эсидан чиқармикин?»

Отланишиди. Саида ҳордиги буткул чиққан ва тойга ўргангандай бўлди, бироқ ярим километр юрмасдан яна чарчади ва раис қамчининг сопи билан бир эшикни қоққанда яна бир оз дам олишга улгуарман деб отдан дарров тушди. Жуда пишиб қолган бир кампир чиқди, икки билаги билан кўйлагининг устидан иштонини кўтариб, Қаландаровга хира кўзларини тикди.

— Арслонбекмисан?

— Ҳа, мен, она,— деди Қаландаров.— Жиянингизни олиб кетгани келдим. Иш топдим.

— О, болам,— деди кампир,— ишга ярамайди! Ақли бўлмаса, кучи бўлмаса...

— Мен топган ишга ақл ҳам керакмас, куч ҳам, лекин ярим меҳнат куни олади. Одамнинг чиқити бўлмайди, айтиб чиқинг!

Кампир иккала билаги билан яна иштонини кўтари-ди-ю кириб кетди ва ҳаял ўтмай қизил яктак-лозим кий-ган, ўттиз ёшлардаги жуда озғин, тиф тегмаган соқол-мўйлови патак бўлиб кетган бир йигитни бошлаб чиқди. Қаландаров йигитни йўлакай ҳаммомда қолдирди ва йўлда унинг ҳақида Саидага гапириб берди. Йигит боя-ги кампирнинг жияни бўлиб, туғма эси паст, холасининг уйига яқинда келган экан. Қаландаров уни ҳаммомнинг гўлахига мўлжаллабди. Гўлахга қипиқ ёқилар экан, ҳам-момчи уни оз-оз ташлаб ёндиргани эриниб, замбиллаб ташлар экан. Замбиллаб ташлаганда қипиқ ёнмай тутаб тамом бўлар экан. Энди бу йигитнинг вазифаси қипиқни тез-тез кураклаб ташлаб туриш, шу йўл билан уни тўла ёндириб, исроф қилмаслик экан. Саида катта бир нарса кашф қилгандай хурсанд бўлиб, дафтарчасига ёзиб қўйди: «Одамнинг чиқити бўлмайди».

Ҳаммомдан сал нарида сельсоветнинг секретари уч-раб раис учун Қаландаровдан қирқта пишиқ ғишт сў-ради.

— Ҷақасини бухгалтерияга тўланг, болалар ўзлари элтиб беришади,— деди Қаландаров.

Секретарь кулди.

— Уч сўмлик важ, шунга ҳам бухгалтериями!

— Тўкилгандан томчилаган ёмон, ука, томчилаган ёмон! Тўкилгани киши дарров пайқайди, томчилаганни узоқ пайқамаслик мумкин,— деди Қаландаров ва отга қамчи босди.

Секретарь орқадан баланд овоз билан:

— Колхознинг пўлат сандигига Арслонбек aka қулф эмас, ўзини осиб қўйган!— деб қичқирди.

Раис яна ким биландир гаплашиб қолганда Саида атайин отдан тушиб, дафтарчасига ёзиб қўйди: «Тўкил-гандан томчилаган ёмон. Пўлат сандиққа қулф эмас, ўзини осиб қўйган».

Қишлоқдан чиқилгунча яна бир неча жойда тўхтал-

ди. Саида тойнинг шўхлигидан ҳам кўра тушиб чиқаберишдан кўпроқ чарчади.

Дала йўлига чиқилганда Саида бир тажрибасизлик қилди, той ҳадеб суришга интила берганидан «бир чоптирай, зораки чарчаб, бир оз босилса» деган хаёлда бошини қўйиб берди. Шунга маҳтал бўлган той бирдан кўтариб кетди. Саида ҳарчанд бошини тортмоқчи бўлса ҳам, худди тушида уринаётгандай, тортолмас эди. У, эгарнинг қошини икки қўллаб маҳкам ушлаганича энтикиб, дод дегани нафасини ростломмай борар эди; назарида минг километр кўринган бир неча юз метр масоғани босганидан кейин нима бўлиб ҳушини ўнглади-ю, жиловини силтаб тортди. Той бирдан йўлга кўндаланг бўлиб ўйноқлади, пишқириб олдинги оёқларини кўтарди, чопгандан кейин чарчаб босилиш ўрнига бадтар бўлди. Саиданинг белига оғриқ кирди, тақими шилингандай бўлиб ачишди. У қўрқувдан, оғриқдан не аҳволда, рангрўйи қандоқ эканини ўзи тасаввур қиласр эди, шунинг учун Қаландаров етиб келиб аҳволини кўрса дарров ювош саманини бериб, ўзи тойни минишига умид боғлади. Қаландаров Саидага бирон шикаст етадиган бўлса олдини олиш мақсадида тойдан ниҳояти бир неча метр орқада келмоқда эди, Саида тойни енгиб олганини кўриб хотиржам бўлди-да, индамай ўтиб кетди, сал нарироқча бориб орқасига қаради:

— От миниш аёл кишининг ҳунари эмас, лекин сиз отга анча ярашдингиз! — деди.

Шундан кейин Саида унинг ниятини фаҳмлаб қолди-ю бўй бермасликка тиришиб, жони оғриб турса ҳам ҳазил қилди:

— Мен отга эмас, от менга ярашгандир!

Яна уч-тўрт километр йўл юрилгач саккизинчи бригадада дала шийпонида нонушта қилинди. Агар бирон жуда муҳим иш чиқиб қолмаса раиснинг «бригадаларни шундоқ бир айланиш» одати йўқ эди, бугун яна партия ташкилотининг секретари билан келганига бригадир ҳайрон ва ташвишда қолди. Шу атрофда ишләётган колхозчилар эса ниманидир кутиб, шийпон томонга тез-тез қараб қўйишар эди. Қаландаров наридан-бери бир-икки пиёла чой ичганидан кейин фўза оралагани ўрнидан турди. Саида белига кирган оғриқ биқинига тарқалгани, сонлари тарашадай қотиб, тақими ачишиб турганига қарамай ундан бир қадам ҳам орқада қолмасликка тиришди.

Раис катта йўлдан ичкарида бўлган икки звенонинг ғўзасини оралади, ҳеч бир қусур тополмай, чеҳраси очилиб, шийпонга томон юрди: йўлда учраган бир боладан касал ётган отасининг аҳволини сўради ва бугун кечқурун бориб кўрмоқчи эканини айтди; яқинда эрга теккан бир жувондан турмушини сўради; ўғли тасодифий равишда бирорвни ов милтиғи билан отиб, оғир ярадор қилган бир чол билан узоқ гаплашди, областга боришда унинг номидан ариза ёзиб, район прокурорига кирганини, қайтишда яна хабар олганини, прокурорнинг қатъий ваъдасини айтиб, мўйсафидни тинчтитди... Саида оғриқ жонини олаётган бўлса ҳам дафтарчасига қайд қилиб қўйди: «Қаландаров ким билан нима тўғрисида гаплашмасин, бугун шундан бошқа иши ва бўлак ташвиши йўқдай шошмасдан, жуда берилиб гаплашади ва у одамларда раис мен билан гаплашгани ёки менга шу гапни айтгани атайин келибди деган таассурот қолдиради. Уни колхозчиларнинг ҳурмат ва муҳаббатига сазовор қилган хислатларидан бири шу бўлса керак».

Қаландаров бригадир билан хайрлашишда унга «баракалла» деди. Раис ҳеч қачон бундан ортиқ гап айтмаса ва шуни ҳам ҳар қачон айта бермаса керак, бригадир гул-гул очилиб кетди. Саида бунга ҳам эътибор қилди.

Саида тойини мингани эмас, дийдорини кўргани юраги безилласа ҳам ноилож бориб ечди. Қаландаров буни сезиб, бир қадар ўнгайсизланди шекилли, бригадирнинг қўлидан саманинг жиловини олиб, Саидага берди, тойни ўзи минди. Унинг аллақачонлар шундай қилишига маҳтал бўлган Саида саманин дарров минди.

Жўнашди.

Бироқ Саида бўлганича бўлган экан, битта-битта қадам ташлаб бораётган саман устида ҳам бутун вужуди ғажиб ташлангандай қақшар эди. Катта йўлга чиққандан кейин той, устида тажрибали одам борлигини сезса керак, ўйноқламасдан, суришга интилмасдан бир қиёмда йўрғалади. Унга етиб юриш учун Саида саманин йўртди-риши керак бўлиб қолди-ю, бирон километр юрар-юрмас ичак-чавоги остин-устун бўлиб, кўнгли озиб, кўзи тиниб кетди ва Қаландаровдан тойни қайтариб беришини сўради. Қаландаров унга ер остидан ажабланиб қарап экан, бу талабнинг сабабидан бехабар, «Балосан-ку», деб қўйди.

**Отларни алмаштириб, йўлда давом этишди.**

Той ҳозир Саиданинг остида ҳам йўргалаб борар, лекин бундан энди фойда йўқ, чунки тортаётган азоби заррача ҳам камаймас эди. Ҳозир унинг фикр-ёди вужудидаги хилма-хил оғриқларга ўзини кўникитириш, бундан бадтар оғриқларга ўзини чоғлаш, шу йўл билан ҳар қандай азобни енгишда эди. Саида шу тўғрида ўйлаб борар экан, уруш йиллари ўқиган бир ҳикоясини эслади. Бунда ярадор бир солдат оғриққа қанчалик чидай олишини синаяш, ўзини оғриққа ўргатиш мақсадида энг уқубатли бир операцияни наркозсиз қилдиргани ҳикоя қилинган эди. Буни эслаганда оғриқни енгиш Саида учун азоб чекаётган кишининг ширин хаёли эмас, заруратга айланди. У, эгарга гоҳ бир сонини, гоҳ иккинчисини қўйиб, гоҳ оғирлигини эгарга солмай оёқларини узангига тираб борар эди:

Қаландаров учинчи бригадага тушиб, узоқ ғўза олади. Саида оғриққа сўз бермай бу ерда ҳам ундан бир қадам орқада қолмасликка тиришди ва унга нималар маъқул бўлганини, нималар маъқул бўлмаганини диққат билан кузатди; бу ерда шуни пайқадики, Қаландаров ғўза парвариши тўғрисида одамларнинг фикрига, таклифиға қулоқ солар, ҳатто буткул нотўғри фикр айтган одамини ҳам чўрт кесиб ташламас, унга «аввал мана бундай қилиб кўрайлик, бўлмаса сен айтганни ҳам қиласиз» деган тарзда муомала қиласар экан.

Қаландаров еттинчи бригаданинг йўлакай кўриб борди-ю, дала шийпанида отдан тушмади ҳам, бригадирни чақириб бир-икки савол берганидан кейин:

— Бу ишда қоматингни кўтаролмасанг қўя қол, ука, бошқа иш қил, товуқ боқ, товуқ! — деди ва отининг бошини бурди.

Бригадир ранги бўзарганича қола берди.

— Арслонбек ака,— деди Саида,— бу бригаданинг ғўзаси шунаقا ёмонми? Мен ёмонлигини пайқамадим, қайси куни келганимда ҳам пайқамаган эканман. Менга кўрсатсангиз, тушунтириб берсангиз...

Қаландаров унга ялт этиб қаради ва илтимосини бажо келтиришга мажбур бўлди. Саида раис қаёққа бошлиласа юрар, унинг сўзларига диққат билан қулоқ солар, саволлар берар, ёзиб олар эди. Буни кўриб Қаландаровнинг кўнглига «мени буколмайсан деб жўрттага қилаётиди», деган гап ҳам келди.

Улар тўртингчи бригаданинг дала шийпонига келганда колхозчилар тушликка чиқиб, ёш қора толлар соя солиб турган ҳовуз бўйида овқат еб ўтиришар эди. Ҳамма тўзиди. Қимдир буларнинг қўлига сув қўйди. Бригадир дастурхонга таклиф қилди. Жонсарак тойни ариқнинг нари ёғига қантариб қайтган бир чол Сайданинг сарғайиб кетган юзига разм солиб:

— Саидахон, қизим, сизни от урунтириб қўйибдику,— деди.

Чолнинг бу сўзи Сайдага алам ўтиб, лабини буриб йиғлашга тайёр турган ёш болага онасининг «вой, болагинамни ким уришди» деганидай таъсир қилди. Саида аъзойи бадани қизишиб, лўқиллаб оғриётганини, лоҳас бўлиб кетаётганини энди сезди.

Қаландаров олдига келтириб қўйилган бир чинни тўла угра ошга қалампир сепар экан, чолнинг сўзига жавоб қилди:

— Уринса ҳеч нима қилмайди, пишади!— деди ва ошни қошиқсиз, кўтариб ичар экан, ҳар хўплаганида ошпазнинг шаънига талай мақтов сўзлари айтди.

Ҳозир Сайданинг томоғидан овқат эмас, тупуги ҳам ўтмас эди, шундоқ бўлса ҳам ошдан бир-икки қошиқ ичди. Одамларнинг гап-сўзи, муомаласидан Саида бу ерга бир неча марта келганини, булар орасига киришиб кетганини пайқаб, Қаландаровнинг ғаши келди. У, косани бўшатиб, яна ярим чўмич сўради; иккинчи косани ҳам там олиб, мақтаб-мақтаб ичар экан, Сайдани бу одамларга бегона тоифадан қилиб кўрсатмоқчи бўлди:

— Ошдан ичмадингиз-а... Буларнинг овқати оғзиғизга ёқмади... ёқмайди!

Саида унинг ғаразини англаб оғринди. Бир тўғрам гўшти беихтиёр олиб оғзига солди, бироқ чайнолмай бутун ютишга мажбур бўлди — тойнинг қалтис ҳаракатларидан оғриқдан тишини тишига боса бериб, жағлари қотиб кетган эди.

Қаландаров бояги сўзи билан Сайдани бошқа тоифадан деган бўлса, энди уни деҳқон ва унинг меҳнатидан буткул бехабарга чиқармоқчи бўлди.

— Деҳқон! Деҳқонга гўжа бўтқа ҳам паловдай татииди!

— Ҳамма меҳнат ҳам иштаҳа очади,— деди Саида.

— Тўғри, лекин деҳқоннинг меҳнати бошқача... деҳқон йил — ўн икки ой, қишин-ёзин меҳнат қилади!— деди

Қаландаров Саидани буткул нодонга чиқарган бир оҳангда.

— Қайси фабрика, қайси завод ёки шахта қиши ёки ёзда тўхтаб қолади?— деди Саида.

Қаландаровнинг даъвосига қарши бундай жавоб ҳеч кимнинг эсига келмаган бўлса керак, ҳамма кулиб юборди ва Саиданинг гапини маъқуллади.

Қаландаров ичиди ўзини сўкди: «Шу маҳмадона билан сўз уриштириб нима обрў топар эдим, нима кераги бор эди?» деди-да, мунозара Саиданинг сўзи билан таомм бўлишини истамай деди:

— Деҳқон билан ишчининг меҳнатини баравар қилманг, ишчи машинанинг қулоғини бурайди холос.

— Колхоз деҳқоннинг ҳам қўлига машинанинг қулоғини бериб қўйибди-ку, ҳозирнинг ўзида кетмонга қанча иш қолди? Шу яқин йилларда далада кетмон қөлармиккин?— деди Саида.

Қаландаров унинг гапини эшитмаган бўлиб ўрнидан турди, бориб қўлини ювди. Одамлар дам олгани тарқалишди.

Қаландаров, кўнгли ғаш, ғўза оралагани йўл тутди. Саида яна унинг кетидан юриб, бригадирга айтадиган ҳар бир сўзини яхшилаб англашга, эсда тутишга ҳаракат қилди.

Саида жуда ҳолдан тоиди, шунинг учун олдинроқ қайтиб, Қаландаров келгунча ҳовуз бўйидаги сўричадэ бир оз дам олмоқчи ва ёзадиган гапларини дафтарчасига ёзмоқчи бўлди. Боя Саидага «от уринтириб қўйибди-ку», деган мўйсафид қишлоққа бир омонат бериб юбормоқчи эканини айтиб, олиб кетишни Саидадан илтимос қилди. Саида кўнган эди, мўйсафид супачада турган парқув ёстиқлардан бирини олиб, тойнинг олдига қараб кетди ва ёстиқни эгарнинг устига боғлади. У қанақа омонат эканини Саида жўнагани отланганида билди: яхшилаб боғланган парқув ёстиқ шу чоққача тошкўмирнинг чўғидай туюлган эгарни момиққа айлантирган эди. Саида қаттиқ хижолат бўлди: «Бу мўйсафид аҳволимни қаёқдан билди экан, наҳот юришимдан пайқаган бўлса! Үндоқ бўлса ҳамма пайқабди-да,вой шўрим...»

Саида, бир томондан оғриқ, бир томондан хижолатликдан ўлар ҳолатга етган бўлса ҳам, яна бир бригаданинг ғўзаларини кўришда, одамлар билан суҳбатда ўзини тетик тутди.

Колхозга қайтилганда Саида тамоман касал аҳволда эди, шунинг учун Қаландаров овқатга таклиф қилганда лоҳаслигини яширолмай узр сўради ва отини Эшонга бериб, ҳужрасига томон кетди. У ҳарчанд ўзини тетик тутишга, одатдагича қадам ташлашга уринса ҳам орқасидан қараб турган Қаландаров аҳволини билди ва мийиғида кулиб қўйди. Лекин бу нарса Қаландаровнинг тафтини босолмади, аксинча, юрагига ўт ёқди: Саида сал кунда одамларга эл бўлиб қолибди, у бормаган бригада, у танимаган колхозчи йўқ!

Саида ҳужрасига кириб, ўзини каравотга ташлаганича бирон икки соатдан кейин, Эшоннинг хотини Қифоятхон эшикни қоққанда уйғонди. Қифоятхон дастурхонга ўроғлиқ бир коса ош, иккита равоч келтирган эди. Саида равочдан озгина еб, кўнгли очилди, бир-икки ошам ош олди-ю, яна ётди. Қифоятхон унинг касаллигини кўриб кўп меҳрибончиликлар қилди, елкасини, оёқларини силади. Саида яна уйқуга кетди.

### XIII

Саида эрталаб ўрнидан туролмади — оғримаган аъзоси йўқ, назарида жиндаккина иситмаси ҳам борга ўхшади.

Қифоятхон нонушта олиб келди. Саида нонушта қилаётганида Қаландаров дераза пардаси остидан бошини тиқиб ҳол-аҳвол сўради, ўрганмаган одам далада кўп юрса ҳаво элтади, лоҳас қиласи деган гапни кўп писанда қилди ва ҳозир Козимбек келиб, пенициллин укол қилса «отдай» бўлиб кетишига ишонч билдириди. Саида пенициллин нимага кераклигига тушунмаса ҳам, қуллуқ қилди.

Қифоятхон нонуштадан кейин ҳам кетмай ўтириб олди, афтидан, боши ёстиққа текканда меҳрибончилик қилиб Саидага ҳам яқин бўлиб олмоқчи эди. Саида ундан-бундан гапириб ўтиришга мажбур бўлиб, боғчадан сўз очди. Саида унинг боғчада ишлашига рози эмаслигини сезиб юрган бўлса керак, Қифоятхон хавотирга тушиб, чулдураб қолди.

— **Боғчә иши сизга маъқулми, жуда маъқулми?** — деди Саида.

— Қандоқ қилай, қўлимдан бошқа иш келмаса... Колхозда осон иш шу-да.

Саида мийифида кулди.

— Боғча иши осон деганинг билан Ҳуринисо опамнинг бутун рўзғори сизнинг бўйнингизда-ку! Агар шу меҳнатни колхозга қилсангиз ҳар қанақа ишни эплайсиз. Ёш бир жойга бориб қолганда бирорвнинг эшигига юриб, қош-қовоғига қараашдан оғирроқ иш борми?

— Рост,— деди Қифоятхон сукут қилиб.— Ҳуринисо баъзан жуда ўтказиб юборади. Қуда бўлганимиз учун кўтараман...

— Қуда бўлганингиз учун ҳам иззатингизда турганингиз яхши. Ўзоқдаги кишнашар, яқиндаги тишлишар...

Бу гап Қифоятхонга жуда маъқул бўлди, Саидани ўзига жуда яқин кўрди.

— Нима иш қилсан экан?

Саида ўйлаб туриб:

— Маълумотингиз неча класс?— деб сўради.

Қифоятхон буткул саводсиз эди, Саиданинг саволига жавоб бериб, ўқий олмай қолганинг сабабларини, бутун ўтмишини гапириб берди.

Қифоятхоннинг бобоси Маткарим буқоқ дардчил бир одам, поякилик қилиб, рўзғор тебратар экан, кунлардан бир куни бозорда чилим кўтариб юриб тўсатдан ўлиб қолибди. Бозор тўс-тўполон бўлиб кетибди. Шунда Эрмат баззоз деган бир бой ўликни аравага солдириб, уйинга жўнатибди, кетидан бориб, фарёд чекаётган тул хотинни бир чеккага чақириб кўнгил сўрабди ва қулоғига: «Маткарим ҳожига обрў қилиш керак. Қаъбатуллога бориш ҳар кимга насиб бўлавермайди» дебди. Маткарим буқоқ, ҳақиқатан болалигида отаси билан ҳажга борган, лекин отаси камбағал бўлгани учун икковини ҳам ҳеч ким ҳожи демас экан. Эс-хушидан ажраган тул хотин бу гапнинг тагида нима борлигидан бехабар «бир мўминнинг муруввати» деб ўлабди-ю» Худо хайр берсин, ўзингиз биласиз», дейишдан бошқа гап тополмабди. Эрмат баззоз бир кечада пишиқ ғиштдан сафана солдирибди, юз йигирма кишига йиртиш бердирибди, худойи қилдирибди, қисқаси, Маткарим ҳожини катта обрў билан кўмдирибди, қирқини ҳам ўтказдирибди; орадан бир ҳафта ўтгандан кейин кампирнинг олдига чўт кўтариб борибди-да, унинг бўйнига ўн икки тилла қарз қўйиб, «Қиёмат қарзи, ҳожим гўрларида тинч ётиб,

қиёматда енгил турсиилар» дебди. Ҳафтасига бир-икки калава ип йигиришдан бошқа ишга ярамайдиган, кўп деганда бундан танга мири даромад қиласидиган аёл шунча қарзни қачон, қанақа қилиб узади? Ҳожи бўлмай ўлгур Маткарим буқоқ тириклигига тант бўлиб ҳовлини савдога қўйишганда олти тилладан ортиққа харидор чиқмаган экан. Орадан етти-саккиз ой ўтибди. Баззоз пулинин қистамабди. Бир куни маҳалла дастурхончиси келиб тулга: «Бой отам сизни қанотлари тагига олмоқчилар, нима дейсиз?» дебди. Тул: «Бой менга оғиз соляпти» деб ич-ичидан суюнибди ва «садақалари кетай» дейиши билан розилик билдирибди. Йўқ: кейиндан маълум бўлибдики, баззоз унинг ўзига эмас, ўн еттига кириб бораётган соҳибжамол қизига, яъни Қифоятхоннинг онаси га оғиз солган экан. Дастурхончи хотин ҳовлиқиб, энтикиб, бой йигирма тилла қалин, катта тўй ваъда қилганини, кичик ҳовлисини хатлаб бермоқчи эканини айтибди. Бир томондан камбағалчилик, қарз ваҳимаси, ожиз-нотавонлик туйғуси, иккинчи томондан орзу-ҳавас, умиди, ширин хаёллар тул хотинни енгибди. Уч-тўрт кундан кейин бой уч хотиндан иборат совчи юборибди... Шундай қилиб Қифоятхоннинг онаси Эрмат баззозга учинчи хотин бўлган экан.

Бой биринчи хотинидан буткул фарзанд кўрмаган, иккинчи хотини эса нуқул қиз туғар экан. Биринчи йили Қифоятхоннинг онаси ҳам қиз кўрибди ва қиз туққаним бас деган тилак билан қизининг отини Қифоятхон қўйибди. Ҳар иккала кичик хотин эридан юлганини назру ниёз қилиб худодан қатта меросхўр, яъни ўғил сўрар экан. Иккови баҳор фаслида саёҳат ва зиёрат баҳонаси билан азизлардан ўғил тилагани Ўш пиримга борибди. Тахти Сулаймонга чиқибди. У вақтда тоғнинг чўққиси — Тахти Сулаймонда бир фор бўлиб, форнинг ичидаги чашма бўлар экан. Қим қандай фарзанд умидида шайхларга назр-ниёз қилиб, шу чашмага ихлос билан бир марта қўл солар экан. Шунда унинг қўлига соққа, ошиқ сингари буюмлар чиқса ўғил туғиши, узук, мунчоқ, сирға сингари нарсалар чиқса қиз кўриши керак экан. Чашмага Қифоятхоннинг онаси қўл солганда тайинлик бир хулоса чиқариб бўлмайдиган нарса — синиқ сопол, кундоши қўл солганда эса нақд ўғилдан дарак берадиган пичоқча чиқибди. Бу ҳол кундошлардан бирининг тўйига, бирининг азасига айланибди. Форга чоҳ ёқасидаги «Қил кўприк» деб атал-

ган тор йўлдан ўтилар экан. Шу «Қил кўприк»дан ўтишда Кифоятхоннинг онаси нима хаёлга борибди-ю кундшининг оёғини чалибди. Кундоши қалқиб, чоҳга йиқилибди, тошдан-тошга урилиб, юмалаб, тоғнинг этагига етгунча бир кўйлак қонли гўштга айланибди. Қаёқдан-дир халойиқ йиғилибди, қий-чув, шовқин-сурон кўтарилибди. Миршаб, овохта... Бу вақтда Кифоятхон икки яшар экан. Шунда Нусрат даюс деган бир киши адвокат солиб, қотилани катта пул бараварига турмадан чиқариб олибди ва аввал Симга, ундан кейин Қўқонга олиб келибди. Қотила турма азобидан ҳам кўра икки яшар қиз-часидан айрилганига чидолмай Нусрат даюснинг ҳамма шартига кўнибди. Шундай қилиб Кифоятхон Қўқонда Ходабозордаги исловотда эсини танибди. Революция йили ўн тўрт яшар бўлган Кифоятхонни Асқар бойвачча деган бир киши саккизинчи хотин қилиб олибди. Кифоятхон у билан олти йил умр қилибди.

— У ўлгандан кейин ўзимни қўйиб бердим...— деди Кифоятхон.— Яширишнинг ҳожати йўқ... Ўша вақтларда, ундан кейинроқ очилган кўпгина хотин-қизларнинг қонига, эҳтимол, мен, менга ўхшаган аёллар зомин бўлган бўлса... Мен жоҳил эркакларнинг ҳамиятини қўзғатадиган йўлдан юрдим, бир неча йил юрдим... Кейинчалик ўша эримдан қолган ҳовли, бисот билан Эшонга тегдим. Мана, кўрдингизми, ўқигани фурсатим ҳам бўлган әмас, хоҳишим ҳам... Қозон-товоқ қилишни ҳам Эшондан ўрганганман. Эшон акангиз жуда пазандада...

Кифоятхон Сайданинг гап ва муомаласидан кўксида туғилган бир туйғу таъсири билан бу гапларни айтишга айтди-ю, кейин ўзига келиб, қўрқиб кетди: «Бу қиз энди мендан жирканмасмикин?» Бироқ, Сайданинг юзида ҳеч қандай ўзгариш йўқ эди. Саида, ҳақиқатан, бу гапларга чандон аҳамият бермагандай, иш тўғрисидаги гапни давом эттириди:

— Майли, боғчадан кетинг, Арслонбек акамга айтинг, бўшанг. Бошқа иш тўғрисида сиз ҳам ўйланг, мен ҳам ўйлай, кейин гаплашамиз. Агар бирон иш маъқул келиб қолса Арслонбек акага айтгани шошилманг, чунки у киши кўнмасалар менинг орага тушишим ноқулай бўлиб қолади.

Кифоятхон Сайданинг бу сўzlарида ҳам катта самимият сезди ва унга қандай ва қайси тил билан миннатдорчилик билдиришни билмас эди.

Кифоятхон кетгани ўрнидан турди, Саиданинг кўнгли нималар тилашини сўраб, ўзи бирмунча ширин, нордон овқатларнинг номини айтиб, энди чиқмоқчи бўлганида эшик тақиллади. Саида товуш бергандан кейин эшик очилиб, бўсағада новча, бўйни ингичка, қулоқлари елпуғичдай бир йигит пайдо бўлди. Саида дарров билди: доктор Козимбек.

Кифоятхон докторга курси қўйиб бериб, оёқ учида чиқиб кетди.

## XIV

Козимбек ҳамма ёш врачлардай ёшига номуносиб бир улуғворлик билан курсига ўтири, гўё касал кўра бериб одат бўлиб қолган бир ҳаракат ва нигоҳ билан Саидага қаради, кейин билинар-билинмас қизарди.

— Танишиб қўяйлик... Козимбек... Эш врачлардан... Тобингиз қочибди... бизнинг бобой шунаقا деб қолдилар...

Саида унинг юзига бир кўз ташлади-ю, кейин, ҳаво ранг галстуғига, оқ шойи кўйлагини ғижимлаб, қорнига ботиб турган энсиз камарнинг зарҳал тўқасига, тиззасида турган озғин бармоқларига қаради ва илжайиб:

— Арслонбек акам пенициллин буюргандир? — деди.

Козимбек чап томондаги «ўғри тиши»ни кўрсатмасликка тиришиб кулди. Саиданинг бу гапи, Козимбекнинг кулгиси бемор билан врач орасида бўладиган расмиятни кўтариб ташлади. Саиданинг ҳазилига қарши Козимбек ҳам ҳазил қилди:

— Билар экансиз... бизнинг бобой овқатлардан фақат паловни, раҳбарлардан фақат ўртоқ Қодировни, дорилардан фақат пенициллинни тан оладилар!

Саида ялт этиб унинг юзига қаради. Қаландаровнинг феълини билиш мумкин, лекин уни ҳеч ким бундай таъриф қила олмас эди. Бу гап Қаландаровни таърифлаш билан бирга Козимбекнинг ўзини ҳам тўла-тўқис таърифтавсиф этгандай, бутун вужудини сиртдан, ичдан ёритгандай бўлди. Саиданинг қаршисида истараси иссиқ, ҳатто шалпон қулоғи ҳам ўзига ярашган, очиқ, хушчақ-чақ бир йигит ўтирас эди.

Козимбек беморнинг нозик ва жуда силлиқ билагини

ушлаб томирини кўрди ва қаери оғришини сўради. Саида кечаги юришни айтмоқчи эмас, шунинг учун унинг саволига нима деб жавоб беришни билмас эди. Қозимбек уч марта сўраб ҳам жавоб ололмаганидан кейин бемор тортиняпти деб ўйлади-да, институтда домласидан олган таълимини ишлатди:

— Тортинманг! Биз, врачлар, аёл кишини кўрганимизда онамиз ҳам, опа-сингилларимиз ҳам аёл эканлигини эсдан чиқариб қўймаймиз! — деди.

Қозимбек шу гапни айтишга айтди-ю, домласидан олган таълимини биринчи марта ишлатганиданми, ёки тили шундоқ деса ҳам ёш кўнглининг аллақайси бурчи уни ёлғончи қилаётганиданми, ҳар нечук, қулоқларигача қизариб, кийик кўзлари йилтираб кетди. У ҳолатини Саидадан яшириш ва шу билан бирга кўнглининг шўх бевошлигини босиш учун чўнтағидан стетоскопни олиб bemorга томон дадил энгашди, трубкани рўйжа устидан икки кўкраги орасига, кейин чап кўкрагини стетоскоп билан юқорироқ суриб унинг остига қўйди, диққат билан қулоқ солди. Шунда унинг димоғига фунчнинг бағрини эслатадиган бир ҳид урилди, назаридা, бу ҳиддан ўпкаси яйраб, умрида биринчи мартаба қониб нафас олгандай бўлди. Қозимбек кўзи тингандай бўлиб домласидан олган таълимини, худди дуо ўқигандай, ичида бир неча марта такрорлади, бу ҳам бўлмагандан кейин Саидага сўз қотди:

— Бизнинг бобойни жуда яхши билиб олибсиз. У кишини партия мажлисида интизомга бўйсундирибсиз. Сизни орқа қилиб, хотинлар у кишини танқид қилишибди... Аъзамжан билан Тошкентда кўришган эдим, ўша гапириб берди.

— Аъзамжон бу гапларни қаёқдан эшишибди, келгани йўқ-ку, — деди Саида ажабланиб.

— Мухбирларнинг бурни узун бўлади, уч километрдан ҳид олади. Зулфиқоров масаласида фельветон ёзмоқчи шекилли, яқинда келса керак... Шунаقا қилиб, қаерингиз оғришини айтмайсизми? Мен педиатор билан ветеринарларга қийин десам, баъзан терапевт ҳам қийин аҳволда қолар экан.

Қозимбекнинг бу ҳазили-ўпкасидан кейин Саида қошини чимириб жилмайди-ю кечаги юришни батафсил ва унинг сабабини қисман гапириб берди.

— Кейин билиб қолдим, Арслонбек акам, афтидан,

менга жазо бердилар. Шу йўл билан мени ишдан бездирмоқчи бўлдилар шекилли,— деди Саида кулиб.

Козимбек гоҳ кулиб, гоҳ ачиниб, гоҳ отасининг феълидан, қилмишидан хижолат бўлиб қулоқ солар экан, ниҳоят хўрсиниб:

— Бизнинг бобой шунақалар,— деди худди узр сўрагандай,— қайси йили мен каникулга келган эдим. Уйда меҳмон бор экан. Бобой ошни еб, қўлни этикнинг қўнжига артдилар. Меҳмонлардан жуда хижолат бўлиб, шу ишларини чакки десам... шунча одамнинг ичидаги мени бир пул қилсалар бўладими! Лекин ўшандан бери шу қилиқни ташлаганлар, ошни ҳатто қошиқ билан ейдилар. Мана шунаقا, бу кишининг эгилишлари қийин, эгилгандаги ҳам қирсиллаб, чирсиллаб эгиладилар... Бугун, эртага ҳам яхшилаб дам олинг, эртага кечқурун мен сизга фалати бир дори бераман, умрбод бунақа касалнинг юзини кўрмайсиз.

Козимбек кетди. Саиданинг таъби очилди, шу қадар очилдики, аъзойи бадани келида туйилгандай қақшаётган бўлса ҳам, ўрнидан туриб ўтирди. Демак, Козимбек отасининг феъл-авторини, ҳулқини билар экан, камчиликларидан хижолат тортар экан.

Бунинг Саида учун аҳамияти жуда катта эди.

## XV

Умидадан тез-тез хабар олиб турди. Идора хизматчиларидан бир неча киши кирди. Усмонжон келди. Меҳри келган эди, одам борлигини кўриб эшикдан қайтди. Эшон бир чойнак чой кўтариб кириб ҳол-аҳвол сўради. Зулфиқоровнинг хотини битта қийиқчада учтўртта анор, бир килодан мўлроқ сариқ кишмиш олиб келди. Мактаб директори, икки ўқитувчи келиб кетди. Тушдан кейин Ҳуринисо дастурхон кўтариб келди, узоқ ўтирди, кетишда Саидани уйига олиб кетмоқчи бўлди. Саида қуллуқ қилиб: «Касални эркалатсангиз касаллик ҳаддидан ошиб кетади», деб тегишиди.

Ҳуринисо кетиб, Саидага қарашиб тургани Кифоятхонни юборди. Кифоятхон келгани ҳам яхши бўлган экан, кечга томон келди-кетди кўпайди. Шундай бўлдики, шу маҳалларда саданинг остида ўтириб, одамлар билан додмуомала қиласидиган Қаландаров ўнгайсизланиб идораси-

ни кабинетига кўчирди. Кечаси ҳужрада Умида яна бир колхозчи қиз билан ётиб қолди.

Эрталаб Кифоятхон нонуштани жуда барвақт олиб келди. Қаландаров кечаси Кифоятхонга: «Сен боғча ишига ярамайсан, эртадан бошлаб бўшатаман», дебди. Унинг айтишига кўра Қаландаров боғчага Ҳуринисони қайтармоқчи экан, шу важдан Ҳуринисо «касалман», деб йифлади.

Ҳаял ўтмай Умида ҳам янги гап топиб қелди: Қаландаров Зулфиқоровни кабинетига олиб кириб жуда беҳурмат қилибди, «ҳозирдан бошлаб бригадирликдан бекор бўлдинг, бугун масалангни қўйиб, колхоздан ҳайдайман», дебди ва кечқурун соат тўққизга правление чақиришни Умидага буюрибди.

Қаландаровнинг Кифоятхонни ишдан бўшатмоқчи ва Ҳуринисони ишлатмоқчи бўлгани, Зулфиқоровга эндиги муносабати, Козимбек айтмоқчи, унинг чирсиллаб-қирсиллаб бўлса ҳам эгилиб келаётганини кўрсатар, лекин Зулфиқоров ҳақида масалани бу тахлитда қўйиши ҳеч жиҳатдан тўғри келмас, бу ҳақда бюро кўзлаган баъзи бир фикр-мулоҳазалар, тадбирлар нуқтаи назаридан қаралганда кони зиён эди. Қаландаровга дарров учраш, қандай йўл билан бўлса ҳам уни жаҳлидан тушириш — қарорини бекор қилдиришга эришилмаган тақдирда ҳам вақтинча тўхтатиш зарур эди. Саида дарров кийинди, Кифоятхон меҳрибончилик қилиб ҳайҳайллашига қарамай, идорага чиқди. Қаландаров уни кўриб ҳайрон бўлди:

— Ие, дарров тузалиб чиқдингизми! — деди. Унинг сўз оҳангидан Саиданинг дарров тузалиб чиққанидан рози эканини ҳам билиб бўлмас эди, норози эканини ҳам. — Ёта турсангиз бўлар эди... Иш бўлса бўлар, саломатлик керак. Шунаقا қилинг, боринг, ёта туринг. Бугун правление мажлисига ҳам чиқманг!

— Бугун правление мажлиси?! — деди Саида талмовсираб. — Нима масала экан, мумкинми...

— Масала битта! — деди Қаландаров. — Зулфиқоровни бригадирликдан олиб, колхоздан думини туғиш!

Саида диванга ўтириди. Ҳозир Қаландаров учун Зулфиқоровни колхоздан ҳайдашдан кўра каттароқ, муҳимроқ иш йўқ эди.

— Тўғри, ёмон одам жазосини тортиши керак, — деди Саида, — лекин Арслонбек ака, уни колхоздан ҳайдамас-

дан олдин партиявий масаласини ҳал қилиш керакмиккин...

— Кейин ҳал қила берамиз!

— Нотўғри бўлармикин...— деди Саида ва жўрттага унинг ўзига солди.— Яна ўзингиз биласиз, мендан анча кекса коммунистсиз...

Саиданинг бу гапи Қаландаровга жуда маъқул бўлди. У, пича ўйланиб қолди-ю, қўнфироқ чалиб Умидани чақирди.

— Умидахон, правлениега одам хабар қилишни қўя туринг. Бошқа масала чиқиб қолди,— деди ва «анча кекса» коммунист сифатида ёш коммунистларга маслаҳат берди.— Зулфиқоровни аввал бюорода партиядан ўчи-ринглар, кейин умумий мажлисга соласизлар. Ана ундан кейин правлениега, колхозчиларнинг умумий мажлисига қўямиз. Шундақа қилинса тўғри бўладими?

— Жуда тўғри бўлади!— деди Саида.

— Хўш, қачон бюро қиласизлар? Бугун кечқурун қилсаларинг бўладими? Агар ҳозир қилсаларинг кечқурунга правление чақира берар эдик...

— Майли,— деди Саида,— лекин шошилмасак дейман, Арслонбек ака. Бу масала тўғрисида биз, бюро аъзолари, бир фикрлашиб олган эдик. Баъзи бир фикр-мулоҳазалар туғилди. Бу фикр-мулоҳазалар сизга ҳам маъқул тушади деб бир-биримизни ишонтиридик.

Қаландаров бутун гавдаси билан Саидага ўгирилди.

— Хўш?..

— Биз масалага кенгроқ қарасак деймиз. Зулфиқорвонинг хотин устига хотин олиши, албатта, аёлларга бой-феодалларча муносабат, жиноятдан бошқа нарса эмас. Лекин унинг бу қилмиши ана шу жиноятнинг бир хили холос. Колхозимизда бу жиноятнинг бошқа хиллари йўқмикин? Зулфиқоров бирордан пахта олиб план тўлдирганлиги, албатта, кўзбўямачилик, буни ҳам жиноят деб аташ мумкин. Лекин унинг бу қилмиши ҳам шу жиноятнинг фақат бир хили. Колхозимизда бу жиноятнинг ҳам бошқа хиллари бўлса эҳтимол...

Қаландаров узоқ ўйлаб қолганидан кейин бўштобгини:

— Гапни кўпайтириб, одамларни ишдан қўйишнинг ҳожати бормикин?— деди.

Саида унинг бу гапни бўштоб айтганидан фойдаланди.

— Бир вақт: «Иллатни чимчилаб олиб ташлаш керак эмас, таги билан қўпориш керак», деган эдингиз шекилли...

— Яхши, яхши!— деди Қаландаров.— Хўп, қандоқ қилиш керак?

Саида ихтиёрни яна унинг ўзига ташлаган бўлди.

— Нима десангиз шу-да... ишни яхши текшириш, тўлиқ кўтариб чиқиши учун комиссия тузинглар десангиз биз раисликка ўзингизни таклиф қиласмиш. Нима дедингиз, Умидахон?

— Тўғри, жуда тўғри!— деди Умид Саиданинг ниятини фаҳмлаб.— Комиссия раиси обрўли одам бўлиши керак! Арслонбек акам бўлишлари керак!

— Тўғри!— деди Саида.— Бундан ташқари Арслонбек акамга бу ишни текшириб тагига етиш осон, кўп вақт талаб қўлмайди, чунки ҳамма нарса ўзларига беш қўлдай маълум... Бу кишига ўн кун муҳлат берсак кифоя!

Ўн кун муҳлат Саиданинг ўзига керак, бу ўн кунда «Зулфиқоров масаласи» қўйиладиган колхозчиларнинг умумий мажлисини жуда яхши тайёрлашни кўзламоқда эди.

Қаландаров унинг таклифларига кўнди.

## XVI

Саида Қаландаровнинг кабинетидан вақти чоғ бўлиб чиқди, ҳужрасига келиб, кечгача ўша мажлисни тайёрлаш, ўтказиш режасини тузди.

Кун ботар олдида ваъдасига мувофиқ, Козимбек келди. Қаландаров уни медсестра тургани ҳолда бир касални районга элтиб қўйишга мажбур қилибди, шуни айтиб, кечиккани учун Саидадан узр сўради.

— Қани дорингиз?— деди Саида.

— Дори тайёр. Мен дарвозанинг олдида кутаман, қалинроқ кийиниб чиқинг,— деди Козимбек ва чиқиб кетди.

Саида «амбулаторияга олиб борса керак» деб ўйлади-ю желеткасини елкасига ташлаб чиқиб борди. Бонинг дарвозаси олдида Козимбек оқ от миниб, Саидани тавбасига таянтирган ўша кўк тойини жиловлаб турар

эди. Саида уни кўриб «вой ўлсин!..» деб юборди ва шундоқ бўлса ҳам тойини дадил минди.

Маълум бўлишича Козимбек ҳеч қандай дори бермоқчи эмас, Саидани отга ўргатмоқчи, пишитмоқчи экан. Қишлоқдан чиқилгандан кейин йўл бу ёқда қолиб, пастбаланд жойлардан юришди, зовурлар, ариқлардан ўтишиди. Саида энди кўк тойни баҳузур енгиб бораётган бўлса ҳам йўл оғирлигидан бир оз терлади, вужудидаги оғриқ шу тер билан чиқиб кетаётгандай бўлди. Козимбек бундан хабардор бўлиб, текис йўлга бошлади.

Қош қорайди. Осмоннинг бир чеккасида ранги ўчиб, уволгина бўлиб турган ой нурга тўлди, чўлни босиб келаётган қоронгиликни зовурларга, пастқамликларга, дарахтларнинг остига суриб ташлади.

Саида Қаландаровнинг нуқсонларидан, фел-авторидан хабардор ва бўлажак мажлисдан кузатилган мақсадни жуда тез тушунириш мумкин бўлган Козимбекни шу ишга тортишни кўзлаб сўз очмоқчи эди, Козимбек сира навбат бермади: индамасликда ном чиқарган бу йигит нима бўлиб жафи очилиб кетди-ю аввал ҳар куни бир-бир ярим соат отлиқ юришнинг фойдаси, ундан кейин ҳар хил, жумладан меъда-ичак касалликлари, буларнинг тури, аломатлари тўғрисида гапирди, ниҳоят анатомиядан сўз очди:

— Ўқиб юрганимизда ориқ ўликларни яхши кўтарадим мазза: формалинга солиб қўйсангиз майиздай бўлади, шундоқ терисини кўтартсангиз бутун механизм кўрина қолади,— деди ва бунинг бутун тафсилотини сўзлаб кетди.

«Қуриб кетсин!— деди Саида ичида.— Менга нима кераги бор!..»

Шу билан саёҳат ва суҳбат тамом бўлди.

Саида эртасига жуда енгил турди. Унинг мускуллари ҳануз оғриса ҳам бу оғриқ лоҳас қилиб тўшакка тортадиган оғриқ эмас, аксинча, ҳаракат қилишга хоҳиш туфдирадиган, кишини ғайратга соладиган алланечук ёқимили оғриқ эди. Буни эшитиб Козимбек муолажаси фойда берганига хурсанд бўлди: «сеанс тугагани йўқ, кечқурун давом этдирамиз», деди.

Саида куни бўйи мажлисга тайёрлик юзасидан мўлжалидаги одамлар билан гаплашиш, ҳозир диққат марказида бўлган катта масалалардан тортиб кундалик икир-чикиргача уларнинг муҳокамасига ташлаш, шу йўл

билин уларда фикр-муҳокама ўйғотишига ҳаракат қилиш, булардан дурустроқларини мажлисга тайёрлик ишига тортиб, тайнинлик вазифалар топшириш билан машғул бўлди; кечқурун эса ёзги кино-театр қуриш масаласини кўтариб чиққан ва шу ташаббусни ўз зиммасига олган бир гуруҳ комсомоллар билан кенгаш ўтказди. Кенгаш тугаб, одамлар тарқалаётган пайтда Саида деразадан Козимбекни кўриб қолди. Козимбек, кундузи чиндан айтган экан, отланиб яна ўша кўк тойни етаклаб дарвозага томон ўтиб кетди. Саиданинг кўнглидан лип этиб бир гап ўтди: «Кеча кечқурун икковимиз дала айландик, тўғри йўл қолиб, аллақаерлардан юрдик. Буни, албатта, одамлар кўргандир. Бугун ҳам шунаقا қилсан ҳеч кимнинг кўнглига гап келмасмикин?»

Саиданинг касали-ю Козимбекнинг муолажасидан бехабар одамнинг кўнглига, албатта, шундай гап келиши мумкин эди, лекин Саида шундай хаёлга боргани учун ўзини хўп уришиди, худди ўзига зарда қилгандай, эшикларни шарт-шурт қулфлаб, дарвоза олдига чиқди. Дарвоза олдидা бояги кенгашдан чиққан қиз-жувонларнинг деярли ҳаммаси Козимбекни қуршаб, баъзилар сўзлашиб, баъзилар кўк тойни ҳавас билан томоша қилиб турар эди. Буларни кўриб Саиданинг юраги шув этди ва назарида, ҳозир иккови отлиқ жўнайдиган бўлса бу ерда турган ёшларнинг бири мийиғида кулиб, бири ерга қараб, бири бошқасини туртиб: «Кеча гаплари чала қолган эканми», дейдиганга ўхшади. Саида аччиғи келиб, худди шундоқ эмаслигини, шундоқ бўлган тақдирда ҳам бунаقا гапларни назар-писанд қилмаслигини кимгадир исбот қилмоқчи бўлгандай, тикка бориб тизгинни Козимбекнинг қўлидан олди, узангига оёқ қўйиши билан ўйноқлаб кетган тойга иргиб минди-да, юганни икки-уч силтаб, гижинглатди.

Жўнашди. Козимбек бу сафар ёлғизоёқ йўлдан канал бўйига бошлади. Ҳадемай канал бўйига чиқиб, кенг қирғоқдан юқорига қараб кетишиди. Баланд қирғоқдан шом қоронғиси аста-секин қуюқлашаётган қишлоқ, ботиб бораётган қўёш, катта гулхан ёққан уфқ кўриниб турар эди. Саида, худди Козимбек яна меъда-ичак касалликлари ва ўликлар тўғрисида гап бошлаб қўйиб, сўз навбати бермаслигидан хавотир олгандай, от ва йўл гапиришга имконият бериши биланоқ мақсаддан бир оз чекиниброқ бўлса ҳам сўз бошлади.

— Эшон ака дуторга хийла чапдаст эканлар, товушлари паст бўлса ҳам шираликини... Шу кишини ўйиллий музика тўғарагига раҳбар қилгани дадангиз унармикинлар?

Козимбек отини бир оз қистаб тойга ёндашди. Ёнига от келгандан кейин той ҳам бир маромда қадам ташлай бошлади. Козимбек Сайданинг саволига анчадан кейин жавоб берди.

— Эшонни тўғаракка раҳбар қилгандан кўра колхоздан хайдаган маъқулроқ.

Саида унга ялт этиб қаради..

— Нега? Қайнатангиз... Бўлажак қайнатангиз ҳақида ҳозирдан шунаقا дессангиз...

— Бу нарса аям билан Кифоятхон опа бичиб-тиккан гаплар, Эшоннинг хомхәёли. Манзурахон менга тегмоқчи эмас, мен уни олмоқчи эмасман. Тўғри, бир-бири мизни жуда дўст тутамиз, чунки бирга ўсганмиз, бир мактабда ўқиганмиз, бир кўчада ўйнаганмиз. Орамизда ҳеч қачон муҳаббатга доир бир нарса бўлган эмас. Хайрият муҳаббат бўлмагани, бўлганда бу муҳаббатнинг охиривой бўлар эди. Мен врачман, шу йўлдан кетаман. Манзурахон балерина бўлгани ўқияпти, умрини шу санъатга бағишлайди ва тўғри қиласди, чунки бир ўқитувчининг айтишига қараганда, бунақа талантлар кам учрас экан. Ҳозирнинг ўзида унинг донгги Москвагача кетган. Мен врачман, врач бўлиб қишлоқда ишлагим келади. Болалигимдан шуни орзу қиласман. Мана, кўрдингизми, икковимиз икки йўлдан икки орзуни кўзлаб бораётимиз. Агар орамизда муҳаббат бўлса бир-бири мизнинг оёғимизга олтин кишан бўлар эдик. Кишан олтин бўлса ҳам, ҳарқалай, кишан!

Саида ҳозир Козимбек билан бу мавзуда гаплашишни лозим кўрмагани ва шу билан бирга мавзуни муддага яқинлатиш учун:

— Мен Эшонни биринчи кўрганимда хушламаган эдим...— деди.

— Жуда тўғри пайқабсиз,— деди Козимбек.— Эшон тўғрисида мен сизга бир ҳодисани айтиб берай. Унини қандоқ маҳлуқ эканини шундан қиёс қила беринг. Урушнинг таги кўриниб қолган кунлар эди, бир куни қарасам Эшоннинг ияги бурнига тегиб қолибди; суруштириб билсам, кимдир: «Уруш яна чўзилар эмиш, етти яшардан етмиш яшаргача ҳамма эркак зоти әскарликка олинар

эмис», деб Эшоннинг кўнглига ғулғула солибди. Эшон-аскарликдан қолиш учун бир ҳафтанинг ичидаги йигирма олти тишининг ҳаммасини суғуртириб ташлабди.

Саида ҳайрон бўлди.

— От эканмики тишига қараб олади! — деди. — Мен илгари дадангиз билан Эшон орасидаги муносабатга бир чеккаси қудалик деб қарап эдим, модомики ундоқ экан, модомики Эшон шундай одам экан...

Козимбек унинг сўзини оғзидан олди.

— Даданг нима учун Эшонни ўзига бунчалик яқин тутади демоқчисиз-да?

— Баракалла!.. Эҳтимол, Эшоннинг ашуласи, дутори, қизиқчилиги...

— Йў-ўқ! — деди Козимбек. — Бунинг сири бошқа-да. Дадам чала савод! Дадам шу айбини Эшон билан ёпди! Бундан ташқари, чала савод киши ўзидан паст, нима деса «ҳикмат» деб турадиган одамлар билан улфатчилик қилишга мойилроқ бўлади-ку! Шунда чала савод эканининг дардини тортмайди-да! Мана шунинг учун Эшон дадамнинг гўшти билан териси орасига кириб олган. Дадам қанчалик пишиқ, қанчалик тадбирли одам бўлса ҳам, баъзан унинг таъсирига берилади.

Саида суюниб кетди.

— Билар экансиз, жуда яхши билар экансиз, Козимбек! Мана шуни Арслонбек акамга уқтирасак, уқтира олсак марра бизники. Тўгрисини айтсам, дадангизга уқтиришимиз жуда зарур бўлган гаплар яна бор, яна топилади.

Саида умумий аҳволни, Зулфиқоров иши баҳонаси билан очилиши зарур бўлган иллатларни муфассал сўзлаб берди ва ўша мажлисни тайёрлашда, ўтказища Козимбекнинг ёрдамига муҳтоҷ эканини писандা қилди. Козимбек партия ташкилотига қўлидан келган ёрдамни беришга тайёр эканини билдири.

— Бизнинг вазифа,— деди Саида,— колхоз ҳаётида одамлар кўнишиб қолган ёки ноиложликдан кўз юмган ҳамма иллатларга халқнинг диққатини тортиш, бу иллатларнинг сабабини, натижасини эл кўзига кўрсатиш, одамларда фикр уйғотиш, уларни бу иллатларга қарши курашга йўллаш. Мажлис мана шу курашнинг~боши бўлиши керак!

Булар канални ёқалаб бориб кўприкка етганда ойдинда суюқ олтиндай оқаётган канал, ундан нари шаф-

фоғ қоронғулик қоплаб ётган пахтазор, узоқдаги паст-баланд дараҳтлар манзарасига маҳлиә бўлиб туриб қолишиди. Орадан бирмунча вақт ўтгач каналнинг у ёғидаги илонг-бilonг йўлда узоқда автомобиль чироғи кўринди. Чироқ ўнгга қайрилиб ғойиб бўлди-ю, ҳаял ўтмай яқинроқдан кўзни қамаштирадиган ёғду сочиб чиқди ва босинқи мотор товуши эшийтйлди. Саида боя «Козимбек билан отланиб кетсам ҳеч кимнинг кўнглига гап келмасмикин», деган нарса хаёлига келгани учун ўзини нақадар уришган бўлса ҳам ҳозир бесаранжом бўлиб қолди.

— Юринг, Козимбек, кета қолайлик! — деди ва тойнинг бошини орқага қайриб, юганини бир-икки силкди. Той йўргалаб кетди.

Козимбек Саиданинг тўсатдан жўнаб қолганига тушунолмай; отини йўртдириди.

Иккови қишлоққа бирин-кетин кириб келди. Саида каттакон толнинг соясида отдан тушди, тор кўча билан ҳужрасига бормоқчи эканини айтиб Козимбек билан хайрлашди.

Козимбек тойни етаклаб, алланечук бир куйни хиргойи қилиб, отхонага қараб кетди.

## XVII

Партбюро коммунистлар, актив комсомоллар ва партиясиз активлар кўмагида мажлисга тайёрлик ишини нақадар эҳтиёткорлик билан олиб бораётган бўлса ҳам ҳалқ орасида вужудга келаётган уйғониш натижаси бўлиб Қаландаровни гоҳ ҳайратга соладиган, гоҳ дарғазаб қиласалар юз бера бошлади.

Бир куни партбюро аъзоси сифатида Умида ҳар хил сабаб билан ҳеч қаерда ишламайдиган хотин-халажни йиғиб, уларнинг ҳол-аҳволини, талаб ва эҳтиёжларини, ишлаш имкониятларини билмоқчи бўлди. Хотинларнинг бир қисми ўзи кўзлаб юрган ёки кучи етадиган соҳада ишлашга хоҳиш билдириди. Ҳеч қачон ва ҳеч қандай мажлисга қатнамайдиган Кифоятхон иттифоқо шу мажлисга келган экан, ишлашга хоҳиш билдирган хотинлардан бири сўзга чиқиб: «Ул бу кунингдан! Токайгача раисга малайлик қилиб, боғчада болаларнинг ризқини ейсан!» дебди. Зулфиқоровни хотини уйидан ҳайдаб

юборибди ва Қаландаровнинг номини айтмаган бўлса ҳам, «суюнган тоғи» шаънига қанча байту ғазаллар айтибди. Бухгалтерия ходимларидан бирининг колхозчи-лар ҳақига хиёнат қилаётганлиги тўғрисида гап ўрмалаб қолди, бу ходим ўтган йил кимгадир меҳнат кунини ортиқ ёзиб даромадни «арра» қилган эмиш. Қаландаров бир куни самоварда кариллаб, ўзини доно ва бир агитаторни нодонга чиқариш учун: «Биласанми пахтадан нималар бўлади?» деган экан, агитатор уни юз-хотир қилмасдан: «Мен-ку буни биламан, лекин сизнинг темирдан, нефтдан, кўмирдан нималар бўлишини билишингизга гумоним бор», деб раисни кўпчилик ичидаги ўсал қилиби.

Одамлар нечуқдир шу тахлитда бетга чопар, андисиз бўлиб кетаётганини Қаландаров мана шундай ўз кўзи билан кўриб, орқаворатдан эшишиб, лекин бирорвга бир нима демай ҳаммасини ичига солиб юрган эди, бир куни ёрилди.

Уша куни кечқурун Саида ўз кабинетида сиёсий тў-гарак машғулотини ўтказди. Одамлар тарқагандан кейин бошқа групода ўқийдиган икки қиз кириб келди-ю, бир-бирига сўз навбати бермай бидирлаб, Меҳрининг ўқишга юборилганлигига «колхоздаги ҳамма қизлар» номидан қаттиқ норозилик билдириди. Шунинг устига нима бўлиб Қаландаров кириб қолди. Қизлар унинг ҳурматига ўринларидан туришди, лекин гапни давом этдиришди:

— Жиноят қилган жазо тортади-да, наҳот мукофот олса!— деди қизлардан бири.

— Кўзингиз кўргани Меҳри бўлибди-да, колхозда бошқа одам қуриб кетган экан-да!— деди яна бири бу гапни оламжаҳон таъна, ғазаб мазмуни билан тўлдириб.

Саида қизларга ётиғи билан гап уқтира бошлаган эди, Қаландаров тутақиб кетди.

— Ҳой, менга қара, қаерда катта бўлгансизлар? Адаб-одобни биласизларми?

— Нима қилибмиз, беодобчилик қилиб?

Қаландаров унга бир ўқрайди.

— Яна нима қилмоқчи эдинг? Секретарь билан шунақа гаплашадими киши! Бу ерда мен ўтирибман...

Қизлар сўз қайтармоқчи бўлишган эди, Қаландаров бақириб берди, шундай бақирдики, Саида ўнғайсизла-

ниб кетди. Қизларнинг бири шумшайиб, бири зарда қи-либ чиқиб кетди. Буларнинг бу алпозда чиқиб кетиши Қаландаровни яна ҳам ғазабга келтирди.-У секретарни беодоблар хуружидан ҳимоя қилган бўлиб, кўнглига ту-гиб юрган гапини гапириб олди.

— Айб ўзингизда! — деди Саидага қўлини бигиз қи-либ,— одамлар билан аймоқи бўлиб қатталарни бетга чопар, беандиша, ёшларни шашшак қилиб қўйдингиз! Бунақа фуқаропарварликдан ишга фойда йўқ! Ҳар ким ўз иззатида туриши керак!

Қаландаров фуқаропарварлик ҳақидаги гапни пи-санда қилиб айтди. Саида бунинг замирида нима ётганини, ҳозир бу ҳақда мунозара қилса Қаландаров ўз нуқтаи назарини исбот қилишга тиришиб жанжал чиқаришини, натижада бу ботқоққа яна ҳам чуқурроқ ботишини билиб тургани учун сўзни қизларнинг «беодобчи-лиги» доирасидан чиқармасликка тиришди.

— Бирор муомалани билади,— деди Саида ниҳоятда совуқонлик билан,— бирор билмайди; бирор гапни ёф-лаб гапиради, бирор тиканак боғлаб гапиради... шунинг учун иш билан келган одам гапни қай тарзда гапирга-нига эмас, нима деганига қаралса дуруст бўлар...

Қаландаровга қизларнинг шашшаклигидан ҳам кўра Саиданинг бу гапи ошиб тушди.

— Мана шунақа қилиб ҳалқни бузасиз-да! Тепангиз-га чиқиб кетаяпти, индамайсиз! Иш билан келган эмиш! Нима иш билан келиби?

Саида жилмайди.

— Назаримда бизни танқид қилгани келишибди.

— Нима, Мехрини ўқишга юбориб хато қилиб-мизми?

— Йўқ, бу тўғрида қизлар хато қилишяпти. Биз бу-ви тушунтиришимиз керак эди. Менга маъқул бўлган томони бошқа... Муштдай-муштдай қизлар бизнинг иши-мизга аралашяпти. Қўзига хато кўринган нарса тўғри-сида тортинмай гапиряпти...

Қаландаровнинг аччиғи келди.

— Танқид шунақа бўлар эмишми? «Кўзингиз кўргани Мехри бўлибди-да», «колхозда Мехридан бошқа одам қуриб кетибдими!»... менга шунақа десин, кўкрагига тиззамни тираб тилини суғуриб олай!

Танқид деганда раиснинг оғзидан чиқсан бу гапдан Саида ташвишга тушган бўлса ҳам, қаҳ-қаҳ уриб кулди.

— Қўшниларнинг олдида тоза шарманда қилар экансиз!..

Қаландаров Саиданинг олдига нима учун кирганини унутиб, чиқиб кетмоқчи бўлган ерида тўхтади.

— Нега? Қанақа қўшни?

— «Социализм» колхозидан келадиган ўзаро текшириш бригадаси аъзолари камчилигимизни топиб танқид қилишса ҳар бирининг кўкрагига тиззамизни тираб «тилингни чиқар» деймизми?

Бу гап Қаландаровнинг жон-жонидан ўтиб кетди.

— Мунча ҳам заҳар бўлмасангиз! Сизни чаққан илон тил тортмай ўлади! — деди чакка томири чиқиб.

Саида кулиб юбормаслик учун билагини қаттиқ чимчилаб, лабини тишлади. Қаландаров бир оздан кейин сўради:

— Бригада келар эмишми? Биз бригада юборганимиз йўқ-ку? — деди ва Саидадан жавоб кутмай жаҳл билан мўйловини буар экан: — Келса келаверсин, мен Назаровга ҳеч қаҷон ютқизган эмасман! — деди.

«Бўстон» қаторасига бир неча йилдан бери «Социализм» билан муносабақалашади, ҳақиқатда ҳам «Социализм»ни ютса ютганки, унга ютқизган эмас. Лекин ўзаро текшириш ўтказилганда ҳам, мусобақа якунланганда ҳам ҳамма эътибор хўжалик масалаларига берилиб, шартноманинг бошқа моддалари фақат хўжа кўрсин учунгина тилга олинар эди. Саида буни яхши билар эди.

— Хўжалик ишларидан кўнглим тўқ,— деди Саида.— Ҳатто шундай аҳволда бўлган ғўзани ҳам кўтариб олдик. Лекин маданий-маший соҳадаги ишларимиз оқсайди.

— Масалан? — деди Қаландаров гарчи Саида нималарни кўзда тутаётганини ўзи билса ҳам.

— Масалан... уй-жой қурилишини олайлик. Бу йил йигирмата уй қуришимиз керак. Йилнинг ярми ўтиб кетди, энди бешта уй битди. Ҳа, айтгандай, «Социализм» правлениеси ғалати бир масалани муҳокама қилибди: «Одам боласи қаерда, қандай шароитда туғилаётibди, қаерда ва кимларнинг қўлида қандай тарбия кўраётibди!» Жуда ҳайрон қолдим! Бу ҳазил гап эмас! Правлениеда шундай масала муҳокама қилиниши ҳазил гап эмас!

— Бу Назаровдан чиққан ақл эмас,— деди Қаландаров,— ким айтди сизга?

— Қайси куни «Социализм»га борган эдим, партия ташкилотининг секретари билан гаплашиб қолдим. Ўша айтди.

Қаландаров хавотирга тушгандай шошиб:

— Нима иш билан борган эдингиз?

— Шундай... кечки пайт отланиб... Ўзимни отга ўргатэтибман. Кўк той ҳозир менга жуда ўрганиб, ипакдай бўлиб қолди.

Қаландаров Саидадан бир тарсаки егандай дами ичига тушиб кетди. Унинг «Социализм»га борганлиги, секретарь билан гаплашганлиги, шу ҳафта ичи ўзаро текшириш бригадаси келиши кўнглида кўп шубхалар, гумонлар, тахминлар туғдирган бўлса ҳам ҳеч нарса демади, ҳолатини билдирамаслик учун Саидага яна биринки савол берган бўлди-ю, нимага кирганини буткул унутиб, чиқиб кетди. Саида буларнинг ҳаммасини сезди, лекин сезганини Қаландаровга билдирамади.

«Социализм»дан ўзаро текшириш бригадаси роса тўққиз кун деганда келди.

Қаландаров бригада қачон келишини Назаровдан аниқ билиб, бир ҳафта давомида ўзи югуриб, одамларни ютуртириб иложи бор тайёргарликни кўрди. Козимбекни куни-туни югуртиб туғруқхонанинг кам-кетигини тўғрилади. Кифоятхон ҳаммомга кассир ва ҳаммом қошидаги сартарошхонага уста ёрдамчиси этиб тайинланди. Ҳуринисо ўз вазифасининг ижросига киришиб, бир неча кун давомида боғча ҳовлисида лапанглаб, у уйдан бу уйга кириб, семизлигидан нолиб, боғчани шу аҳволга солган Кифоятхонни қарғаб, тўқ пашшалар қорайтириб юборган деворларни оқлатди; шифтларни, мебелларни артдирди, ҳовлини тозалатди, бевош бўлиб кетган болаларни адаб-одобга ўргатди... Клубни безатиш, ҳали расмий суратда ташкил топмаган миллий музика, мотор, радио, агротехника, фото тўгаракларини ускуналаш учун пул берилди. Зарур бўлиб қолган вақтда тегирмон юргизиб, мана шунаقا лозимомад чоқларида чироқ ёқадиган «электростанция» механизгининг «кўтаролмайди» деб дод дейишига қарамай Қаландаров идорага, сада атрофига, чойхона ва кўчага яна бирмунча лампочкалар қўйдирди ва бригада келган кундан бошлаб то кетгунча станцияни юргизиб туриш, чироқларни липиллатмаслик, лампочкаларни симёғочда памидордай қизариб туришига йўл қўймасликни буюрди. Эртасига бригада, кела-

диган куни кечқурун идора хизматчиларидан кимда батарейлик радиоприёмник бўлса ҳаммаси сафарбар қилиниб, идора йўлагига, кўча томондаги болахона айвонига, ҳаммом ва унинг устидаги меҳмонхонага, чойхонага, гараж ҳовлиси ва бошқа жойларга ўрнатилди. Эртасига — бригада келган куни бу приёмниклар эрта саҳардан ярим кечагача қулоқларни қоматга келтириб турди.

Бригада колхознинг хўжалик ва маданий юмушини уч кун текширди. Учинчи куни кечқурун умумий мажлис чақирилди.

Бригада «Бўйтон»нинг экин-тикинидан унчалик нуқсон топмади, аксинча, кўп бригадалардаги пахта парваришига юксак баҳо берилди. Гап шу ҳақда бораётгандан шопдай мўйловини тез-тез бураб, керилиб ўтирган Қаландаров фермалардаги камчиликлар айтилганда бошини қўйи солиб, қўлига тушиб қолган қалам билан қофоз чиза кетди; маданият, маданий қурилиш соҳасидаги камчиликлар тўғрисида қизиқ-қизиқ фактлар очилиб, халойиқ гур-гур кулганда эса қизарип, терлаб, ўтирган ерида ярим газ чўқкандай бўлди.

Шу хилда кулгига сабаб бўлган фактлардан бири радио эди. Бригада аъзоларидан бири ҳар қаерда ўрнатилган батарейлик приёмникларга эътибор қилган экан. Шу одам «колхозни бу хилда радиолаштириш қимматга тушмайдими?» деган гапни ўртага ташлади. Шунда орқа қаторда ўтирган ёш, шўх бир товуш:— «Ташвиш тортманг, ҳаммаси орият, сизлар кетгандан кейин эгалари олиб кетади», деди. Қийқириқ, чапак бўлиб кетди. Қаландаров бу «хоин» ким эканини ҳарчанд билгиси келса ҳам ўша томонга қарагани бошини кўтаролмас эди.

Мажлиснинг охирида Қаландаров сўз олди. У, минбарга чиққанидан кейин яна ҳам қизарип, кўзлари миллилаб, аввал залга, кейин президиумга қаради. Саида столга тирсакланиб, иккала қўли билан бошини ушлаб ўтирган эди, Қаландаровнинг кўзи кўзига тушиши билан икки марта тилини кўрсатди. Қаландаров шу қадар ҳаяжонда, шу қадар паришон бўлишига қарамай Саиданинг бу ишорасини дарров тушунди, Саида «танқидчиларнинг тилини суғуриб олишга урина кўрма» демоқчи эди.

Қаландаров, ҳақиқатан, танқидчиларнинг бошини қашлаб туриб қорнига муштламоқчи, ҳатто, «яқинда биз

ҳам «Социализм»га бригада юборамиз, ўшанда гаплашамиз» демоқчи эди, Сайданинг ишорасидан кейин бу ниятидан қайтди, шу билан бирга, гапини йўқотиб қўйди; минбарда хийла туриб қолганидан кейин сўзини мусобақадошларга раҳмат билан бошлаб, раҳмат билан тугатди. Саида ниҳоятда хурсанд бўлиб бошлаб берган чапак узоқ давом этди.

Шундан кейин Саида Қаландаровнинг танқидга хийла эти ўлган ҳисоблаб, кўзлаган мажлисини яқин кунларда ўтказиш мумкин деган қарорга келди. Ростдан ҳам танқидга Қаландаровнинг эти хийла ўлган, бундан бирмунча вақт бурун уни бирор шунчалик танқид қилса, ҳақиқатан, «тиззасини кўкрагига қўйиб, тилини суғуриб олишга» жон-жаҳди билан уринар эди.

## XVIII

Партбюро Зулфиқоров иши юзасидан тузилган комиссиянинг раиси Қаландаровнинг информасиясини, комиссия чиқарган холосани эшишиб, муҳокама қилиб, Зулфиқоровни партия сафидан чиқарди, шу билан бирга, хотин-қизларга муносабатда ўтмиш салқитлари ҳануз юз бериб, кўзбўямачилик Зулфиқоров ишидаги-дек жинои тусда бўлмаса ҳам, ҳар нечук, содир бўлиб туришини таъкидлади ва коммунистларни бу иллатларга қарши омонсиз курашга чақирди.

Икки кундан кейин бўлган ёпиқ партия мажлиси бюронинг қарорини бир оғиздан тасдиқлади. Шу билан бирга коммунистлар Зулфиқоров номи билан юзага қалқиб чиққан бу иллатларга чуқурроқ қўл солишиди. Коммунистлардан бири бундан бирмунча вақт бурун клубда хотин-қизлар учун ўюнтирилган лекциядан кейин бўлган гаплар ҳақида сўзлаб, Сайдани танқид қилди:

— Ўшанда «нима учун бизнинг колхозда ҳали ҳам хотин-халажга бир кўз билан қаралади-ю, эркакларга бошқа кўз билан қаралади», деган савол тушган экан. Ўшанда сиз, ўртоқ Алиева, «Мен бу саволга дабдурустдан жавоб беролмайман, вақт соати билан жавоб топамиз», деган экансиз. Қани жавоб топганингиз? Бу кўпдан бери жавобга маҳтал бўлиб ётган савол эди-ку. Агар шу саволга илгарироқ жавоб топилса, партия ташкилотимиз, правлениемиз шунга қараб иш тутса,

эҳтимол, Зулфиқоров ҳам қадамини билиб босар эди, Мехри ҳам унинг изидан юрмас эди. Яна бир мисол: сиз, ўртоқ Алиева ўзини салқинга урган бир қанча эркакларнинг ўрнига хотин-қизлардан қўйиш масаласини кўтарган эдингиз, нима учун шу масалани охирига етказмадингиз? Бунга ким, кимлар монелик қилди?

Партбюро билан правление бу масала билан мутташиб машғул бўлса ҳам бунақа ишларни дарров қилиб бўлмас эди. Шунинг учун бу ҳақда ҳозир таъна қилиш учун эртароқ бўлса ҳам нотиқ масалани тўғри ва шу билан бирга кескин қўйгани учун Саида хурсанд бўлди-ю танқидга тан берганини кўрсатиш мақсадида бошини қуян солиб ўтири; ўзини шундай тутиши, назарида, бир жиҳатдан, коммунистларнинг сўзлашга рағбатини келтирса, иккинчи жиҳатдан, дамба-дам луқма ташлаб, бўлар-бўлмасга бетоқат бўлиб ўтирган Қаландаровга ибрат бўлиши керак эди. Бироқ унинг иккинчи мўлжални тўғри чиқмади. Сўзга чиқсан коммунистлар хотин-қизлар масаласида партбюрони, айrim коммунистларни, Саидани танқид қилганда, ҳар нечук, гапга қулоқ солаётган Қаландаров, танқиднинг тифи ўзига қаратила бошлаганда жizzакилик қила бошлади. У, авзойидан, сўзга чиқиб ҳамма ёқни чапа-растা қилиб ташлайдиган, мажлиснинг салмоғига, салобатига путур етказадиганга ўхшаб қолди. Шунинг учун Саида музокаранинг охирини кутиб ўтирасдан сўз олди:

— Биз ҳозир муҳокама қилаётган иллатларни Зулфиқоров ундириб, Зулфиқоров ўстиргани йўқ! — деди Саида, — бу иллатларнинг чуқур илдизлари ўзимизда бўлган, қай сабаб билан бўлсин, колхозимизда вужудга келиб қолган «об-ҳаво шароити» уни кўкартирган, ўстирган, айrim ҳолларда ғовлатиб юборган. Биз ҳозир бу иллатларнинг ғовлаб кетган жойини кўриб турибмиз. Бу «об-ҳаво шароити» бир томондан, иллатни кўкартирган, ўстирган бўлса, иккинчи томондан, одамларни шу иллатларга кўнигириган, буларни пайқамайдиган қилиб қўйган. Ҳаммадан мана шу омон!

«Колхозда об-ҳаво шароити» деган гап Қаландаровга тегиб кетди. У шовқин солиб юборди:

— Масаласини қўйиб ўтирибмиз-ку, қани кўникканимиз! Қани пайқамаганимиз!..

Саида унинг шундай дейишига маҳтал бўлиб тургандай дарров илиб олди:

— Аёлларга феодал муносабат фақат хотин устига хотин олиш, кўз бўямачилик, фақат пахта ўғирлаб план тўлдиришдан иборатми?

Мактаб директори Саиданинг фикрини қувватлади:

— Бундан ўн йил бурун мактабларга тортилган саксон уч қиздан бу йил ўнинчи классни фақат олти киши битирди, қолгани ҳани? Бу аҳволни ким пайқади? Пайқаш у ёқда турсин, ўқитувчиларнинг додига қулоқ осадиган киши бўлмади! Бу феодал муносабатга кирмайдими?

Коммунистлардан яна бири луқма ташлади:

— «Социализм»дан брингада келиши олдида орият-приёмниклар билан колхозни радиолаштирганимиз кўзбўямачиликка қирмайдими?

Қаландаров бир нима деб дўнгиллаб ерга қаради ва бурнининг учи тердан йилтиради.

Одамлар Саидага мана шунаقا луқмалар ташлаб, саволлар бериб, сўзга чиқиб, мажлисда шундай руҳ ҳукм сурдики, Қаландаров назарида, совлат-салобати, обрўйи аста-секин нураётгандай бўлиб, гапириш ва бирон фикрни ўтказишдан кўра мажлисни тезроқ тугатишини хоҳлаб қолди.

Унинг кутганига қарши, ўзи раислик қилганига қарамай, правление мажлиси ҳам худди шу руҳда ўтди. Йилгарилар ҳар восита билан мажлисни босиб, одамларни оғзиға қаратиб келган Қаландаров энди, худди тепасида улуғ бир одам тургандай, салобатини йўқотиб қўйди. У ўзини ўнглаб олиш учун нима деса, нима қилса ҳаммаси акс натижа берар эди.

Правление мажлиси ниҳоятига етай деб қолганда Қаландаров нима бўлса ҳам бирон фикрни ўтказишга қасд қилиб қолди: сўзга чиқсанларнинг ҳаммаси бир оғиздан Зулфиқоровни бригадирликдан олиб, колхозда кетмончи қилиб қолдирилсин, деб турганда Қаландаров уни колхоздан бетўхтов ҳайдашини таклиф қилди ва шу таклифида туриб олди. Бу ҳол ҳаммани ташвишга солиб қўйди: Қаландаров ўз фикрида қолгаилигини протоколда қайд этилишини талаб қилса-ю масала шу кўйинча умумий мажлисга олиб чиқилса, бунинг оқибати нима бўлади? Бунинг оқибати нима бўлишини ҳамма билиб турар эди: биринчидан, раис билан бутун правление аъзолари орасидаги келишмовчилик ҳалқни ҳайратга ва паришонликка солади, Қаландаровни хушламайдиган

Одамлар бундан фойдаланиб, шу мажлиснинг ўзида ҳар хил гаплар тарқатиши мумкин; иккинчидан, мажлиса, турган гап, Қаландаровнинг фикрини ёқладиган, очиқ ёқламаган тақдирда ҳам унга хушомадгўйлик қилиб чапак чаладиган одамлар топилади, унда тортишув бошланади-ю ҳалқнинг диққати асосий масаладан четга тортилади; учинчидан, Қаландаровнинг таклифи, шубҳасиз, ўтмайди, унда раиснинг обрўйи тушади.

Умида иккинчи мартаба сўз олди:

— Арслонбек ака,— деди толиқкан товуш билан,— сиз бу масалада кўпчиликнинг райигагина эмас, ҳатто ўз фикрингизга қарши чиқаётисиз. Ҳаммомнинг гўлохига бир жиннини қўйганингизда нима деган эндингиз? Шу гапингизни Саидаҳон айтиб берганда кўзларимга ёш келган эди... Ушанда «одамнинг чиқити бўлмайди» деган экансиз!.. Энди нега бунаقا деб ўтирибсиз?..

Қаландаров узоқ сукут қилди, сўнgra мулойим, кўпчиликнинг фикрига қўшилишини кўрсатадиган бир тарзда сўз бошлади-ю, лекин охирига бориб қизишиб кетди, айниди:

— Мен ҳалол одамни колхоздан ҳайдаш тўғрисида таклиф киргизаётганим йўқ, жиноятчи ҳайдалсан дяётибман! Ўзларинг иллат, иллат дейсизлар, ўша иллатларни йўқотиш учун шунаقا бир аглаҳни ҳайдамасак, бошқаларга ибрат қилмасак қуруқ гапдан нима чиқади. Мен шу фикрда қоламан, протоколнинг бир чеккасига ёзиб қўйилсан!

Тамом! Бошқа гапга ўрин қолмади.

Шундан кейин правление аъзоларидан бири масалани янаги мажлисда кўриб ҳал қилиш учун очиқ қолдиришни таклиф қилди. Ҳамма шунга кўнди. Қаландаров тарҳашлик қилмади.

Одамлар тарқала бошлади. Қаландаров Саидага «сен қол» деб имо қилди ва кабинетдан ҳамма чиқиб кетгандан кейин ғоят ўпкалаган бир алпозда:

— Бу қандоқ бўлди, Саидаҳон!— деди.— Сен бюро составига кирмасанг ҳам ҳамма ишни сен билан бамаслаҳат қиласмиш деган эндингиз... Буёғи қандоқ бўлди?

Саида жуда ҳайрон бўлиб сўради:

— Бюро қайси масалада сизнинграйингизга қарши иш қилди?

— Тўғри-ку, лекин... мана бу Зулфиқоров масаласини айтаман!

Саида талмовсиради:

— Зулфиқоровнинг партиядан чиқарилишига рози эмасмидингиз? Умумий мажлисда ҳеч нарса демадингиз, қўл кўтармадингиз-ку!

Қаландаровнинг юраги торлик қилди.

— Ие!.. Колхозда қолдириш масаласини айтаман!.. Саида чуқур таассуф билан жавоб берди:

— Колхозда қолдириш, қолдирмаслик масаласини правление ҳал қилади-да. Партияро ҳал қилганда, албатта, сиз билан маслаҳатлашар әдик. Правлениенинг раиси ўзингиз...

Қаландаровнинг дами ичига тушиб кетди.

Кечқурун Саиданинг ҳужрасига Козимбек келди. Козимбек ҳеч қачон қоронги тушгандан кейин келмагани учун Саида Қаландаров ҳақида бирон гап топиб келдими, деган хаёлда хавотирга тушди-ю дарров чўқилаб кўрди. Йўқ, хотиржамлик экан: Қаландаров мажлисдан касал одамдай инқилаб, «бўри қариса итга кулги бўлади», деб жовраб келибди-ю бир пиёла мусаллас ичиб ётибди. Козимбек дадасининг бу кайфияти ва қилмишига чандон эътибор бермабди шекилли, шу гапни айтди-ю Абу Али ибни Синонинг меъда касалликлари тўғрисида айтганларидан сўз очди. Саида унинг содда ва беғуборлигидан ичидаги кулиб, сўзига қулоқ солди.

## XIX

Қаландаров бир пиёла мусаллас ичиб ётганича кечаси соат ўн иккidan ўтганда телефон қўнғироғидан уйғонди. Райижроқўм раиси унинг эртага соат ўн бирда бир келиб кетишини сўрар эди.

Ижроқўм раиси ҳеч қачон бунаقا бемаҳалда телефон қилмагани, бунинг устига нима масалада чақираётганини айтмагани учун Қаландаров кўнгли хижил бўлди-ю эртасига эртароқ етиб борди. Қабулхонада яна бир қанча раислар гурунглашиб ўтиришар эди.

Қаландаровнинг эски ошноларидан бири унинг олдига келиб дабдурустдан:

— Секретаринг сени миниб олипти деб эшитдим, ростми?— деб тегишиди.

Бу гап ҳазил тариқасида айтилган бўлса ҳам Қаландаровнинг жон-пони чиқиб кетди.

— Ёу гапни сенга қаіси әшак айтди! Мени минадиган одам боласи ҳали туғилган әмас. Секретарим аёл бўлса ҳам шу гапни сенга айтган одамнинг йингирмата-сига алишмайман. Айтиб қўй!..

Роса соат ўн бирда раислар кабинетга таклиф қилинди. Райижроқўм раиси сўзни жуда қисқа қилди. Районга ўн бир кишидан иборат ҳинд хотин қизлари делегацияси келар экан. Делегация ҳозир Самарқандда бўлиб, индинга соат тўртда районга келиш эҳтимоли бор экан. Делегациянинг район бўйича маршрути ҳозир маълум бўлмаганидан, райижроқўм раиси меҳмонлар райондан чиқиб кетгунча колхоз раисларининг бирон ёққа кетиб қолмасликларини, колхозга меҳмонлар ташриф буюрган тақдирда ўзлари бош бўлиб кутиб олишларини илтимос қилди.

Қаландаров ҳеч қачон бунаقا меҳмон кутмагани учун райижроқўм раиси бирон йўл-йўриқ кўрсатар деб ўйлаган эди, бироқ раис бундай қилмади. Ҳеч ким буни сўрамади ҳам.

Қаландаров бошқа юмушлар билан районда биринки соат айланиб қолди-ю колхозга кун оққанда қайтди. У, саданинг тагига ўтириб, бир чойнак чой чақирди, Саидани сўрамоқчи эди, ўзи келиб қолди. Саида дарвоза олдида кўк тойдан тушиб, уни кимгадир берди-да, қўлидаги папкадан йўлакай бир қогозни олиб, Қаландаровга томон келди. Қаландаров бу сафар нима бўлиб унга ўрнидан туриб қўл берди ва меҳмон тўғрисида оғиз очиши билан Саида:

— Хабарим бор,— деди-да, бояги қоғозни узатди.— Программа. Меҳмонлар колхозимизда неча кун туришини билмаймиз, шунинг учун программани эҳтиётдан уч кунлик туздик. Кечқурун правление аъзоларидан уч-тўрт кишини чақириб, ҳар кимга тайинлик бир вазифа топширилса...

Қаландаров программага кўз югуртириди. Меҳмонлар уч кун давомида қачон, қайси соатда қаерда бўлиши, нима билан шуғулланиши соатма-соат, минутма-минут кўрсатилган эди.

Қаландаров елкасидан бир тоғ тушгандай бўлиб, қувончи ичига сиғмаса ҳам, ўзини тутиб:

— Дуруст, дуруст!— деди.— Аёл тоифасидан бўлсангиз ҳам дуруст чиқдингиз!...

Саида кулди,

— Ҳеч андиша қилмайсиз, одамға қаттиқ тегади ҳам демайсиз-а, Арслонбек aka!.. Аёл тонфасидан бўлсанг ҳам... Бу мақтаганингизми?

— Бўлганим шу! Нима эканимни чўқилаб, титкилаб билганингиздан кўра ўзим айтиб турганим яхши эмасми? Нима қиласиз мени чистон қилиб!..

Қаландаров программани яна кўздан кечирар экан, уч жойда ўзининг номини кўриб кайфи учиб кетди: меҳмонларни кутиб олиш ва кузатишда қисқача нутқ сўзлаши, ўз уйидаги қабул маросимида эса қадаҳ кўтариши керак эди.

Қаландаров бошини қашлаб қолди.

— Ҳимм... мен гапиришим керак бўлармикин... Мен пахта тўғрисида гапирсам-у, бошқа майда масалаларга бошқа одамларни тўғриласак...

Саида унинг аслида нима демоқчи эканини билиб, Ҳиндистон билан Совет Иттилоғи орасидаги дўстлик мұносабати, бу йўлда қўйилган қадамлар ва буларнинг натижаларини қисқача сўзлаб берди. Қаландаров «бу гапларнинг ҳаммасини ўзим биламан» деган қиёфада ўтириб қулоқ солган бўлса ҳам, бўғиқ чеҳраси очилиб кетди; бундан ташқари мусобақадош областга бориб келганидан кейин ҳисобот нутқини Эшонга ёздирганида Саида тутиб олиб ўсал қилганини эслади-ю, шу хижолатликни ювиш, яъни нутқ ёзиш ўзининг ҳам қўлидан келишини исбот қилиш ниятида қаршилик кўрсатмади, лекин писанда қилиб қўйди.

— Мен, албатта, колхоз номидан гапираман. Шундоқ бўлгандан кейин мен айтадиган гапни кўплашиб пишиқтиришимиз керак.

— Ёзib ўқиб берасизми?— деди Сандада норози қиёфада.

— Бир оз ёзамиз, чаласини оғзаки гапирамиз...

Саида ёзма гапни маъқул кўрмаганини ва шу билан бирга бу ҳақда мунозара қилиб ўтиришни истамаганини кўрсатиш учун тўйатдан бошқа мавзуга кўчди.

—«Социализм» колхозинда Ҳиндистонга бориб келган бир хотин бор экан. Раъно Жўраева. Врач. Ўзи Бекободда ишлар экан-у отпуска қилиб, ота-онасининг олдига келган экан. Шу хотинни чақирсак меҳмоиларга хуш келади деган ўйда одам юборган эдим. Жўраева колхоз ҳаваскор созандалари, ўйинчи қизларини олиб кечқурун борарман дебди.

Қаландаров Назаров колхозидан созандалар, ўйинчи қизлар келишини хушламай дўнгиллади:

— Буларнинг ўрнига Тожихонни чақирсангиз ҳам бўлар эди. У ҳам ўйин билади.

— Уни ҳам айтдирган эдим, касал экан,— деди Саида ва «Социализм»дан ўйинчи қизлар келишига ғашлик қилаётганини кўриб, бу ҳақда бошқа ҳеч нарса демади, чунки гап айланса «йўқ» деб туриб олиши, нозик пайтда ишкан чиқариши мумкин эди.

Кечқурун правление аъзоларидан бир қисми йигилди. Программа ўқилиб, муҳокама қилинди. Ҳар бир ишга мутасадди белгиланди. Қаландаров нутқ ёзиши керак бўлгани учун бошқа ишлардан ўзини озод қилди-да, одамлар тарқалгандан кейин бухгалтериядан бир қучоқ ҳар хил ҳужжатларни олиб уйига кетди, ҳатто хушхат Ҳуринисони ҳам ёрдамга чақирмай, яrim кечагачачувалчангамо ҳарфларни ўз қўли билан териб, биринчи нутқини зўрга ёзиб бўлди; эрталаб Саидани чақиртириди-да, уни имтиҳон қилмоқчи бўлган бир қиёфада қўлига берди. Саида ўн тўрт саҳифадан иборат қўл ёзма нутқини кўриб: кайфи учиб кетди; йўқ, қараса, ҳар саҳифага бир неча оғиз сўз зўрга сифибди. Саида ичидаги ҳўп кулди. Нутқ шундай бошланар эди:

— «Ҳиндистонлик хотин-қизлар делегацияга «Бўстон» колхозчилари ва раҳбарларидан колхозчиллик саломи. Бизким «Бўстон» колхозчилари, идора хизматчилари паҳтакорлар қурултойининг тарихий қарорларидан илҳомланиб, паҳтачиликда ўтган йил орден-медалларга эга бўлдик, бу йил ҳам об-ҳаво шароитига қарамай қўшимча мажбурият олиб, ҳар гектаридан ўттиз икки центнердан бажариш учун курашиб, ҳозир ғўзаларни бригадалар бўйича юз процент кўтариб олдик...»

Ундан кейин сўз колхоз хўжалигининг уруш йилларидаги аҳволи, ҳозирги ҳолати, хўжалик тармоқларининг тараққиёти, ўтган йил кимнинг бригадаси гектаридан қанчадан паҳта, ғалла, беда, сабзавот, полиз маҳсулоти олганлиги, бу йил қанчадан олиш мўлжали борлиги, чорванинг ўсиши, чорва маҳсулоти ва маҳсулдорлигининг кўпайиши, ипакчилик, ишлабчиқариш бинолари, уй-жой қурилиши, маданий-маиший ишлар тўғрисида борар эди.

— Камчиликларимизни кўрсатишнинг ҳожати йўқ,— деди Қаландаров худди Саида шуни таъна қиласиган-

дай.— Меҳмонлар, барибир, бизга ёрдам қилишолмайди. Пахтакорлар қурултойида қулоғимга киргандай бўлган эди, Ҳиндистонда пахта ҳосили гектаридан... жуда паст ҳосил олинар экан.

— Яхши,— деди Саида юзига жиддий тус бериб,— жуда боллабсиз!

Қаландаров жуда хурсанд бўлиб, мўйловини бураб қўйди.

— Унча-мунча хатоси бордир... яна кўриб чиқамиз! Қолганини бугун кечаси ёзиб ташлайман.

— Қолганини ёзиб ўтирганг, Арслонбек ака, ҳар қанча нутқ керак бўлса шунинг ўзидан чиқади. Энди яна бир маслаҳат чиқиб қолди,— деди Саида худди буткул эсидан чиқиб қолган бир нарсани тўсатдан эслагандай.— Меҳмонларни кутиб олишда: «Хуш келибсизлар, йўқлаб келганларинг учун қуллук» деган маънода оғзаки. бир нима дейиш лозимдир, дейман? Яна ўзингиз биласиз...

Қаландаров шу ўн тўрт саҳифалик нутқини мана шу маросимга чамалаган бўлса ҳам:

— Албатта!— деди, лекин бу нутқни қачон ва қаерда ўқишини сўрагани бўйни ёр бермади.

— Яна бир масала,— деди Саида,— меҳмонлар Мирзачўлни суғориш тарихига қизиқиб қолишлари мумкин, бу ҳақда билганларингизни эслаб қўйсангиз тушган саволларга жавоб бериш осон бўлар эди.

Қаландаровнинг кайфи учиб кетди.

— Ҳимм... Тарихни, албатта, айтиш керак... Доҳийиз Ленин декретга қўл қўйган...

— Тўғри, лекин бир оз юқоридан бошлаш ҳам мумкин,— деди Саида ва Мирзачўлни суғориш тарихини қисқача сўзлаб берди.

Қаландаров бу гапларни билиб олганига бир томондан хурсанд бўлса, иккинчи томондан ғаши келди. «Бу синчалак менга билдирамай роса тайёрлик кўрган эканда, оббо мугомбир-эй!.. Четдан келган меҳмонлар олдида мени босиб кетишга бунчалик жон куйдирмаса ҳам бўлар эди-ку, раисдан ҳам зўр экан деб Ҳиндистонга женотдел қилиб олиб кетармиди! Минг ақлли, минг доно бўлса ҳам, барибир, хотинлигига борар экан-да... Лекин бу гапларни қаёқдан била қолди экан? Носиров ўргатган десам, районга борганида меҳмонлардан дарак йўқ эди. Китобдан ўқиганмикин? Ҳа, китобдан ўқиган

бўлса ажаб эмас, қўли бўшади дегунча кутубхонага шўнгигани шўнғиган-ку. Доим китоб ўқир, ҳар нарсадан тўлиқ хабардор бўлиб юрар экан-да. Ҳим... мен ҳам унча-мунча китоб кўриб турсам бўлар экан...»

Қаландаров Саида айтган гапларни лозим бўлганда айтиб бера олишига кўзи етмай катта ташвишга қолди. Бироқ унинг баҳтига меҳмонлар Самарқанддан тўғри Фарғонага ўтиб кетишиди.

Меҳмонларни кутгани йигилган колхозчилар, «Социализм» колхозидан келган созанда ва ўйинчи қизлар саданинг остида ўйин-кулги бошлаб юборишиди. «Социализм»дан келганларнинг кўплашиб, якка-якка ижро этган ўйинлари Қаландаровга жуда маъқул бўлди. Улар ўйнаётган вақтда даврага битта-иккита «Бўстон»лик қизлар ҳам киришиди. Буларни кўриб, Қаландаров хавотирга тушиб қолди. «Бу бўйнинг узилмагурлар ҳозир мени «Социализм»чилар олдидা шарманда қиласди! Ана, лайлакка ўхшамай ўл, қуллуқ қилиб даврадан чиқа қолсанг-чи!..»

«Социализм»чилар чарчаб даврадан чиқа бошлагандан кейин, ҳақиқатан, ўйиндан файз кетди. «Бўстон»ликлар уста кўрмаган шогирд бўлгани учун ҳар қайси ҳар мақомда йўргалар эди. Шу пайт Саида ўртага чиқиб қулоч ёзди. Қийқириқ бўлиб кетди. Чилдирма яна авжига чиқди. Унга соз қўшилди. Ҳаял ўтмай ялла янгради. Даврага янгидан-янги «Бўстон»лик қизлар кира бошлади. Буни кўриб, Қаландаров анграйиб қолди. Буларнинг ҳеч бири «Социализм» колхозининг уста кўрган қизларидан қолишмас эди.

Давранинг ҳар томонида янгидан-янги қиз-жуонлар, йигитлар чиқиб ўйинга қўшила берди. Саида қараса одамлар орасида Эшон шох соққадай ирғишлиб, пилдираб юрибди; яна бир қараса, лапанглаб юрган Исмоил-жоннинг йўғон гавдаси орқасидан ликиллаб Козимбек чиқиб қолди. У гоҳ ўнгга, гоҳ сўлга жуда чиройли шох ташлаб, ияқ силтаб Саидага томон келар эди. Саида уни кўриб, «меъда-ичак касаллнкларидан ҳам бошқа ҳунаринг бор экан-ку», деган гап кўнглига келди-ю кулиб юбораёзди ва унга таъзим қилиб, басма-басига ўйнаб кетди. Қаландаров ўғли Козимбекнинг ўйинини кўриб ҳанг-манг бўлиб қолди.

Қаландаров ойдинда қоп-қора мумдай бўлиб кўринган саданинг соясида ўтириб яллага қулоқ соларди.

Йигитларнинг қудратли овози ичидага аёл кишининг ингичка ва жуда ёқимли овози гоҳ кўмилиб, гоҳ юзага чиққани толпиниб, гоҳ унинг устида қувониб қанот қоқар эди. «Бу аёл ким бўлса экан?— деди Қаландаров ўзича.— Бизнинг колхозданмикин? Ажаб эмас, колхозимизда шунча ўйинчи қизлар бор экан, ашулачилар ҳам кам эмасдир. Билмас эканман-а!..»

Бу ҳол Қаландаровга жуда эриш туюлди, лекин дурустроқ ўйлаб қараса, колхозда қимираган ҳар бир жонни яхши билгани билан буларга фақат план, фақат процент, фақат «бажариш» кўзи билангина қараб келган экан.

Ой тиккага келиб қолди. Хўроz қичқирди. Соат неча бўлди экан? Одамлар энди ёта қолса ҳам бўлар, эрта туриш керак...

Қаландаров одамларни тарқатиш мақсадида қорасини кўрсатиш учун давранинг ичидан дарвозага томон ўтмоқчи бўлган эди, Сайданинг созандаларга ўйин мақомини буюрганини эшишиб, давранинг ташқарисидан юрди. Уни биринчи марта Сайданинг салобати босди.

Қаландаров киши билмас дарвозадан чиқиб, уйига қараб кетди.

## XX

Қаландаров Зулфиқоровни колхоздан ҳайдамаслик, лекин қилмишларини умумий мажлисда муҳокама қилиш тўғрисида кўпчилик правление аъзоларининг фикрига охири қўшилди, аммо бу ҳақда тездан маҳсус умумий мажлис чақирилишини талаб қилди. Правление аъзоларининг фикрича бу ҳақда тездан ва маҳсус умумий мажлис чақириш — халқнинг диққатини фақат унинг қилмишларигагина қаратиб қўяр, муҳокамадан кузатилган мақсад, яъни иллатларни чимдиб эмас, тагтомири билан қўпориб ташлашга халал берар эди. Правление аъзоларининг бу фикрини Қаландаров ортиқча тарҳашлик қилмасдан маъқуллади.

Шундай қилиб, Қаландаров «Бўйтон»га раис бўлганидан бери правление мажлиси тарихида биринчи марта унинг таклифи ўтмади. Зулфиқоров колхозда қоладиган, унинг қилмишлари маҳсус эмас, навбатдаги умумий мажлисда муҳокама қилинадиган бўлди.

Навбатдаги умумий мажлис бир неча кундан кейин, масала йиғилганда чақирилди.

Мажлиснинг кун тартиби шулардан иборат эди:  
Ғұза парваришининг бориши.

Биттан уйларни колхозчиларга бериш ҳақидаги правление қарорини тасдиқлаш.

Клубда ташкил этилган тұғараларга ажратылған маблағтар сметасини тасдиқлаш.

Зулфиқоров масаласи.

Биринчи масала юзасидан Қаландаровнинг үзи сүз олиб, ғұза парваришининг боришини тұлық ва ёрқин тасвирлаб, бундан кейин қилинадиган ишларни бирмабир санаб берди; кейин, одатдагича, «тушунарлы бўлса керак» деди-ю раис у ёқда қолиб, мажлисни үзи бошқара кетди.

— Энди иккинчи масалага ўтايлик. Ұзларингга маълум, биз битган бешта уйни колхозда яхши ишлайдиган ва шу билан бирга нобоп жойларда турган одамларга бердик. Бироқ Дўстматов устидан правлениега маълумот тушди: бу одам янги уйга ҳали ҳам кўчиди кирмабди Сабабини текширган вақтимизда... Қани, Дўстматов, тур ўрнингдан! Қани, халққа қараб жавоб бер, нима учун шу чоққача кўчиди кирмадинг?

Қирқлардан ошган кенг яғрили бир киши қайтакайта берилган саволга жавоб бермай ерга қараб тура берди. Ниҳоят Қаландаровнинг үзи жавоб берди:

— Кўрпа йиққани тахмони йўқ эмиш!.. Тушунмаган нодон! Ҳали чойнак тергани токчаси, юган илгани қозиғи ҳам йўқ дерсан! Томига ғўзапоя босиб бўлмайди ҳам дерсан!.. Ўртоқлар, таклиф бор: Дўсматовни тарбиялаб, уч кун ичида янги уйга кўчириш мажбурияти Саидхонга юклансин! Қаршилик йўқми! Бетараф ҳам бўлмаса керак!..

Қаландаров учинчи масалага ўтмоқчи бўлган эди, Саида тўхтатди.

— Правлениенинг қарори овозга қўйилмади-ку...— деди ва мажлиснинг раисига мурожаат қилди:— Вазифангизни адо қилинг?

Мажлис раиси «менга гап бермаса нима қилай», деб бир Саидага, бир Қаландаровга қараб ўрнидан турди ва правлениенинг қарорини овозга қўйди. Учинчи масала юзасидан сўз Саидага берилиши керак эди, бироқ раис оғиз очгунча Қаландаров ўрнидан турди.

— Клубда бўлаётган ишларни ўзларинг кўриб туриб-сизлар. Ҳаваскорлар, ҳунар... Биз бу сметани тасдиқлашдан олдин Саидахонга раҳматлар айтишимиз керак. Радио тўгараги ҳозирнинг ўзида мактабга, идорага бир қанча электр қунғироқ ўрнатди. Ҳозир радиоузел масаласини кўтаряпти. Узларингга маълум, бизда аппаратим сим ва бошқа ускуналар бор...

Қаландаров сметани ўқимасдан овозга қўймоқчи бўлган эди, Саида унга мажлис раиси борлигини эслатди.

Раис сметани тасдиқлатиб олганидан кейин тўртинчи масалага ўтиб, Зулфиқоров иши юзасидан текшириш комиссиясининг раиси Қаландаровга сўз берди. Мажлис аҳли унинг сўзини гоҳ тин олмай, гоҳ нафрат ифода қилувчи нидолар чиқариб эшилди. Қаландаров сўзининг охирида правлениенинг қарорини ўқиганда зал яна жим қолди. Мажлис раиси бу қарорга мажлиснинг қарашини сўраганда, қайта-қайта сўраганда ҳам жимлик ҳукм сурди. Шу жимликда Зулфиқоровнинг аввал босинқи, кейин ҳўнграб юборган товуши эшитилди. У, бошини икки тиззаси орасига тиқиб, дераза олдида ерда ўтиради. Қаландаров қаттиқ жеркиб, уни йигидан тўхтатди. Яна жимлик ҳукм сурди. Афтидан, правлениенинг қарорини ҳеч ким маъқул кўрмас эди. Қаландаров ер остидан Саидага «айтмадимми» дегандай назар ташлади. Мажлис раиси учинчи марта залга мурожаат қилганда коммунистлардан бири сўз олди. Ундан кейин яна уч коммунист сўзга чиқди. Буларнинг ҳаммаси ҳам Зулфиқоров ишига кенроқ қараб, унинг туб маъносини очиб кўрсатишга ҳаракат қилди. Шундан кейин мажлис аҳлида Зулфиқоров масаласи ҳал бўлди эмас, энди бошланди, бунинг тагида бунақа гаплар бор экан, деган кайфият туғилдида, раис ҳар сафар мурожаат қилганда бир неча киши баравар сўз сўраб қўл кўтаверди.

Шу маҳалгача ҳеч важ билан кўзга кўринмаган оддий бир кетмончи сўз олди. У мош-гурунч чўққи соқолининг учини тортқилаб ерга қараганича хийла туриб қолганидан кейин кулимсираб сўз бошлади.

— Кўзбўямачилик... Колхозимизда шунаقا ишларни кўп кўраман-у лекин от қўёлмай юрган эдим. Бу тўғрида ўтган-кетгандан гапириб ўтиришнинг ҳожати йўқ. Мана шу мажлисимиизни олайлик. Шу мажлисда қайси бир масала ўртага ташланиб бамаслаҳат ҳал қилинди? Раис

симиз ғўза парваришининг бориши, бундан кейин қилинадиган ишлар тўғрисида гапирдилар. Қарор, вазифа, топшириқ... лекин шу қарор, шу вазифа, шу топшириқларни бажарадиган одамлардан «бу тўғрида сен нима дейсан, сенинг қандоқ ўй-мулоҳазаларинг бор» деб бир оғиз сўралмади-да! Отига мажлис, отига маслаҳат...

Бу гап Қаландаровга яшиндай тегди. Бирор рўй-рост, бирор ер остидан унга қаради. Қаландаровнинг оппоқ оқарган юзи, қисиқ кўзлари атрофидаги табассумни ифодалаши керак бўлган ажин унинг «эчкининг орқаси қичи-са чўпоннинг нонини ейди», деб турганини кўрсатар эди.

Бояги одам ўтириди. У ўтиргандан кейин Қаландаров ўрнидан турди ва ич-ичидан хуруж қилиб келаётган титроқни босишга, бақириб юбормасликка ва илжайишга ҳаракат қилиб:

— Қани, гапир бўлмаса! Нега ўтирдинг? Маслаҳатингни эшитайлик! Бугун кесакдан ўт чиқиб қолди...—деди.

У одам секин ўрнидан турди, кулимсираб одамларга, кейин Қаландаровга қаради.

— Кесак десангиз ҳам майлига,—деди,— лекин сенсираманг, Арслонбек. Мен сиздан икки ёш каттаман. Шу ерда бўйга етган қизим, бола-чақалик ўғлим ўтирибди... Козимбекнинг орзусини кўринг, сенсираманг...

Бу гап Қаландаровни ўзига келтирди, залнинг жим қолгани, бу жимликда кимнингдир чуқур хўрсингани уни эзиб, пачақлаб ташлади. Гавжум ерда йиқилиб тушган киши жони оғриганига қарамай, дарров ўрнидан туриб, ҳеч нарса билмагандай, йўлида давом этгани сингари, Қаландаров пинагини бузмаган бўлиб жойига ўтириди, олдидаги бир варақ қофозга бир нималар ёзган бўлди; қўлидаги қалам қофозга белгисиз чизиқлар чизар экан, ўзи ўйлаб қолди: «бу фалокатдан бунаقا гаплар чиқмас эди-ку. Сенсираманг?! Шу вақтгача индамай келган одам энди нега оғринадиган бўлиб қолди? Юзимга қараб туриб сенсираманг деди-я! Бир гап бор. Колхозга бирон ғаламис оралади, одамларга шу гап ўргатяпти! Бу ишлар нима мақсадда қилиняпти? Тагига етиш керак...»

Қаландаров шу ўй-хаёллар билан бўлиб, навбатдаги сўз кимга берилганидан бехабар қолди, бирдан кулги кўтарилганда қараса, электростанциянинг механизми гапиряпти.

— ...Жуда тўғри, мажлис бўлгандан кейин ҳар қанақа масала кўпчиликнинг райига қараб, кўпчилик билан бамаслаҳат ҳал қилиниши керак. Бу ерда смета масаласи кўрилди, кўрилди эмас, тилга олинди. Умумий мажлиснинг тасдиқига ҳавола қилинган смета ҳатто ўқилмади ҳам. Дўстматовга уй бериш масаласининг ҳал қилинишига қаранг: «қаршилик йўқми? Бетараф ҳам бўлмаса керак» эмиш! Шу ҳам овозга қўйиш бўлдими? Бундан ташқари мажлиснинг раиси турган ҳолда мажлисни Арслонбек акам олиб бордилар. Бу қанақаси! Агар сайлаган одамимиз мажлисни олиб боролмаса бошқасини сайлайлик! Эҳтимол Арслонбек акамнинг ўзларини сайлармиз, эҳтимол бошқа одамни сайлармиз... Илгари ҳам кўп мажлисларимиз мана шунаقا ўтган, кўп масалалар мана шунаقا ҳал қилинган. Бир мисол: ўзларинг биласизлар, таппиллаб қулоқ-мияни ейдиган электростанциямиз эллик-олтмишта лампочкани аранг қизартиради. Клубда концерт, кино қўйиладиган бўлса бошқа жойларни ўчириб қўямиз. Шу электростанцияни деб ҳамма ёққа доимий сим тортиш, бунга икки юз етмиш минг сўм сарф қилиш керакмиди? Агар шу масала ўз вақтида дурустрақ муҳокама қилинса, правление аъзоларидан бири бўлмаса бири: «Хозирча муваққат сим тортиб турайлик, доимий симни Фарҳоддан электр оладиган бўлсак ҳамма симни бошқатдан тортишимиз керак, чунки ҳаммаси эскирган. Радиоузель масаласини олайлик..

Маълум бўлишича радиоузелнинг аппаратураси бундан икки йил бурун олинган экан. Уша йили «Социализм» колхозининг раиси Уммат Назаров радиоузелни ишга солиб, очилиш маросимига Қаландаровни таклиф қилган экан. Эртасига Қаландаров, ҳеч ким билан кенгашмай-нетмай, шаҳарга бориб аппаратура сотиб олибди; лекин қизиқ босилгандан кейин совуб, ўрнатиш ишини пайсалга солибди-ю шу билан қолиб кетибди. Аппаратура олинганидан баъзи бир правление аъзолари бир йилдан кейин хабардор бўлишибди.

Мажлис жуда қизиди. Зулфиқоров бир чеккада қолиб кетди. Қаландаров энди ранги оқариб, асабийлашиб эмас, хижолатдан қип-қизариб, ерга қараб ўтирас эди. Бирин-кетин сўзга чиқиб куйдириб гапирган одам-

лар «липпа», баъзан районга бериладиган нотўғри ахборатлар, теримда колхозчиларга кўпроқ меҳнат куни ишлаб олдириш учун пахта терадиган машиналарнинг ишлишига ҳар йўл билан тўсқинчилик қилиш ва бошқалар тўғрисида ҳеч қандай истиҳолага бормай рўй-рост гапириши. Бу гаплар давомида қип-қизариб ерга қараб ўтирган Қаландаров сўз Исмоилжон Норматовга берилганда юраги шув этиб, беихтиёр бошини кўтарди; бир вақтлар икки орада даромад манбалари тўғрисида бўлиб ўтган келишмовчиликлар, паст-баланд гапларни эслади-ю ранги яна бўзрайиб кетди: «Тамом,— деди ичидা,— оғиз соглани пайт пойлаб юрганларга ҳам сўз тегди...»

Бироқ Исмоилжон сўзининг асосий қисмини Қаландорвнинг энг яхши хислат ва фазилатлари, бригадир сифатида унда кўрган зўр ташкилотчилик қобилияти, колхозчи сифатида ундан кўрган меҳр-оқибатлари, муруватларига багишлади. Бу гаплар самимий эканини мажлис аҳлигина эмас, ҳар бир сўзининг остидан ғараз қидириб ўтирган Қаландаровнинг ўзи ҳам сезиб турар эди. Унинг сўзи давомида зал бир неча мартача чапак чалди, кимлардир унинг сўзини маъқуллаб луқмалар ташлади. Қувноқ ғовур, кулги кўтарилиди... Бу гаплар нақадар ширин, нақадар ёқимли бўлмасин, Қаландаров буларга ҳар нечук, кўтарилиган болта деб қаради-ю, унинг тезроқ тушишини, қаерга тушиб қанчалик қон чиқаришини тезроқ кўриб, хотиржам бўлишни хоҳлар эди. Ниҳоят, болта тушди: Исмоилжон қўшимча деб аталадиган тасодифий, колхоз ишлабчиқаришига дахли бўлмаган даромад манбалари, бир вақтлар бу ҳақда раис билан икки орада бўлган келишмовчилик тўғрисида гапириб берди.

Исмоилжон илгари партбюро аъзоси бўлганида колхознинг бир неча йиллик ҳисоботини кўриб қолибди. Даромад бу йиллар давомида ўн бир сўм билан йигирма уч сўм орасида тебраниб турган экан. Исмоилжон хўжаликнинг асосий тармоқлари пахта, пилла, чорва, мева ва сабзавот-ку, нега даромад бунаقا тебранади деб қараса, даромад камайганда бу тармоқлардан бўладиган кирим умумий даромаднинг саксон беш-тўқсон процентини, кўпайганда эса унинг фақат олтмиш-етмиш процентини ташкил қиласа экан. Демак, даромад хўжаликнинг асосий тармоқлари ҳисобига эмас, қўшимча деб аталадиган тасодифий, колхоз ишлабчиқаришига

дахли бўлмаган омонат манбаълар ҳисобига кўпаяр экан. Бу манбаълардан келадиган даромаднинг асосий қисмини эса район марказида чакана, харидор топилса улгуржи вино сотадиган иккита сабзавот дўкони, колхознинг маҳсус одами Сибирга олиб борадиган олма, узум ва у ердан юбориладиган ёғоч берар экан. Исмоилжон правлениенинг диққатини асосий тармоқларни ривожлантиришдан четга тортадиган, уни хумга, Сибир йўлига термултириб қўядиган бу тадбирга қарши чиқибди, лекин масалани кўтариб удда қилолмабди; биринчидан, раис обрўйи ва халқнинг ўзига бўлган чексиз ишончи билан босса, иккинчидан, фойдаси нақд бўлмаган ҳақ сўздан кўра фойдаси нақд ноҳақ сўз қулоққа тезроқ киради деган хаёлга бориб, фикрида қаттиқ туриб олгани ботинолмабди, бу орада раисга ёмон кўрингани қолибди.

— Мен ўша вақтда ҳам айтган эдим,— деди Исмоилжон сўзининг охирида,— ҳозир ҳам айтаман: бу нарса даромадни кўпайтиришдаги кўзбўямачилик. Бугун меҳнат кунимиз йигирма етти сўмдан тушаётган бўлса, эртага йигирма сўмга тушиб қолиши ҳеч гап эмас. Шунинг учун биз даромадни оширишда хўжалигимизнинг асосий тармоқларига суюнишимиз керак.

Қаландаров ундан бошқа хунук гаплар кутгани учун ғалати бўлиб, анграйиб қолди.

Исмоилжон ўтирганидан кейин залда ғовур кўтарилиди. Бу ғовурни раис ҳарчанд уриниб ҳам босолмади. Халқ афтидан, омонат манбаълар ҳақидаги фикри қизғин муҳокама қиласа эди. Қаландаров бу муҳокаманинг руҳини англаш учун залга зимдан разм солиб ўтириди. Минбардан янграган аёл кишининг өвози ғовурни босди. Қаландаров ялт этиб минбарга қаради. Минбарда Ойниса турар эди. Қаландаровнинг юраги гумуриб кетди: «Бир вақт клубда лекцияни мажлисга айлантироқчи, гап сотмоқчи бўлган аёллардан бири шу-ку! Ушанда гапни шу бошлаб, аёллар қий-чув кўтаришган экан, ҳозир ҳам шундоқ бўлармикин?» Қаландаров ўзига таскин берди: «Ўнда ўзим йўқ эдим, ўзи йўқнинг кўзи йўқ...»

— Кўзбўямачиликка мен ҳам битта мисол кўрсатиб, ундан кейин хотин-қизлар масаласига ўтаман,— деди Ойниса.— Эсларингда борми, бир йили мен бир кунда саккиз юз қирқ олти килограмм пахта терган эдим!

Залда қаҳқача кўтарилиди. Қаландаровнинг ранги яна

**бұз бўлиб кетди.** Товушлар эшитилди.

— Ўша ғирромликни айтиб беринг!

— Ўша иш қанақа бўлган эди?..

Ойниса воқиани гапириб берди.

Бир куни Арслонбек унинг уйига келиб: «Сен эртага аzonда фалон участкага чиққин, райондан одам келган, ўшани олиб чиқаман, шу одамниң кўз олдида ўн беш минут жонингни жабборга бериб пахта терасан, шу ўн беш минутда терган ҳар бир кило пахтангни ўн беш килога оламан», дебди. Аzonда раис билан меҳмон иккovi ўша участкага келибди. Бояги киши соатига қараб турибди. Ойниса жон-жаҳди билан уриниб, чорак соатда салкам ўн олти килограмм пахта терибди. Кетишибди. Икки кундан кейин район газетасида Ойнисанинг оти чиқибди.

— Бирор ҳайрон, бирор кулади...— деди Ойниса,— лекин кўпроқ сўкишди. Сўкиш эшитган, колхозда ўғридай писиб юрган мен бўлдим, район слётида керилиб, мўйловини бураб ўтирган раисимиз бўлдилар!..

Зал гуриллаб кулиб юборди. Қаландаров яна қизариб, терга ботиб, ерга қараганича қимирламай ўтираси әди, нима бўлиб кўзи Саидага тушиб қолди. Саида ундан ҳам кўпроқ эзилиб ўтираси, айтилаётган гаплар ўнга оловли қамчидай тегаётгани ўтиришидан ва авзойидан билиниб турар әди. Буни кўриб Қаландаров ҳайрон бўлди: «Калтак менинг елкамга тушаётибди-ку, нега сенинг орқанг қаваради?»

Ойниса энди «феодализм масаласи»га ўтмоқчи эканлигини айтганда бир томонда ўтирган аёллар чувиллашиб қолишибди.

— Биз бу масалани клубда кўтарган эдик,— деди Ойниса давом этиб,— лекин Саидахон «кўрамиз, текширамиз» деганлари учун дилимиздагини тўкиб солмадик, кутдик. Ўрни келганда Саидахондан ҳам ўпкалаб қўяйлик: кўрмадилар ҳам, текширмадилар ҳам. Шунаقا, йўрга минган йўлдошига қарамас экан... Арслонбек акам Зулфиқоровнинг хотини устига хотин олгани, хотин-қизларга эскича қараши тўғрисида жуда куйибишиб гапирдилар, қани энди аёлларга ҳамма вақт шунаقا куйсалар!.. Мен раисимизга, бутун правление аъзоларига битта савол бермоқчиман: правление шу яқин йилларда Зулфиқоров ишидан бошқа хотин-қизларга тегишли нечта масала кўрди-ю қанақа қарорлар чиқар-

ди? Наҳотки шундан бошқа ҳеч қанақа масала бўлмаса! Мана мен, беш боланинг онасиман, эрим олтинчи бола, чунки бунга ҳам қарашим керак. Эрим билан баравар кетмон чопаман, кечқурун рўзгор, бола... Ўтган йил мен ўн бир тоннадан ортиқроқ пахта тердим. Бир ҳисоблаб кўринг-чи, шунча пахта терганимда неча марта бўтириб турдим экан, бундан ташқари шу ўн бир тонна юкни кўтариб неча юз километр йўл босдим экан! Кечқурунлари яна рўзгор иши, бола ташвиши, мажлис... Мен пардоз ҳам қилишим керак, пардоз қилмасам эрим бурнини жийиради.

Залда қийқириқ-кулги бўлиб кетди. Лекин Ойнисанинг ўзи кулмас эди.

— «Қизил тонг» колхози шу яқин йилларда кетмонни йўқотиш пайига тушган дейишади, бизда ҳали бу гапнинг учи ҳам чиққан эмас. «Социализм» ўтган йили пахтасининг йигирма етти процентини машина билан терган эмиш, биз неча процент терганимизни билмаймиз. Шуни биламанки, машинага ажратилган каттакон бир қартага Арслонбек акам мўйлов қилиб одам қўйдириб юбордилар — «колхозчилар меҳнат куни ишлаб олсин» эмиш! Сиртдан қараганда бу колхозчиларга ғамхўрлик, қатини очиб қарасангиз колхозчилар, айниқса хотин-қиз колхозчиларнинг бошини оғир меҳнатдан чиқармасин деган гап! Машина ёмон эмиш! Нимаси ёмон, қаери ёмон? Айтайлик, тузатсин!.. Даламизга биринчи чиққан трактор эсимда бор: плуги ўрта қўлдай томирга илиниб қолса торта олмас эди. Ҳозирги тракторлар билакдай томирни писанд қилмайди... Сўзимнинг охирида яна бир нарсани правлениемизнинг юзига солмоқчиман: мен мана шундай меҳнат қилганимга яраша кошки кўнглим тинч бўлса! Қўлим ишда-ю кўнглим яслида, боғчада. Яслиларимиз ўзини ўзи эплай олмайдиган кампирлар қўлида, боғчамиз бўлса.., хайрият, Ҳуринисо опамиз инсофга келиб, ишни ўз қўлларига олибдилар... Тўғруқхонамиз не аҳволда. Мана энди Қозимбек келибди, тузалиб кетар-ку, лекин шу чоққача на раисимиз, на правление аъзоларидан бирон киши бирон марта туғруқхонага бош тиққани маълум эмас. Мен икки болами ни шу туғруқхонада туққанман. Одамнинг хўрлиги келар экан: сут топшириш планини ҳамиша ортиғи билан бажарамиз, ортиқча сутни сотгани районда иккита дўконимиз бор, лекин кўз ёриб ётган она бир стакан

сүт ёки кичкинагина битта пиёлада қаймоқ юзини кўрмайди!..

Ойниса сўзини тугатиб минбардан тушганда яна гулдурос қарсак, қий-чув кўтарилиди. Энди фақат Қаландаров эмас, бутун правление аъзолари ҳам ерга қараб қолишиди ва одоб юзасидан қарсакка қўшилишиди. Бошқа гаплар билан бўлиб, Зулфиқоров ҳақида правление нинг қарорига қандай қарашини айтиш Ойнисанинг мутлақо эсидан чиққан эди. Буни на президиум пайқади, на халқ. Унинг ўзи эслаб ўрнидан турди, раисдан ижозат олиб халқа юзланди.

— Кечирасизлар, асосий гап эсдан чиқибди: Зулфиқоров ҳақида правление чиқарган қарорга қўшиламан.

Ундан кейин яна бир қанча эркак-аёл сўзга чиқди. Булар асосан ўzlаридан олдин сўзга чиққан нотиқларнинг фикрларини янгидан-янги фактлар билан тасдиқлашди. Музокара тўхтатилгандан кейин мажлис раиси якун қилиб, правлениенинг қарорини овозга қўйди. Қарор бир оғиздан маъқулланди.

Мажлис ёпилди. Саида Қаландаров билан бирга чиқмоқчи эди, нимагадир алақсиди-ю, қараса, Қаландаров чиқиб кетибди. Саида ҳозир унинг кетидан чопишни лозим кўрмади-да, кейинроқ уйига борди. Ҳуринисо унинг бетоб эканини, ухлаб ётганини айтди.

Кечаси Саиданинг ҳужрасига Козимбек билан мухабир Аъзамжон келди. Саида Козимбекдан отасининг соғлигини сўраган эди, Козимбек мийигида кулиб:

— Гапларнинг кайфини суриб ётибди,— деди.

Мажлисдан олдин Қаландаров Аъзамжонни кабинетига олиб кириб, Зулфиқоров ҳақидаги материаллар билан таниширибди ва тездан фельветон ёзиб, район газетасида бостиришни сўрабди. Аъзамжон шу ҳақда Саида билан гаплашгани келган эди. Саида бу фикр маъқул бўлмаса ҳам, очиқ бир нима демади-ю фельветондан кўра мажлис ҳақида тўлароқ ҳисобот берилса, райондаги бошқа колхозларга ҳам фойдаси тегар деганга ишора қилди.

Бу ишора Аъзамжонга жуда маъқул тушди.

## XXI

Козимбекнинг гапидан Қаландаров ўзини касалликка солиб ётиб олгани маълум бўлгандан кейин Саида жуда хафа бўлди. Унинг ҳеч кимни қабул қилмагани

аҳволни яна ҳам чалкаштиар эди: ким билади, уйда ётиб қандай ўй-хаёлларга боради-ю, «касал»ликдан қанақа бўлиб бош кўтаради.

Саида эртасига ҳам Қаландаровни кўролмай куни бўйи диққат бўлиб юрди-ю кечқурун бирпас ёзилиб келгани кўк тойни миниб, «Социализм»га қараб кетди. У, тойини ўзига ром қилиб ва ўзини отга ўргатиб юрган вақтларида «Социализм»га бир неча мартаба борган, Тожихонни бир-икки кўриб чақчақлашган, лекин унинг уйига киргани фурсат бўлмай ҳар сафар «бир келаман, бафуржа ўтириб бир чақчақлашамиз» деган ваъда билан хайрлашган эди. Диққатчиликни ёзиш, ваъдага ва-фо қилишдан ташқари агар Тожихон ҳануз бетоб бўлса, ҳол сўраш учун ҳам бориш зарур бўлиб қолди.

Тожихон касалдан тузалган, лекин ҳали ишга чиқмаган экан, Саиданинг келганидан жуда хурсанд бўлди, миннатдорлик билдиргани сўз, ўтқизгани жой тополмай қолди.

Унинг ҳовлисини, уйини, рўзғорини кўриб Саиданинг оғзи очилиб қолди: ҳовли эмас, гулистон—бўстон, уй эмас, кичкина қаср, рўзғор эмас, хазина—музей! Столовойга кирилганда жилваланиб турган мебеллар, ҳеч қаерда кўрилмаган каттакон ярқироқ радиоприёмник, буфетнинг ойнасидан камалакнинг ҳамма рангида товланаётган хрусталь ва қиммат баҳо чинни анжомлар, деворларга осилган аломат суратларнинг зарҳал рамкалари кўзни жимиirlатиб юборар эди. Саида бу нарсларнинг жилоси ва нафис-нозиклиги олдида ўзини жуда қўпол сезиб, бирон нарсага тегиб кетиб синдириб қўйишдан қўрқандай қимиirlамай ўтири; Тожихон буфетга терилган пиёлалардан бирида чой узатганида ташвишга қолиб «менга жўнроқ пиёлада бера қолинг», дейшиига сал қолди.

Эри ҳисобчи, ўзи бригадир, икковининг топганидан шундай ҳовли-жой, шундай рўзғор ортдириб бўлармийкин?

Саида кўнглига шу гап келди-ю Тожихон ва унинг оиласи ҳақидаги бу ножӯя гумонни кўнглидан тезроқ қувиб чиқариш учун ўрнидан туриб, девордаги суратларни томоша қилди. Булар ичida унинг диққатини иккита портрет жалб қилди. Буларнинг бири Тожихоннинг қизлик ёки келинчаклик маҳалидаги, иккинчиси нуроний бир кампирнинг портрети эди.

— Ҳамидулланинг орзуси,— деди Тожихон ўзининг портретига ишора қилиб.

Унинг бошида фаранг дурра, устида хонатлас кўйлак, зардўзи желетка, қулоқларида ойбалдоқ, тақдўзи дўппи тикиб ўтирибди; тиззасида дўппининг тепаси, ёнида ки-заги ва ранг-баранг ипак, ўзи ости лабини тишлаб, қошларини чимириб, не машаққат билан игнага пушти ип ўтказаётиби, лекин бу машаққат ифодаси унинг чексиз баҳтиёр чеҳрасига ҳусн бўлиб тушган эди. Саида Тожихоннинг «Ҳамидулланинг орзуси» деганини англай олмай қайрилиб қараган эди, Тожихон тушунтириб берди. Эри унинг мана шу хилда дўппи тикиб, Фурқат айтмоқчи:

Ўсмадин қошлар қаро, қўллар хинодин лола ранг,

Дурранинг оғушидан пешонанинг аҳволи танг...

бўлиб, уйда ўтиришини орзу қилас экан.

— Менинг бунаقا суратим ҳам йўқ, бунаقا ўтириб олдирган ҳам эмасман,— деди Тожихон.— Ҳамидулла Токшентдан бир рассомни олиб келиб бир ойдан ортиқ ишлатди. Рассом минг хил қилиб суратимни чизди, кейин уч ой йўқ бўлиб кетди-ю шу портретни олиб келди.

Ҳамидулла рассомга саккиз минг сўм берибди. Саида бу оиланинг даромади ҳақида кўнглидан ўзига ҳам ботмаган шубҳага ўрин берганида, албатта, биринчи навбатда Ҳамидуллани кўзда тутган эди, саккиз минг сўм бериб, хотинининг портретини ишлатганини эшитганидан кейин кўз олдига юздан тўқсонни урадиган учар бир одам келди-ю шу билан умр қилиб яна унинг хотинга эскича қарашидан шикоят қилиб юрган Тожихондан ҳам ихлоси қайтди. Йўқ, кейиндан маълум бўлдики, Ҳамидулла бузоқнинг ҳақи бор деб сигирнинг сутини ичмайдиган тақводор одамлар тоифасидан экан. Бу ҳақда Тожихоннинг гапига ишонмаслик учун ҳеч бир асос йўқ эди. Тожихоннинг бригадирликдан топган рўзгорга баҳузур етар, баъзан орзу-ҳавас учун ҳам қолар экан. Ҳамидулланинг эса ҳисобчиликдан ташқари битта рўзгорни тебратгулик даромад берадиган бўлак касби ҳам бор экан: автомобилнинг электр ускунаси, мотоцикл, айниқса, радиоприёмник тузатишга районда ҳам тенги кам топиладиган уста бўлиб, бу ишларни кечалари баъзан уйида, баъзан мижозларининг ҳовлисига қатнаб қилас экан.

— Пул топиш, албатта, қийин,— деди Тожихон.— Лекин бу пулни тутиш, билиб сарф қилиш ундан ҳам

қийинроқ. Бу хусусда Ҳамидулла дуруст: ичмайди, чекмайди, бейўриқ улфатчилик қилмайди, бекор кетадиган бир тийинни кўзи билан бўлса ҳам қисиб қолади. Лекин эргинам томчилаб топганини мана бунаقا нарсаларга пақирлаб сочади.

— Эмонми?— деди Саида анжомларни кўрсатиб.

— Яхши, жуда яхши!— деди Тожихон.— Лекин ғараз билан қилинган яхшилик ёмонликдан фарқ қилмайди. Ҳовли-жой, рўзғор, машина, портрет... нима қилса-ю мени қанотимдан уйга михлаб қўйса! Колхозда ишламасам, ҳеч қаерга бормасам, ҳеч ким билан гаплашмасам; ўзимга оро бериб уйда ўтирсан, суйса ийиб, урса йигласам... Ҳозирги замонда бунга нонни сандиққа қулфлаб, қўйвораман деб қўрқитиб, мушт кўтариб, пичоқ ўқталиб эришиб бўлмайди. Мен буларнинг ҳаммасига янгича сандик, янгича пўписа, янгича мушт, янгича пичоқ деб қарайман. Мана, портретни олинг. Ҳамидулла келинчаклик давримдан бир хотира деб, ёшлиқ ва ҳусндор вақтларимни эслаб, бунга саккиз минг сўм сарф қилибдими? Ҳечда! Ҳамидулла шу билан «келинчак бўлиб уйда ўтирган вақтларингда мана шундай беғам-беташвиш эдинг, ўша бахтиёр кунларингга ҳавасинг келмайдими?» демоқчи, шунча йилдан бери қулогимга қуиб келган ўлик гапига рассомнинг ҳунари билан жон бермоқчи! Мана шу ғараз ҳар қадам, ҳар дамда билиниб туради-ю ҳеч нарса татимайди... Бу билан умр қилиш учун кошки шу дарднинг ўзинигина тортсан. Яна буни ҳаммадан, энг яқин одамларимдан ҳам яширишим керак: бирор «шу билан умр қилиб тилла киshan киймай ўл» деса, бирор «битта эрни йўлга сололмасанг бутун бошлиқ бригадани қандай уdda қилаётисан» дейиши мумкин.

Тожихоннинг бундай тўлиб тургани ва бир оз қизишиб гапирганидан шу кунлари эр-хотин орасида гап қочганга ўхшар эди. Бундай кезларда эр ҳам, хотин ҳам салгина яқинроқ одамга кўнглини бўшатишга мойил бўлгани учун қизиқ устидә оиласининг сирини фош қилиб, кейин пушаймон бўлмасин деган мақсадда Саида гапни чалғитди:

— Бу киши қайнанангизми?— деди кампирнинг портретини кўрсатиб.

Тожихон Саидага қараб маъюс кулимсиради.

— Нима учун қайнанангми деб сўрадингиз, онам бўлиши эҳтимоли йўқми?

Саида хижолат бўлди-ю ростини айтди:

— Кечирасиз.. оиласада аксари эрнинг онаси тўрга чиққади.

— Бизнинг оиласизда хотиннинг онаси тўрга чиққан. Бу киши қазо қилганларида Ҳамиддула «қанотим синди», деб йиғлаган эди.

Тожихон яна шикоятга ўтди. Ҳамидулла рўзгорни жуда яхши билгани ва шу билан бирга орзу-ҳавасли ёркак бўлгани, хотинининг уйда ўтиришини, ўтирганда гул, юрганда товус бўлишини истагани ва шунга интилгани учун кампирга жуда маъқул экан. Эр-хотин орасида қанақа келишмовчилик бўлмасин, қанақа гап қочмасин кампир орага тушиб ҳамма вақт куёвининг тарафини олар, «бир эр шу-да», ёки «хотин деган эрдан тўрт ғиалик пастда юриши керак», деб қизини уришар, ҳатто берган сутини ўртага солар экан.

— Онамнинг юзидан ўтолмай Ҳамидулланинг гапига кириб ўқиёлмай қолдим,—деди Тожихон товуши титраб.—Дунёда бирдан-бир орзум агроном бўлиш эди. Агрономлик кундузлари хаёлим, кечалари тушимга кирав эди.

Тожихоннинг дард-ҳасрати чексиз эди. Саида унга ачинди, Ҳамидулланинг ҳулқини қоралади, лекин бу ҳақда бирон ёрдам ваъда қилолмас, чунки Ҳамидуллага таъсир кўрсатиш у ёқда турсин, сури-салобати босадиган кап-катта одам билан бу ҳақда гаплашиши чамалаб ҳам кўролмас эди. Бироқ Ҳамидулла кўринишида, рафткорда, гапда сури-салобати босадиган одам бўлиб чиқмади. У ишдан келиб, ҳовлида узоқ ивирсиб юрди, сув сепди; Тожихон чақиргандан кейин таъзим-тавозе билан уйга кириб келди-ю Саида билан қўл бермай сўрашди, пойгакдаги курсига омонатгина ўтирди. Унинг кичкинагина жуссаси, пайваста қоши, икки томонга бир оз буралиб чиққан шинамгина мўйловчаси ва унинг остида ялтираб турган қип-қизил ва ёғлиқ лаблари, бунинг устига ҳозиргина чимилдиқдан чиққан гўл куёв боладай хижолатдан ўлай деб ўтириши Саиданинг бу одам ҳақидаги тасаввурига сира ҳам қовушмас эди. Наҳот шу одам бир вақтлар бўлса ҳам, хотинига қўл кўтарган бўлса! Наҳот шу одам Тожихоннинг гапини иккита қилса! Тожихоннинг эри ҳақида айтган гаплари, қилган шикояти Саидага ношуд-нотавон аёлнинг инжиқлиги, минфиллагани бўлиб кўринди.

Тожихон Саидани «Бўстон» партия ташкилотининг секретари» деганида Ҳамидулла «Ие, шуни айтмайсизми» дегандай кўзларини катта очиб бир нима демоқчи бўлди-ю, айтмасдан, иргиб турди ва қўлини кўксига қўйиб, мулойим товуш билан:

— Ҳовли уйдан жизми иссиқроқ бўлса ҳам шабадаси бор, таъблари хоҳласа... жой қилиб қўйғанман,—деди.

Ҳовлига чиқиши. Ҳовлига сув сепилган, кўпчиб-тошиб ўсган қирқоғайнининг бағрига ўрнатилган яшил сўрига кўкқарға шоҳи якандозлар тўшалган, парқув ёстиқларни бурчаги билан тикка қилиб қўйилган эди. Хотини сўрида ўтирган ҳолда ўзи ҳовлида пилдираб хизмат қилиб юрганини, хотинига қилган муомаласини кўрган ҳар қандай аёлнинг Тожихонга ҳаваси, кўп эркак-нинг Ҳамидуллага ғазаби келар эди.

Буларнинг ҳаммаси Тожихонга панд берди-ю Саида Ҳамидуллага киноя ва рамзлар билан насиҳат қилмоқчи, лозим келса уни шонга тортмоқчи бўлди, шунинг учун кетишга шошилмади, Тожихон ошга урнаганида ҳам чандон қаршилик қилмади.

Саида гапни «заб хотинингиз бор-да» деб бошлади, унинг қирқ йигитга бош бўлгудек ақл-фаросати, обрўйи борлиги тўғриларида гапириб, Ҳамидуллага миннатдор-чилик билдириди.

— Яшанг, Ҳамидулла ака, Тожихон опамнинг шўнчалик бўлишида сизнинг хизматингиз оз бўлмаса керак,—деди, кейин мақсадга яқинлаша берди:—албатта, тагида бўлмаган одамга минг қилсангиз ҳам нам ўтказолмайсиз. Жамиятда тутиши мумкин бўлган ўрнини олтин соат, яхши туфли, машинага алмаштирадиган хотинлар озми!

Ҳамидулла унинг ҳамма гапига «тўғри, ҳақиқатда тўғри»дан бошқа ҳеч нарса демади; Тожихон тўғрисида очиқроқ гапириш учун илмоқ бўладиган бирон сўз айтмади. Саида гапни айлантириб, Тожихон ақлли, қобилиятли аёл бўлгани учун уйда занг босиб ётганидан кўра жамоат ишида ярқирагани яхши, бу нарса ўзи учун ҳам, эри учун ҳам катта шараф деган мазмунга олиб келди. Ҳамидулла бу тўғрида ҳам «тўғри, ҳақиқатда тўғри» деди. Саида кўнглидагини айтиш учун ҳеч бўлмаса баҳона бўладиган бирон оғиз сўз ҳам айтмади. Шундан кейин Саида баҳона қидириб ўтирмасдан «қизим сенга айтаман, келиним сен эшит» йўсинида рўй-рост гапираверди.

— Хотининг уйда ўтиришини хоҳлайдиган эркаклар ҳам топилади. Булар бир нарсани тушунмайди: иш фақат сабаби тирикчилик эмас. Ўзингиздан қиёс: соқов приёмникни не мاشақат билан тузатсангиз, приёмник бирдан гапириб юборган пайтда эгаси хизматингиз учун қанча пул бериш-бермаслиги эсингизга келадими? Тожихон апамнинг бригадир бўлиб қиласидиган ишини приёмникни гапиртириш билан тенглаштириб бўладими?

Ҳамидулла бунга ҳам «тўғри, ҳақиқатда тўғри» деб жавоб берди-ю Саида кетаётганда унинг ошгача, ош маҳалида, ошдан кейин гапирган ҳамма гапларини бир оғиз сўз билан бир пул қилди қўйди. Тожихон меҳмонга бергани гул кесиб юрганида Ҳамидулла Саидага яқин келиб секин сўради:

— Кечирадилар... Сўраганнинг айби йўқ.. ўзлари куёв қилганмилар?

— Йўқ,— деди Саида.

— Ҳимм... куёв қилиш ниятлари борми?

Саида хижолат бўлиб, нима дейишини билмай қолди ва кулиб:

— Қайдам...— деди.

Ҳамидулла ҳам ғазокат билан кулди.

— Қонун... табиат... Одам — одам билан тирик. Мавсумни ўтказмасдан куёв қисалар ўзларига ҳам яхши, бизга ҳам яхши бўлар эди: Тожихон ўзларидан ибрат олса камина куёвларидан ибрат олсан, турмушимиз яхши бўлиб кетса ажаб эмас...

Саида ҳанг-манг бўлиб, турган жойида қотиб қолди.

Тожихон бир қучоқ гул кўтариб келди. Эр-хотин уни кузатиб чиқишиди. Ҳамидулла ариқ бўйидаги теракка боғлиқ турган тойни ечиб Саидага кўндаланг қилди.

Саида хайрлашиб, орқасига қарамай жўнаб кетди.

## XXII

Бу кунларда ҳар ким ўз дард-алами, ўз ғам-ҳасрати билан эди.

Қаландаров бошда одамларнинг гапини писанд қилмаган, писанд қила бошлаганида колхозга бирон ғаламиғ оралаб ҳамма ёқни бўтаяпти деган хаёлда ғазабга мин-

ган бўлса, мажлисда шунча одам гапириб хаёлида йўқ гуноҳларини юзига согландан кейин ғазаби ўпкага айланди: «Ҳа, шу экан-да!.. Раис бўлганимдан бери пахта ҳосилини ўн олтидан ўттиз олти центнерга, меҳнат кунини саккиз сўмдан йигирма етти сўмга олиб чиқдим; каттани aka, кичикни ука деб иш тутдим; одамларнинг тўйига бош, ўлигига ҳассакаш бўлдим... Юз-хотир деган нарса йўқ экан-да! Шу гаплар бор экан, ҳар қайсиси пайтини топиб, ўзимга айтақолса ҳам бўлар эди-ку! Мен нима гуноҳ қилган бўлсан, кўпчиликка яхши бўлармикин деган холис ниятда қилган эдим-ку....»

Ойнисанинг уйида уч кундан бери қиёмат — эридан балога қолган — нечук эканки хотин боши билан раиснинг бетига шунча гапни айтди! Нечук эканки шунча әркакнинг ичиде «эримга пардоз қилиб кўрингим кела-ди», деди!..

Саида уч кундан бери раисни кўролмай диққат: нима бўлди, мажлисда бўлган гапларни қандай тушунди? Нима учун ўзини касалликка солиб ётиб олди?. Нима учун ҳатто хотини, ўғлига ҳам ҳеч нарса демайди?

Ҳуринисо икки ёқлама қайғуга қолди: бир томондан әрига ичи ачиса, иккинчи томондан ўғлининг ноқобиллигидан куйиб, жизғанак бўлаёзди.

Ўша мажлис куни кечаси Тошкентдан Манзурахон келди. У аллақандай бир делегация составида уч ой муддат билан Хитой Xалқ Республикасига кетаётган экан, ота-онаси билан хайр-хўш қилгани келибди. Кифоятхон Ҳуринисо билан бамаслаҳат «ундоқ бўлса куёв билан келин бирпастина холи ўтириб, роз айтишсин», деган муддаода Козимбекни уйига чақирадиган бўлди. Манзурахон эртасига кечқурун жўнайдиган бўлгани учун холи ўтириш кундузи соат бирга тайинланди.

Козимбек тайинланган вақтда негадир Саида билан келди. У қаерга бошлаб кетаётганини айтмаган бўлса керак, Саида ҳайрон бўлиб әшикдан қайтмоқчи бўлди. Манзурахон қўймади, маҳкам ёпишиб олди. Ичкарига кирилгандан кейин Саида Манзурахоннинг ҳусн-жамолига маҳлиё бўлиб, ҳамма нарсани унутди, ўтириб қолди. Манзурахоннинг пайваста қоши, онасининг кўзидай ўйноқи, лекин қора учқун сочиб ялт-ялт этган каттакатта кўзлари, нозик-енгиллигидан ҳавода қалқиб тургандай туюлган вужуди, тиниқ овози, қувноқ кулгиси...

Әркак кишининг эмас, хотин кишининг ҳам суқи кирадиган қиз эди..

Ҳуринисо ўғлиниңг, Қифоятхон қизининг бефаҳмлигидан, ҳар иккаласи Сайданинг қилмишидан хуноб бўлиб, мәҳмонларнинг олдига кириб ўтиришга мажбур бўлиб қолди. Қудаларга бу ҳам етмагандай, Козимбек бутун сұхбат давомида Манзурахонни «синглім» деб атади. Манзурахон ундан ҳам ошириб юборди: нимадандир гап чиқиб, Козимбекка: «тўйингизда ўйнаб бераман», деди.

Қудаларнинг кайфи қочди. Бу кўнгилсизлик сұхбатга дарров таъсир қилди. Мәҳмондорчилик тез тугади.

Қудалар ҳар қайсиси ўз боласи билан очиқчасига гаплашди. Икковининг ҳам суйган ёри бор экан. Манзурахон онасига хушмуйлов бир йигитнинг суратини кўрсатди. Йигит машҳур бир артистнинг ўғли бўлиб, ҳосир Москвада ўқиётган экан. Эшон қизига бақирди, дўқ қилди, урмоқчи ҳам бўлди-ю тахт туриб берган Манзурахонга қўл кўтаролмади. Козимбек суйган ёри борлигига иқорор бўлди-ю ким ва қаерда эканини айтмади. Ҳуринисо ўғлига қаттиқ гапириб ғовға кўтаролмади; бир томондан, бусиз ҳам абор бўлиб ётган эрини хотинч қилгани кўнгли бўлмаса, иккинчи томондан, биттаю битта ўғил...

Эшон қизининг бевошлигидан дунё кўзига тор бўлиб турган пайтда Козимбекнинг кўнгли бошқа қизда эканини, Ҳуринисо аҳд-паймондан айниб, ўғлига ҳеч нарса демаганини эшишиб чидолмади — заҳар ичди. Қифоятхон дод солиб, унинг устига ўзини ташлади ва ияқ қоқиб ҳушдан кетди. Бунаقا фожиани китобда ҳам ўқимаган Манзурахон қўрққанидан ички кўйлакда ва оёқ яланг юрганича бориб, Козимбекни олиб келди. Козимбек касалларни яхшилаб кўрди, мийифида кулиб, икковини бир стакандан аччиқ сурги дори билан ўзига келтирдида, Манзурахонни буткул хотиржам қилиб, поездга кузатиб чиқди. Козимбекнинг Манзурахонни кузатиб чиқиши, чиқмаган жондан умид дегандек, Эшоннинг кўнглига жизми ёруғлик солди: «Олмайдиган бўлса нега кузатиб чиқади?

Нима учун ўзи якка кузатиб чиқади?..» Ёшлар орасида бу хилдаги муомала-муносабат ҳозирги замон адаб-одабининг энг оддий тақозоси эканлиги Эшоннинг хаёлига ҳам келмас эди.

Эшон буларнинг ўзаро муомаласини кўзи билан кўрмоқчи бўлди-ю Кифоятхонни олиб, станцияга чиқиб борди. Станцияда одам сийрак, Козимбек билан Манзурахон перронда кезишар, иккови ҳам нимадандир бениҳоят хурсанд — бир айтиб ўн кулишар эди. Эшон билан Кифоятхон қулай бир жойни топиб, буларни кузатишиди. Поезд келди. Паровоз ҳансираганича ўтиб тўхтади. Йўловчилар нари-бери югуриб қолишиди. Козимбек билан Манзурахон бир лаҳза кўздан йўқолиб, ўртадаги вагонлардан бирининг зинаси олдида пайдо бўлишиди. Паровоз узун гудок берди, бир орқасига силжиб, жўнади. Бироқ Эшон кутган нарса содир бўлмади. Манзурахон бир неча қадам пиёда юрганидан кейин Козимбекка қўл бериб хайрлашди-ю иргиб зинага чиқди. Козимбек рўмолласини силкиб, охирги вагоннинг кетидаги қизил чироқ кўздан фойиб бўлгунча турди, кейин қайрилиб катта йўлда кутиб турган машинага томон кетди. Эр хотин бир-бирига қаради ва иккови баравар: «Шўrimизга шўрва тўкилгани ростга ўхшайди-ку...» деди.

Қайтишиди. Эр хотин ҳар қайсиси ўз ўйи билан бўлгани учун уйга келгунча чурқ этмади. Ҳали вақтли бўлса ҳам Кифоятхон жой солди ва бошини рўйжага буркаб ётди. Эшон ҳовлисига сифмай кўчага чиқди, кўчаларни узоқ айланиб юрди. У нима тўғрида ўйламасин қаршисидан бир савол чиқар эди: «Козимбек нима учун Сайдани бошлаб келди? Саида ҳаммамизнинг ниятимизни билар эди-ку, нима учун келгани рози бўлди?» Эшон буҳақда ўйлаган сайин кўнглидаги гумон ҳақиқат тусини олар эди: «Саида раисни мендан совутди, хотинимни унинг уйидан улоқтириб ташлади... Шошма, Козимбек билан Сайданинг кечқурунлари отлиқ дала айлангани бежизмикин? Икковининг отлиқ юрганини неча марта ўз кўзим билан кўрдим. Албатта бир гап бор! Меҳмонлар келмоқчи бўлган куни иккови қандоқ ўйнади! Тўртта одамнинг олдидан қоқинмасдан ўтолмайдиган Козимбек шунча одамнинг ичida ўйнади, Саида билан басмабасига ўйнади. Сайданинг ўрнида бошқа қиз бўлса ўйнармиди? Бундан ташқари Козимбек Сайданинг ҳужрасига кўп киради дейишади... Албатта бир гап бор!»

Эшон беихтиёр боқقا томон юрди, дарвозадан кириб, Сайданинг ҳужрасига томон қаради. Ҳужрада чироқ бор эди. Эшон деразага яқин борди. Ичкаридан гурунг эшитилар эди. Эшон секин деразанинг рўпарасидаги ан-

жирнинг каллагига чиқиб қаради. Саида каравотда, Козимбек курсида, иккови гаплашиб, кулишиб ўтирас эди. Шу пайт Эшон бир қарорга келди-ю югурганича бориб хотинини уйғотиб келди ва мақсадини унга тушунтириб, ўзи яна анжирнинг каллагига чиқди. Кифоятхон Эшонни гүё қидириб юрган бўлиб, эшикни тақиллатди. Эшон бутун кучини кўзига йифиб, деразадан қараб турди. Эшик тақиллаган вақтда Козимбек билан Саида худди «кирса майлими» дегандай бир-бирига қаради. Саида каравогдан туриб, курсига ўтириди ва Козимбекка яна бир марта савол назари билан қарагач товуш берди.

Кифоятхон кирди, Эшонни тополмай қарғаган бўлиб қайтиб чиқди.

— Тамом!— деди Эшон қоронфида хотинининг этагидан ушлаб борар экан.— Козимбекни қайириб олган! Орада бир гап бўлмаса эшик тақиллаганда иккови бунақа типирчилаб қолмас эди. Козимбек суйгани ким эканини айтмагани жуда яхши бўлибди!

Эшон Саиданинг пайини қирқишга, унинг Қаландаров билан орасини бузишга бел боғлади. Бу ишни иложи борича тезроқ, Козимбекнинг кўнгли Саидада эканини ота-онаси билмасдан бурунроқ қилиш керак эди.

### XXIII

Эшон эртасига эрталаб Ҳуринисодан суюнчи олгани келди: Козимбек кечаси ўзи ёлғиз Манзурахонни станицяга кузатиб чиққанини, поезд жўнаши олдида иккови қоронфига ўтиб чиппа-чиппа ўпишганини айтиб, хурсандлик изҳор қилган ва шу билан бирга ранжиган бўлди: «ҳозирги ёшлар қарияларни куйдиргани куйдирган» деб бир оҳ чекди-ю, кечаси бўлиб ўтган воқиаларни Арслонбекка билдирмай қўя қолишини маслаҳат кўрди.

Арслонбек воқиани эшитса, ҳеч шубҳасиз, ўғли билан очиқ гаплашади ва бўлажак келини ким эканини айтишга мажбур қиласди. Бундай бўлган тақдирда Эшоннинг Саида тўғрисида айтадиган ҳар қандай гапини Қаландаров хусумат деб билиши турган гап. Эшоннинг бу келишидан мақсади аввало шунинг олдини олиш, қолаверса, Қаландаровга учраб, Саида ҳақида унинг кўнглига шубҳа ва ташвиш уруғини сепиши эди.

Ҳуринисо бу хушхабардан қанчалик суюнган бўлса ҳам Эшонни ҳовли юзидан кузатиш мақсадида унинг саволига одатдагича «Арслонбек акангиз ухлаб ётибдилар», деб жавоб берган эди, уйдан Қаландаровнинг ўзи Эшонни чақириб қолди. Эшон ўнг чаккасига тушиб турган тим қора сочини чинчалоги билан қулоғининг орқасига суриб, оёқ учida айвонга чиқди, ўша хилда юриб бориб, уйнинг эшигини секин очди, калласини тиққандан то Қаландаров кўрсатган жойга бориб ўтиргунича гоҳ кўзига ёш олиб, гоҳ хурсандликдан ўзини йўқотиб ҳолаҳвол сўради, Қаландаровнинг икки ёнида, хонтахта устида уйилиб ётган китобларни кўриб ҳайрон бўлди: «Бу одам ҳеч қачон қўлига китоб ушламас эди-ку!..»

Қаландаров буни пайқади.

— Ҳеч бир дуруст китоб йўқ!— деди худди шу китобларнинг ҳаммасини ўқиб маза-матра топмагандай.—Бирига тушуниб бўлмайди, бири эртак... Китоб деган нарса одамга илм берса, бу китоблар бор илмингни қоқишириб олади!

— Жуда тўғри!— деди Эшон.

Эшон ташқарида нималар бўлаётгани, одамлар нималар деяётгани ҳақида берадиган сон-саноқсиз саволини Қаландаров шу гапдан бошламоқчи деб ўйлади. Бироқ Қаландаровнинг Эшонни чақиришдан муроди ташқарида нималар бўлаётганини сўраш эмас эди.

Қаландаров бошда одамларнинг гапидан ғазабланган, бир оз мулоҳаза қилгач бу ғазаб ўпкага айланган бўлса, уч кун танасига хўп ўйлаганидан кейин кўнглида ўша ўпкадан ҳам асар қолмади: «одамлар нима деган бўлса ҳаммаси рост, бу гаплар қай хилда айтилган бўлмасин хусуматдан эмас, чунки ҳамма суюниб эмас, куйиниб гапирди. Шундай бўлгандан кейин мажлисдан ортиб ташқарига чиқадиган нима гап қолди?»

Эшонни чақиришдан унинг мақсади бошқа эди.

Қаландаров бўлиб ўтган камчилик ва хатоликлар тўғрисида энди ўша одамлардай холис туриб, куйиб-пишиб ўйлар экан, бу камчиликларнинг сабабларини қидириб, ҳамма иллатни ўзининг илмсизлиги устига қўйди: «Бу каллада илм йўқ!— деди пешонасига шақ-шақ уриб.— Мени илмсизлик мўрт қилиб қўйган!»

Қаландаров энди илм қидирмоқда эди.

У уйига келиб қолган ҳамма китобларни бир-бир варақлаб, пича-пича ўқиб кўрди, хотинига айтиб кутуб-

хонадан янги китоблар олдириди, лекин бу китобларнинг ҳеч бири унга илм берадиганга ўхшамас эди.

Қадим замонда бир подшо ўладиган бўлибди-ю дунёдаги ҳамма илмларни билиб ўлгиси келибди. Олимлар дунёдаги ҳамма илмларнинг қаймоғини олишган экан, бир тую китоб бўлибди. Подшо бу китобларнинг ҳам қаймоғини талаб қилибди, олимлар қаймоқнинг қаймоғини олишган экан, бир эшак китоб бўлибди. Подшо бир эшак китобдан битта китоб қилдирибди, лекин шуни ҳам ўқиёлмай ўлиб кетган экан. Қаландаровга мана шунаقا қаймоқ китоб бўлса!

Колхозда илмли одамлар кўп, шулардан йигирмата-сига топширилса бутун дунёдаги илмларни бўлмаганда ҳам колхоз кутубхонасини сиқиб жавҳарини олиб бериши мумкин, лекин бунаقا гапни Қаландаров бирдан-бир сирдош одами Эшонга, ўшанга ҳам рўй-рост эмас, ишора билан айта олар эди, холос. Эшон унинг ишорасидан кўнглидагидан зиёдроқ тушунди.

Эшон ҳам имо-ишора билан бу ҳақда катта ваъда бериб кетди-ю ҳаял ўтмай ҳовлиққанича район газетасининг бугунги сонидан бир нусхасини кўтариб келди.

Район газетаси «Бўстон» колхозчиларининг тунов кунги умумий мажлисига қарийб бир саҳифа бағишлиб, редакциядан ёзилган муқаддимада бу мажлисни «Бўстон» ҳаётида катта воқиа деб атаган. Газета, афтидан, мажлисда айтилган гаплар, очилган иллатлар, ўртага ташланган фикрларга катта аҳамият бериб, буларга бутун район жамоатчилигининг диққатини тортмоқчи, шу ўт билан бошқа колхозлардаги маразларни куйдирмоқчи, соғлом интилишларга йўл очиб бермоқчи эди.

Эшон ҳовлиқиб кирап экан, дарров чўкка тушди, газетани бир зумда Қаландаровга ўқиб берди, лекин шундай ўқидики, «Бўстон»да кўтарилиган масалаларни район доирасига олиб чиқсан газетанинг яхши тилагидан ҳеч нарса қолмади. Эшон Қаландаровга яна оғзаки уқтириди.

— Гуноҳни Зулфиқоров қилган-у ҳамма калтак сизнинг азиз бошингизда синибди. Мана, бирон жойда Зулфиқоровнинг номи йўқ. «Қаландаров масалага юзаки қаради» әмиш! «Қаландаров тушунмади...» Сиз тушуммаган әмишсиз!. Шундоқ бўлишини билар эдим, лекин орамизга Саида тушиб, сизни мендан совутгани учун кўнглингизга бошқа гап келмасин деб дардим ичимда юрар эди. Носиров ўртоқ Қодиров тарбиялаган кадрлар-

ни емоқчи, Саидани узун косов қилиб, сизнинг обрўйи-  
нгизни тўкмоқчи, бир пул қилмоқчи!

— Ҳөвлиқма, ваҳима қилма! — деди Қаландаров, —  
Саида келгандан бери яхши ишлар ҳам қилди-ку!

— Ҳадеб ёмон иш қила берса нияти билиниб қолади-  
да, ора-сира яхши иш, сизга яхшилик қилмасдан иложи  
борми!

Қаландаров газетага қўл узатган эди, Эшон қизил  
қалам билан чизган жойларини кўрсатди ва бошқа жой-  
ларини ўқишга имконият бермади:

— Келинингзиз Манзурахон келган эди, жуда хафа  
бўлиб кетди: Козимбекка тега кўрма, дадаси барибир  
ишдан олинади дейишибди...

— Ким, ким айтибди?! — деди Қаландаров шовқин  
солиб ва газетани улоқтириди.

Эшон бу гапни Қаландаровнинг диққатини газетадан  
четга тортиш, ўнг келса Саидага тўнкаш мақсадида айт-  
ган эди, бироқ унинг важоҳатини кўриб қўрқиб кетди.

— Билмадим... Камоли хафа бўлганимдан, аччиғим  
келганидан ким айтганини сўраш хаёлимга келмабди.

Қаландаров бу китоблардан фойда йўқ, деган бир  
ҳаракат билан ҳаммасини хонтахтанинг тагига тиқди,  
пиёлада совуб қолган чойдан бир-икки хўплади, дуп-  
писини бошидан олиб қоқди, пешонасини уқалади.

— Нима қилиш керак?..

Эшон шу саволни кутиб тургандай дарров жавоб  
берди.

— Бориш керак! Лекин райкомга боришдан мурод  
ҳосил бўлмайди, Носиров... Обкомга бориш керак!  
Область ижроия қўмитасига бориш керак! Бепарво бўл-  
манг! Қоф тоғини битта дев ялаб, азонгача пиёзнинг пўс-  
тидай қилиб қўяр экан, азонда сўфи «оллоҳу акбар»  
демаса-ю, тоғ аслига қайтмаса қиёмат қойим бўлар  
экан... Мен сизга айтсан, Саида келганидан бери сизни  
эговлаб, анча, анчагина юпқа қилиб қўйди, битта-яримта  
каттароқ одам «оллоҳу акбар» демаса... Сизга-ку, ҳеч  
нарса эмас, бу ер бўлмаса бошқа колхозга раис бўлиб  
ишлай берасиз, лекин бизга, колхозчиларга қийин. Зий-  
рак одамсиз, ўзингиз билсангиз керак деб ўйлайман.

Қаландаров Саиданинг эговлагани-ю ўзининг юпқа  
бўлиб қолгани нимадан иборат эканини билмаса ҳам  
Эшон билган нарсани билмайман дегани оғзи бормади,

— Биламан, ҳаммасини биламан! — деди.

— Билсангиз нима қилиб ўтирибсиз?

Уч кудан кейин Саида устидан бутун бошлиқ бир айбнома ёзилди. Бунинг мазмунини Қаландаровнинг ўзи айтиб берган бўлса ҳам «у ёғини Эшоннинг ўзи тўғрилаб, ўзи келиштириб» ёзиг чиқди. Қаландаров йигирма уч саҳифали бу аризани ўқиб кайфи учди: «Бу синчалак йўрғалаб юриб, сал кунда шунча иш қилибдими! Эшон узун косов деганича бор экан-ку. Шунча иш битта ўзининг қўлидан келмайди, ақли ҳам етмайди. Бунинг устаси уста!..»

Лекин, шундай бўлса ҳам, Қаландаров ишга алақсиб областга тезда боролмади, бу орада дардини иситмаси ошкора қилиб, Саидага малол келадиган қилиқлар қилди. Бунга ўзича маъно бериб, Саида ҳам қаттиқ хафа бўлди, илгаригидай паст тушмай тегишли жавобини берди. Бу ҳол аризада айтилган гапларнинг ҳаммаси соғ ҳақиқат эканига Қаландаровнинг кўнглида бўлган унчамунча шубҳани қувиб чиқарди. Қаландаров энди Саидани кўрганида қилмишларини ўйлабгина эмас, бундан кейин қилиши мумкин бўлган ёмонликларини ҳам кўз олдига келтириб жини қўзғар эди.

Бу орада Эшон Саиданинг устидан яна бир материал топди.

Уша оқшом Ҳамидулла Саидани мот қилиб кузатганидан кейин «ўзимиздаги адвокатлар кам эди, энди «Бўстон»дан ҳам адвокатлар чақирдингми», деб хотинига хархаша қилди, Саиданинг шаънига бўлмағур гаплар айтди. Тожихон унинг шовқинидан қочиб уйга кириб кетди. Ҳамидулла унинг орқасидан кириб, Саиданинг шаънига боягидан ҳам бадтар гаплар айтди. Тожихон ҳаммасига чидаса ҳам бунга чидолмади. Қаттиқ жанжал чиқди. Ҳамидулла столнинг устида турган графинни олиб ерга урган эди, унинг муштдай келадиган шиша тиқини отилиб кетиб, қиммат баҳо буфетнинг нақшкорлик тош ойнасини чил-чил қилди. Унинг бир алами ўн бўлди-да, ўзини йўқотиб қўйди, қўлига кириб қолган оғир стулни олиб жон-жаҳди билан столга урди. Тожихон чинқириб юборди. Ҳамидулла унинг чинқириғидан ўзига келиб қараса хотинининг чаккаси, кўйлаги қон. Ҳамидулла қўрқанидан унга ўзини отди. Тожихон столнинг остидан ўтиб ташқарига чиқиб кетди. Ҳамидулла қон, Тожихоннинг аҳволидан ҳам кўра унинг шу тахлитда одамларнинг кўзига кўринишидан кўпроқ

ваҳимага тушди-ю ўзини ўлдирадиган бўлди, қўлига тушиб қолган ярим шиша сапсар сиёҳдан кўнгли тортганича ичди ва ўзини ерга ташлаб, тўлғана берди. Қўни қўшини йифилди. Тез ёрдам машинаси етиб келди ва бирининг чаккасидаň қон, бирининг оғзидан сапсар сиёҳ оқаётган эр-хотинни касалхонага олиб кетди. Ҳамидулла касалхонада кўзини очиб, «Агар мен ўлсам қонимга Саида Алиева зомин бўлади» деди. Бу воқиа ва Ҳамидулланинг гапи дарров тарқалди, «Бўстон»га ҳам етиб келди. Эшон буни ҳам дарров учлаб аризага қоқиб берди.

Қаландаров аризани кўтариб Тошкентга жўнади, кечки пайт етиб келиб, меҳмонхонага тушди-ю циркка билет олгани югурди — Тошкентга келса циркка кирмай кетмас эди.

Ўйин бошланди. Қаландаров ўзида йўқ хурсанд, «Ҳўп» деганда ирғиб қасқондан ўтаётган лайчанинг ҳар бир ҳаракатидан завқланиб ўтирган эди, бирдан рўпара-даги иккинчи қаторда ёш боладай талпиниб, кулиб, чапак чалаётган Қодировни кўриб қолди. Уша Қодиров! Қаландаров ўйин кўргандай ҳам бўлмади, танаффусга бир оз қолганда чиқиб, ўша томондаги эшик олдига бориб турди ва Қодиров чиқиши билан қучоқлаб, йиғлаб кўришди. Бу учрашувдан Қодиров жуда хурсанд бўлди, Қаландаров билан ўтган-кетгандан гаплашгуси келиб, уни уйига таклиф қилди. Қаландаров унинг таклифига дарров кўнди.

Қодиров аллақайси мактабнинг директори бўлиб, уйи ҳам ўша бинода, марказдан анча олис экан. Икки ошна гапга берилиб кетиб, пиёда кетишиди.

Қаландаров шу келганича унинг уйида уч кун қолиб кетди. Бу уч кун давомида аризани қайта-қайта ўқиб, ёнбошлишиб қилинган сұхбатларнинг оқибати шу бўлдики, Қаландаров обкомга учрамай районга қайтди, худди одам сўйиб келиб, пичоғини топшираётган бир важоҳатда аризани Носировнинг столига қўйди.

Носиров аризани ўқиб: «Боринг, дам олинг», деди.

## XXIV

Козимбек кўпдан бери қилган орзуси ушалиб, отаси ўзининг эски «Масквич»ини касалхона ихтиёрига берди Козимбек уни Тошкентга судратиб бориб, қайтишда ми-ниб келди. Яхши ремонт қилинган, бўялган машина ян-

гидан фарқ қилмас эди. Козимбек ремонт счёлларини тайинлик жойга қўйиш учун этажеркадаги китоблардан бирини олган эди, ичидан бир қўл ёзма чиқиб қолди. Козимбек ҳайрон бўлди-ю, қўл ёзмани ўқиди. Бу нарса Саида устидан ёзилган аризанинг Ҳамидулла можароси кирмаган биринчи нусхаси эди. Казимбек бошдан-оёқ уйдирма, Сайданинг тўғри ҳаракатларига ҳам эгри маъно бериб ёзилган аризани ўқиб ўтириб қолди. Бирор келиб тўсатдан «отанг ўлди» деса ҳам, эҳтимол, Козимбек бу аҳволга тушмас эди. Унинг гувиллаб кетган бошига келган биринчи фикрлар шу бўлди: «Бу гаплардан хабардор бўлса, Саида бечоранинг ҳоли не кечди экан?»

Козимбек аризани жойига қўйиб, Сайданинг ҳужрасига қараб чопди, йўлакай очиқ турган деразадан унинг кабинетига қаради. Саида кабинетда бошини қуи солиб, қаршисида куйиб-пишиб гапираётган бир колхозчининг сўзига қулоқ солар эди. Бу колхозчи Ойнисанинг эри эди. Козимбекка Саида ялт этиб қаради, Козимбекнинг ранги бир аҳволда бўлса керак, қути учиб дераза олдига келди.

— Тинчликми?

— Тинчлик,— деди Козимбек ўзини босиб,— Тошкентдан келдим...

Саида таажжублангандай бўлди.

— Биламан, кеча кетган эдингиз...

— Машина олиб келдим...

— Шунақами... Қуллуқ бўлсин! Қани?

Машина ҳовлида қолгани Козимбекнинг эсига энди келди.

— Ҳовлида, қўлингиз бўшаса бир айлантириб келсан деган эдим.

— Раҳмат... Бирон соатда бўшарман.

Козимбек унинг чеҳрасидан кайфиятини билиб бир оз хотиржам бўлди-ю, бирон соатдан кейин машинани миниб келди. Саида дарвоза олдида турган экан, машина кўндаланг бўлганда Козимбекнинг ёнига ўтираётib писандада қилди:

— Лекин ичак-чавоқдан гапирмайсиз! Яна шундан гапирсангиз...

Козимбек қаттиқ хижолат бўлди: ўйлаб қараса Саида билан суҳбат қилган чоғларида, дарҳақиқат, ўзининг фикр-ёдини банд қилган меъда-ичак касалликлари-

дан кўп гапирав экан. Саиданинг бу ҳазили шу билан бирга унинг аризадан, раиснинг нима учун бемаврид Тошкентга кетганидан бехабар эканини кўрсатар эди. Область ёки район тўсатдан чақирса Саида саросимага тушмасин учун Козимбек уни воқиадан хабардор қилиб қўйишни лозим кўрди-да, қишлоқ орқада қолиб, дала йўлига чиқилганда жуда эҳтиёт билан гапнинг учини чиқарди, лекин аризанинг бунчалик шалтоқ эканини айтмади.

Саида Қаландаровнинг обкомга ариза кўтариб боришини сира кутмаган эди, шундай бўлса ҳам бундан на хавотирга тушди, на ранжиди, аксинча, отасининг қилимишидан номусларгá ўлаётган, жуда катта ташвишга қолган Козимбекка тасалли берди:

— Арслонбек акам устимдан арз қилгани обкомга боришини зарур деб билган бўлсалар, демак, мени катта куч ҳисоблар эканлар. Бу ҳазил гап эмас! Демак, энди бамайлихотир ишлай берсам бўлар экан,— деди ва бир оз жим қолгандан кейин сўради:— дадангиз аризани ўз қўллари билан ёзганимилар?

— Йўқ, дадамнинг қўлларига ўхшамайди.

— Ундоқ бўлса, қайнатангиз ёзиб бергандир-да, Эшон!..— деди Саида.

Козимбек секин кетаётган машинани бирдан тўхтатди, Саидага қаради, Саида олдинга қараб ўтира берди. Козимбек ўнг билагидан бир тортиб уни ўзига қаратди.

— Гапирманг! Шунаقا гапни гапирманг!..

Саида унинг ўпка, алам, ёлвориш тўла кўзларига қаради.

— Нима дедим... Қанақа гап...

— Майли, мен бундан кейин касаллик, умуман медицина тўғрисида гапирмайман, сиз ҳам Эшон тўғрисида гапирманг! Ҳеч ҳам гапирманг!

Козимбек бу гапни жуда куйиниб гапирди.

Шу пайт Саиданинг кўзи узоқда келаётган Қаландаровнинг таниқли виллисига тушди. Унинг юзидағи ташвиш аломатини кўриб, Козимбек ҳам қаради. Район йўлида юрганини иккови ҳам энди пайқади.

Козимбек шапқасини бостириб кийиб, машинани тезлатди ва Саидага:

— Етинг!— деди.

Саида итоат билан чапга ёнбошлаб, Козимбекнинг сонига бошини қўйди. Козимбек гўё «қимиirlама» деган

бўлиб унинг елкасига ўнг қўлини ташлади. Соатига саксон километр тезликда келаётган Қаландаровнинг машинаси пишқириб ўтиб кетди. Саида буни сезиб, бошини кўтармоқчи бўлган эди, Козимбек қўлини олмади. Машина секинлади, чайқалди, ўнг томонга бир оз қийшайди-ю, нимагадир тўқ этиб урилди, тўхтади. Саида энгашиб келаётган Козимбекнинг иссиқ нафасини сезиб, ваҳима билан пичирлади:

— Вой!. Бирор кўриб қолади!. Хафа бўламан...

Козимбек ростдан ҳам «хафа бўлса керак» деб дарорв бошини кўтарди, сал бўлмаса узр сўраёзди. Саида ўрнидан туриб сочини тузатди. Қўлининг орқаси билан Козимбекнинг юзига секин урди.

— Ёмон бола!. Юринг!..

Козимбек машинани йўлга олиб чиқиб, қишлоқда томон юрди. Йўл бўйи иккови ҳам сўз қотмади. Козимбек қилмишидан хижолат, Саида эса ундан балоғатга етганидан бери қалбининг ҳарорати билан қизиб, ўзга қалбга чиппа ёпишадиган бирон оғиз сўз кутар эди. Йўқ, Козимбекдан бундай сўз чиқмади. Бироқ унинг соддалиги, маъсум қиёфаси, одамнинг жони дёб аталадиган ёшларга хос хислатлари қалбига аллақачонлар чиппа ёпишганидан Саиданинг ўзи бехабар эди.

Козимбек уни боғнинг орқа томонидан кўчада машинадан туширди-ю дадасининг кайфиятини билиб ҳалироқ келмоқчи бўлди. Саида деворнинг раҳнасидан ўтиб, ишкомлар орасидан ҳужрасига қараб кетди.

Бу орада қош қорайди.

Козимбек ҳовлига келди. «Виллис» ҳануз шу ерда эди. Унинг шоferи Козимбекни кўриб чуқур ҳўрсинди ва бош чайқаб: «Бек акам жуда қаттиқ бетоб», деди. Қаландаров Тошкентдан келгунча, унга бир оғиз гапирмабди. Козимбек ичкарига кирди. Ҳовли қоронғи, Ҳуринисо шийпонда гугурт чақиб, осма чироқни ёқди. Козимбек югуриб шийпонга чиқди. Ўзининг тиниқ шишасинигина ёритиб турган чироқнинг хира шуъласида оқ ёстиқ-қа ёнбошлаб ётган Арслонбекнинг қораси кўринди. Ҳуринисо индамай пастга тушиб кетди.

— Дада, эсон-омон келдингизми... тобингиз йўқми...

Қаландаровнинг йўғон, ғалдираган ва шу билан бирга ҳорғин товуши эшитилди.

— Балли... Умримда ҳеч қачон ҳозиргидай соғ бўлтан эмасман!. Саида қаерда? Айт, топиб келсин,

Козимбек шоферга айтгани кўчага чиқиб кетаётгандада, онаси тўхтатди.

— Дадангнинг бошига бир кулфат тушганга ўхшайди. Сўрасам гапирмайди.

Козимбек шошиб:

— Саидахон келса маълум бўлади,— деди-ю чиқиб кетди ва шоферга айтгани ҳам сабри чидамай Саидани ўзи олиб келди ва йўлда дадасининг аҳволини гапирди.

Шийпонга чиқиб келаётган Саида билан Козимбекнинг оёқ шарпасини эшитиб Арслонбек қоматини кўтарди, Саидага қўл берди. Козимбек чироқнинг пилигини кўтариб дадасининг юзига зеҳн солди. Унинг юзи узоқ вақт ғам-койиш тортгандай сўлган, кўз остлари нимадандир йилтирас эди. Қаландаров Саиданинг соғлиқ-омонлик сўраб айтган гапларига жавоб бермай, қўли билан «ўтири» деб ишора қилди. Саида якандозга, Козимбек панжарага ўтирди. Оёқ учida шийпонга чиқиб келган Ҳуринисо зинанинг бошида туриб қолди. Арслонбек яна ёнбошлади, анчадан кейин яна турди, бир нафас билан кўп гапира олишига кўзи етмаса керак, ҳамон ўша йўғон ва хоргин товуш билан узиб-узиб сўз бошлади.

— Тошкентга борган эдим... Ўртоқ Қодировдан салом, икковингга салом, сенга ҳам салом,— деди Ҳуринисога қараб,— кўпдан-кўп салом... Энди бизни бирпас холи қўйинглар, Саидахонга менинг гапим бор...

Ҳуринисо дарров тушиб кетди. Козимбек қути учиб, ўрнидан турди, зинанинг бошига борди-ю тушмади, тушолмади, шу ерда туриб қолди. Арслонбек тиззасига олган ёстиқни қучоқлаганича узоқ сукут қилганидан кейин бошини кўтармай бардам товуш билан бурро қилиб:

— Мен сенинг устингдан ариза кўтариб, обкомга борган эдим,— деди.

— Шунақами...— деди Саида маъюс товуш билан ва бу гапни нима учун айтиётганидан зўр ташвишга тушиб тупугини «қилт» этиб ютди..

— Лекин аризани бермадим. Қайтишда ўртоқ Носировга ташлаб келдим. Копиясини сенга бермоқчиман,— деди Арслонбек ва ўғлини чақирди,— Козимбек, уйда этажерканинг орқа томонидаги катта китобнинг ичидагоғоз бор, шуни олиб чиқ!

Қозимбек панжаранинг зинасидан ошиб ўзини ерга ташлади, пастан «ҳозир» деб товуш берди-ю ўзи кўрган аризани бирпасда өлиб чиқди.

— Мана,— деди Қаландаров аризанинг эски нусхасини Козимбекнинг қўлидан олиб Саидага узатар экан.— Бу нусхада сен Тожихоннинг уйини бузганлигинг тўғрисидаги яна бир туҳмат йўқ! Ўқи! Ҳоҳлаган одамингга ўқиб бер! Ҳоҳласанг халқни йифиб ўқиб бер,— деди ва товуши яна ўзгарди, хиёл титради,— лекин сендан битта илтимосим бор. Аризамни Эшон ёзиб берган эди, қўлинни яхши танийсан, Эшондан хафа бўлма, хафа бўлишга арзийдиган одам эмас. Узим мўрт бўлмасам синмас эдим, менга ҳеч ким ариза ҳам ёзиб бермас эди...—«Қутқу ҳам солмас эди» демоқчи эди айтмади.— Бор, ҳужрангга бориб ўқи!

Қаландаров пешонасини қучогидаги ёстиқقا қўйиб жим қолди, афтидан, энди бошини кўтармоқчи эмас эди.



## ХОТИМА

Орадан бир неча йил ўтди.

Ўзбекистон хотин-қизларининг қурултойи очилган куни театрнинг пештоқи олдида аллакимга нима тўғридадир ёлвориб турган ўша мухбир Аъзамжонни кўриб қолдим. Маълум бўлишича у ҳам менга ўхшаб қурултойга киролмай умид билан театр атрофида юрганлардан экан. Бир-биримизнинг таптимизни кўтардиг-у, ўтган-кетганлардан гаплашиб қолдик.

Аъзамжон бугун саҳарда Арслонбекни курортга кузатиб қўйибди. Кеча кун бўйи иккови бирга экан. Арслонбек «Қизил Ўзбекистон» газетасининг кечаги сонида чиққан «Синчалак»дан парчани ўқиб, ёзувчидан хафа бўлибди: «Мен Саидхонни ўшандада синчалак деган бўлсам кейинроқ бу хатони ўртоқ Носировнинг олдида тузатган, колхозчиларнинг умумий мажлисида ҳам тўғрилаганман, ўзига қўл бериб, кичкина, нимжон бўлсанг ҳам осмонни кўтаргулик қувватинг, файратинг бор экан», деганман, шуни ёсин-да, нима қиласи ўтган гапларни эсга солиб!» дебди.

Ваъдасига мувофиқ Носиров бир йилдан кейин эмас, икки йилдан сал ошганда Саидани чақириб олибди. Лекин Саида ёлғиз кетмабди, Козимбекни олиб кетибди. Буларнинг тўйида Эшон мастлик қилиб, жиндай кўнгилсизлик туғдирибди: Али бобо ҳамон ўша эски ашуласи мақомига тебраниб, бир чеккада ўтирган экан, Эшон қадаҳ кўтариб: «Шундай қизни тарбиялаб ўстирган

отасига раҳмат!» дебди. Бир лаҳза ҳамма жим қолибди...

Саида билан Қозимбек ҳозир совхозда ишлар экан. Иккита фарзанд кўришибди.

«Бўстон» партия ташкилотининг секретарлигига Исмоилжон Норматов сайданибди. Қаландаров Исмоилжон билан жуда иноқ экан.

— Тожихонлар оиласи қалай? — дедим.

Аъзамжон бош чайқади.

— Бўлмади. Иккови ажрашди. Тожихон ҳамма ёқни Ҳамидуллага ташлаб уйдан чиқиб кетди, колхоз уй берган, болалари билан туради. Ҳамидулла бир йилдан ортиқроқ қидириб, кўнглидаги хотинни Самарқанднинг аллақайси чекка мозоридан топибди. Шайхдан тул қолган, ҳатто хўроздан ҳам юзини беркитадиган бир хотин экан, никоҳ кечаси Ҳамидулла: «Қани, энди юз кўришайлик, битта ўпич беринг», деса, «Бисмиллоҳу раҳмону раҳим», деб юзини тутган эмиш. Ҳамидулланинг ўзи айтибди.

Хўп кулишдик. Редакцияга томон юрдик.

— Ҳамидулла бу хотин билан ҳам умр қилолмайди, — деди Аъзамжон. — Ўтган йил кузда қарасам шу хотин далада ўйнаб-кулиб пахта териб юрибди.

Аъзамжон редакцияга кирмоқчи экан, мен билан хайрлашди. Қурултойга киролмаганимиз тўғрисида бир-бирамизга тасалли бердик, майли, киролмасак ҳам биламиз — бу ерга йиғилганлар миллион-миллион оддий ўзбек аёлларининг оддий вакиллари, булар йиғилиб нималарни мұҳокама қилганларини, қандай қарорлар чиқарганликларини келажак кўрсатади. Тақдирини ўз қўлига олган одамларнинг келажаги, албатта, ёрқин бўлади, ҳали бу неъматга эришмаганларнинг кураш йўлини ёритади.

Зотан буни Саидадан сўрасак ҳам бўлади-ку, ҳадемай танаффусга чиқиб қолади...

1958 й.

*На узбекском языке*  
Абдулла Каҳхар  
**ПТИЧКА — НЕВЕЛИЧКА**  
*Повесть*  
**Гослитиздат УзССР—Ташкент—1980**

Редактор *Л. Тожиева*  
Рассомлар *В. Кайдалов ва К. Рудов*  
Расмлар редактори *Г. Бедарев*  
Техн. редактори *Я. Хамзов*  
Корректорлар *Юсупова М. Сулаймонов А.*

\*\*\*

Босмахонага берилди , 17/IX 1960 й. Босишига  
руҳсат этилди 1/XII 1960 й. Формати 84x108 ¼<sub>2</sub>  
Босма л. 4,871 Шартли босма л. 8,0. Нашр л.  
8,485 вклейка Индекс б/а Тиражи 45000.  
ЎзССР Давлат бадний алабиёт нашриёти  
Тошкент, Навоий кучаси, 30, Шартнома 173—60

\*\*\*

Ихтисослаштирилган ҳарфтерув фабрикаси  
матрицадан „Правда Востока”, „Қизил Ўзбе-  
кистон”, „Ўзбекистони сурх”, бирлашгани наци-  
риётининг босмахонасида босилди. Тошкент  
„Правда Востока”, кучаси 34.т  
1960 й. заказ № 35 Баҳоси 4 с. 34 . 1961 йил  
1 январдан баҳоси. 43 т.